






R. DE GRAAF
DE MULIERUM ORGANIS
GENERATIONI INSERVIENTIBUS.

Lugduni Batavorum ex Officina HACKIANA 1672.



R. DE GRAM
DE MONTAIGNE
CONFRATOS I DISCIPULOS

REGNERI DE GRAA
DE 54292

MULIERUM
ORGANIS
GENERATIONI
INSERVIENTIBUS

TRACTATUS NOVUS

DEMONSTRANS

Tam Homines & Animalia cætera omnia,
quæ Vivipara dicuntur, haud minus quam
Ovipara ab Ovo originem ducere.

AD

COSMUM ILLI

MAGNUM ETRURIE DUCEM.



Montreuil



LUGDUNI BATAV.

Ex Officinâ HACKIANA, 1672.





SERENISSIMO
COSMO III.
MAGNO
ETRURIÆ
DUCI.

SERENISSIME
MAGNE DUX,

EUit. is familiæ Medi-
ceæ & est semper in
studia liberalia tantus
favor ac beneficentia

DEDICATIO.

inexhausta, ut propterea omni ævo totus literatorum chorus sese debitores lubentissimè sint professi. Adeoque jam pluribus sæculis nihil fere ingenia aut pepererunt præclari, aut eruerunt abstrusi, quod non ad aliquem Generis Vestri Heroëm, grati animi significandi ergo, deferendum putârint. Atque, ne ab ultima antiquitate repetitam majorum gloriam commemorem *Laurentii*, veterisque *Cosmi*; qui eruditorum linguis ac doctrinæ monumentis nunquam intermorituris certatim sua quisque ætate fuerunt concelebrati; ad tempora memoriæ nostræ

stræ

DEDICATIO.

stræ propiora oratio mea se
 convertet. *Galileus Galileus* vir
 sublimis ingenii, Florentiæ
 Tuæ æternum decus, Hetrurię
 Magno Duci *Cosmo Secundo*
 misit *Sidereum Nuntium*, tot
 miraculorum proditorem, &
 adportare jussit incomparabile
 munus, insertum Cœlo Medi-
 cæ nomen gentis, quod per-
 pete honore & cursu, proxi-
 ma Jovis folio, mortalium ne-
 mini ante visa quatuor astra
 signarent. At ille quidem Ve-
 ster, Vestra sub ditione, Vobis,
 quod ipse gratus confitetur,
 multiplici beneficio devinctus,
 singularitèr ita facere debuisse
 queat videri; nisi, ut antea
 * 4 dixi,

DEDICATIO.

dixi, iisdem vinculis omnes, etiam exteros ac longè positos, innexos teneretis & constrictos. Itaque in vicina nobis Belgica *Florentius Langrenus*, rerum cœlestium scientiâ præcellens, cum & is novi aliquid moliretur, pleniorẽ orbis Lunaris, quod nondum tunc alter, descriptionem aggressus, edito schemate Selenographo telluris cujusdã instar in varia regna & tetrarchias diviso, fas non esse existimavit præterire Mediceos, convenientemque illis est elargitus sedem in terra quam Honoris appellavit. Et nuper in hoc Batavorum solo industriæ felix

Chri-

DEDICATIO.

Christianus Hugenius nulli id
 usque temporis observatum
 comitem Saturni, ipsumque
 planetam lucido circumdatum
 annulo, ac velut coronâ redi-
 mitum primus ingeniosè de-
 monstrans, istâ quoque do-
 nandum Mediceum elegit He-
 roëm Eminentissimum & Se-
 renissimum Principem Leo-
 poldum. Ego denique, licèt
 non quemadmodùm illi fece-
 runt, æthera supposuerim in-
 genio meo, distantia sidera
 oculis admoverim, aut in sce-
 nam protraxerim quod cœle-
 stis theatri cortina, terricola-
 rum visui tot per annos nega-
 tum, cœrulea post aulæa suis

D E D I C A T I O .

in adytis occultum fervat, tamen & ipse Naturæ peplum revelare ausus, ac patefacere nativitatæ nostræ primordia omnemque humani opificii officinam & apparatum cistis plus quam Eleusiniis delitescentem; in professione artis meæ publico daturus aliquid hætenùs irrepertum, quonam potiùs manifestis tot exemplis provocatus irem, nisi ad Te, familiæ columnen, magnificentiæ & virtutum avitarum ex asse heredem, Ô S E R E N I S S I M E ? quem supplex precor, ut patiaris (& indulgentèr patieris) isto nunc me titulo & nomine solo

uti,

DEDICATIO.

uti , quo unicè mihi utendum suadet omen , quod in nomine latet. Quantulumcumque sit enim quod representare neque piget , neque pertimesco , haud aliter ipsum quàm latis oculis & innubilâ fronte spectatum iri , ejusdem illius , quem unicum posui modò , tituli & digni nominis benignum omen me sperare compellit ; futurumque ut recipiatur clementer , quicquid ego audeo offerre confidenter ; quamquam longe mavelit in Augustæ SERENITATIS Tuæ clementia , quam in sua confiden-

DEDICATIO.

dentia non vanæ spei præsidium collocare

DEVOTUS

*Nomini Splendorique
Mediceo*

Delphis Batav.
idib. Februar.
clō Io c LXXII.

REGNERUS DE GRAEF.

Ad

LECTOREM.

Accipe, Lector benevole,
 Tractatum hunc ante
 quadriennium, dum
 Virorum Organa Ge-
 nerationi inservientia conscribe-
 rem, Tibi promissum: in quo non
 veterum tantum sed & recentio-
 rum quoque circa Partes Genita-
 les opinionem, novis figuris illu-
 stratam, reperies; quas anno præ-
 terito unà cum Clarissimo Profes-
 sore Sylvio, in nosocomio Leidensi,
 cum cadavere à nobis præparato
 contulimus, cui cum accuratissimè
 corresponderent, placuit Cl. Viro
 figuras illas, dum partes genitales
 ostenderet, omnibus spectandas ex-
 hibere: ut singuli de illarum ex-
 actitudine judicare possent.

Præterea Generationis histo-
 riam novis fundamentis super-
 structam exhibet: statuit enim
 om-

Hist. an.
l. 7. c. 7.
Degener.
animal.
exercit.
LXX.

omnia omnino animalia adeoque hominem ipsum non ex Ovo in Utero à semine, (ut Aristoteles) aut ejus virtute, (uti Harveus insinuare videtur) efformato, sed ex Ovo ante coitum in mulierum Testibus existente originem sumere: quod, quia primâ facie paradoxum videtur, ita quoque risum excitabit multis, & tamquam falsum rejicietur ab iis, qui nil nisi quod ipsi sentiunt rectum putant: at mirari desinent nec risum edent, nisi levitatis ac stultitiæ insimulari velint, donec perlectis verbis, rationibus & experimentis librat, rem ita contingere posse didicerint: quod ut felicius eveniat, observandum, primo, omnia animalia vivipara dicta, non minus quam ovipara Ovaria plurimis ovis scatentia in se continere. Secundo, Ova illa eâdem ratione fecundari, & ad uterum pertingere, ut in avibus: quemadmodum plusquam probabile apparebit iis, qui
pe-

penitiùs oviparorum partes geni-
 tales examinaverint; nam ut ovi-
 ductus extremitas in membrano-
 sam expansionem terminatur in a-
 vibus, ita quoque tubæ Fallopi-
 næ terminantur in quadrupedibus: Tabul.
XVIII.
Hfl.
 & ut oviductus allabentia è calici-
 bus vitella in avibus excipit, ita Tab. xv.
& xx.
FF.
 quoque tubarum expansio in qua-
 drupedibus è folliculis expulsa ova
 recipit. Quæ ut clariora evadant,
 notari debet, Ova è testibus expelli,
 quoties masculino semine irradiata,
 brevè post coitum fœcundum inter
 eorum tunicas glandulosa quædam
 substantia excrescit, quæ ovum
 tam diu comprimit, donec per pa-
 pillam in extrema folliculi super-
 ficie conspicuam erumpat: idque
 vel citius vel tardius prout ani-
 malia longiori aut breviori tempore
 uterum gerunt. Ova hâc ratione
 è testibus propulsa necessariò in ab-
 dominis cavum deciderent, nisi
 Tubæ Fallopianæ inexplicabili, aſt
 visibili tamen modo ova illa exci-
 perent,

perent, & ad uterum deducerent :
visibili inquam, quandoquidem li-
lud sæpius conspeximus, cujus rei
Testes citarem plurimos nisi sola
autopsia, quâ idem indies demon-
strare possum, sufficeret. Quales
autem mutationes Ova illa in ute-
ro de die in diem subeunt, paucis
adjunxi; quæ omnia cum etiam in
Vaccis, Ovibus & aliis animalibus
copiose à me dissectis observentur,
quis non admittet, in mulieribus,
quæ etiam Ova in Testibus & tubas
utero annexas ut bruta animalia
obtinere, generationem eâdem ra-
tione contingere: eoque facilius,
cum videamus varia animalia re-
periri quæ tum ova tum fœtus in-
tra se pariunt, unde tum ovipara
tum vivipara censentur, qualia
sunt, referente Fabricio ab Aqua-
pendente inter pisces quæ ab Ari-
stotele cartilaginea appellantur,
Squatina, Raia, Canis seu Galeus
piscis, vulgo Venetiis Asiarius di-
ctus & inter serpentes Vipera.

Nec tamen sibi imaginentur in mulieribus & quadrupedibus Ova duriori cortice obvolvi, quandoquidem illa non sit de essentia ovi, & plura reperiantur ova quæ duriori cortice destituuntur quam quæ illâ investiuntur; quemadmodum serpentum, ranarum, piscium aliorumque animalium Ova examinantibus facile innotescet. Neque putent in Mulieribus, & ceteris viviparis, isto quo in Gallinis modo (ut quidem Harveus est auctor) per unum aut alterum diem viro commissis omnia omnino Ova fœcunda reddi; nam ne quidem in omni avium genere id contingere certum est, in quorum aliis duo, in aliis tria, in aliis quatuor, in nonnullis decem & plura Ova simul fœcundantur & ab iis excluduntur. Mulieres vero (quamquam & ipsæ plura in ovariiis ova contineant) plerumque tamen in nostris regionibus unum tantum Ovum masculino semine irradiatum

De gener. animal. exerc. 5.

De Her-
maphrod.
lib. 1.
cap. VIII.

tum è testibus in Uterum expel-
lunt, licet plura simul eodem
coitu irradiari sine miraculo pos-
sint; uti ejus rei exempla quam-
plurima apud Casparum Bauhi-
num leguntur, ubi nunc tres nunc
quinque nunc decem & plures fœ-
tus uno partu reperies editos;
quod in canibus, felibus, cuniculis
& aliis admodum familiare est:
sed notatu dignum occurrit, in il-
lis ordinario tot folliculos in testi-
bus existere quot fœtus aut Ova in
utero, & nunquam in utero plures
fœtus adesse quam folliculos in te-
stibus; ita ut ex testibus solis fœ-
tuum in utero existentium nume-
rum dignoscere valeamus. Sed hoc
ad risum qui ex propositione nostra
de Mulierum Ovis suboriri posset
aliquantulum compescendum suf-
ficiat: oportet etiam ad malevolo-
rum quorundam calumnias fræ-
nandas ostendam necessarium esse
ut Partes Genitales describantur;
siquidem nulla pars est quæ his aut
illis

illis morbis non infestatur aliquando, quorum curationi Medicus impar existit, qui illarum partium situm atque naturam ignorat; cum itaque partium Genitalium historia hætenus à nemine satis accuratè pertractata fuerit, quis non videt plurimos Medicos in partium illarum morbos non rectè cognitos pertractando hallucinatos fuisse: quemadmodum Hippocrates satis insinuare videtur, dum dicit: Sed De morb. mul. lib. 1. text. 87. *& Medici simul peccant non exactè causam morbi percunctantes, sed veluti viriles morbos sanantes, & multas novi jam ab hujusmodi affectibus corruptas, quare statim causam interrogare oportet: multum enim differt muliebrium, ac virilium curatio.*

Quæ cum ita sint, ignoscent mihi facilè scrupulosiores animi quod illarum partium accuratiorem descriptionem propriis suis appellationibus molitus fuerim; siquidem necessitati parendum sit: id quod


C. Celsus ubi de obscenarum partium vitiis agit, prælusione utens, graphicè satis edisserit his verbis: Proxima sunt ea, quæ ad partes obscenas pertinent: quarum apud Græcos vocabula & tolerabilius se habent, & accepta jam usu sunt; cum enim omni ferè Medicorum volumine atque sermone jactentur: apud nos foediora verba, ne consuetudine quidem aliqua verecundius loquentium commendata sunt: ut difficilius hæc explanatio sit, simul & pudorem, & artis præcepta servantibus. Neque tamen ea res à scribendo detertere me debuit. Primum ut omnia, quæ salutaria accepi, comprehenderem: dein, quia in vulgus eorum curatio etiam præcipue cognoscenda est, quæ invitissimus quisque alteri ostendit.

Nemo itaque agrè feret quod Clarissimorum illorum virorum vestigia insecutus, partes illas non
ut

ut illecebrarum ac libidinum & voluptatum incentiva, sed melioris sui ipsius notitiæ gratiâ in Reip. Medicæ commodum descripserim: eâque de causâ cum eximio Theologorum Augustino dicam: quisquis ad has literas impudicus accedit, culpam refugiat, non naturam: facta denotet suæ turpitudinis, non verba nostræ necessitatis, in quibus mihi facile pudicus & religiosus lector vel auditor ignoscet . . . quia non damnabilem obscœnitatem commemoramus, sed in explicandis, quantum possumus, humanæ generationis affectibus, verba tamen obscœna devitamus.

Vale itaque amice, Lector, atque conatus meos non sine labore & sumptu adornatos, tibi que gratis oblatos, candido & benevolo (quo illos conscripsimus) animo, castoque pervolve.

I N
TRACTATUM NOVUM
D E
MULIERUM ORGANIS
GENERATIONI INSERVIENTIBUS
EXPERTISSIMI VIRI
REGNERI DE GRAAF
Medici & Anatomici fe-
licissimi.

 Nclyta Naturæ quoscunque volu-
mina tangunt,
Et recreant artis dogmata docta
novæ;
Huc veniant, aususque legant vel Apolline
dignos,
Invenient *Comitem* composuisse Dei.
Ne titulus tantum noceat, novitasque tenoris :
Non hic falsa suo Leda dat ova Jovi :
Nec timeant juvenes, lascivia nulla docetur,
Non levis obscœnum pagina pandit opus.
Accedatque senex, & adhuc, quod discat, ha-
bebit,
Nam liber hic solidâ se gravitate tegit.
Sola argumentis rerum Natura patebit,
Lausque creaturis summa Creator erit.
Hic sua mortalis primordia ducat ab ovo :
Materiem infelix cur tumefiat habet.

Inventum laudet, credat, miretur & æquis
Quadrupedem volucris conditione frui.
Mira fides! en, lector, ovem spectabis in ovo,
En vitulos ovum continet, ova leas.
At tibi (cui tantum natura regeffit, ut ipsam
Ingenio possis conciliare tuo)
Dextera honoratum peperit dexterrima no-
men,
Maximaque annatomes fama labore venit.
Est data de quercu servato cive corona,
At te defecto laurea cive manet.

EPIGRAMMA

AD

C O S M U M I I I.

Magnum Etruriæ Ducem.

Inclyte Dux Medices, medicæ dux optimus
artis
Submittit genio seque librumque Tuo:
Define mirari cur Te cupit esse patronum,
Dux novus est, veteri tunc opus ergo duce
est.

P. V. BORSELEN.

INDEX

INDEX

CAPITULUM.

| | |
|---|--------|
| Cap. I. <i>Propositio dicendorum.</i> | Pag. 1 |
| Cap. II. <i>De Pudendo Muliebri.</i> | 7 |
| Cap. III. <i>De Clitoride.</i> | 16 |
| Cap. IV. <i>De Nymphis.</i> | 29 |
| Cap. V. <i>De Hymene.</i> | 35 |
| Cap. VI. <i>De Meatu Urinario.</i> | 64 |
| Cap. VII. <i>De Vagina Uteri.</i> | 74 |
| Cap. VIII. <i>De Utero.</i> | 91 |
| Cap. IX. <i>De Fluxu Menstruo.</i> | 124 |
| Cap. X. <i>De Ligamentis Uteri.</i> | 142 |
| Cap. XI. <i>De Vasis Preparantibus.</i> | 156 |
| Cap. XII. <i>De Testibus Mulierum sive Ovariis.</i> | 171 |
| Cap. XIII. <i>De Semine Muliebri.</i> | 194 |
| Cap. XIV. <i>De Vasis Deferentibus Mulierum sive earum Oviductibus.</i> | 220 |
| Cap. XV. <i>De his quæ Ovo in Utero accidunt.</i> | 262 |
| Cap. XVI. <i>Cuniculorum Generationem complectitur.</i> | 308 |



Regnerus De Graaf
Delphis Medicinæ Doctor



Portrait of John Quincy Adams, President of the United States.

MULIERUM ORGANIS
GENERATIONI INSER-
VIENTIBUS.

CAP. I.

Propositio Dicendorum.

CUM sedula rerum natura-
lium investigatio ad con-
scribendum Tractatum de
Mulierum Organis Genera-
tioni inservientibus, luculentam no-
bis materiam suppeditasset, de ordine
quo illam proponeremus solliciti,
aliorum Hysterotomicorum scripta
consuluimus; sed adeò à se invicem
discrepantia illa invenimus, ut ex iis
communem aliquem ordinem Orga-
na illa pertractandi colligere neuti-
quam potuerimus.

Aliqui enim cum *Vesalio*, ab ipso
Utero, tanquam parte primariâ, &
cui reliquæ omnes famulari videntur,
exordium sumunt. Alii cum *Lauren-*

tio harum partium descriptionem à Vasis Præparantibus ac Testibus inchoant ; quatenus illa prima generationis principia advehunt , hi verò ea ad maiorem perfectionem perducunt. Alii cum *Spigelio* à Partibus exterioribus, utpote quæ primum sese dissecantium oculis exhibent, & à quibus actus veneris inchoatur, incipiunt.

Cum itaque cuique liberum sit, ac parum referat, quo ordine quis illarum partium descriptionem molietur, nos cum *Spigelio* ab externis auspicabimur, & per eas tanquam viam regiam ad interiores progrediemur. Quod ut rectè contingat, ad præcavendam rerum & verborum confusionem, quæ plerumque ex variantibus Anatomicorum opinionibus oriri solet, illarum partium divisiones aliquot præmittemus.

Vesalius enim, ut ab Anatomicorum exordiar maximo, Uterum partitur in Fundum, & Cervicem. *Spigelius* verò eum dividit in Cervicem,
Oscu-

Osculum, & Fundum. *Laurentius* autem eum distinguit in Fundum, Os uteri internum, Collum uteri, & Pudendum; cum quo in partitione conveniunt *Pinaeus* & *van Horne*; licet partita ejus membra aliter nominare voluerint. Nec ab his multum declinare videtur *Veslingius*, qui eum dividit in Fundum, Cervicem, & Vaginam, cujus extremum, inquit, muliebri Pudendum est.

Quàm varia sit *Uteri* nominis usurpatio, ex discrepantibus horum *Autorum* divisionibus nemini non innotescit.

Nos autem, qui accuratam omnium partium generationi inservientium historiam proponere decrevimus; has & alias *Uteri* divisiones e.g. in Partes organicas & similes, simplices & compositas, &c. lubens præteribimus; quandoquidem his, nec non brevitati temporis, præsentī hāc nostrā divisionis tabulā consuluerimus.

| Genitales Mulierum Partes | |
|---------------------------|---|
| Externæ | <ul style="list-style-type: none"> Rima, Labia duo, Mons Veneris, Clitoris, Nymphæ duæ, Meatus urinarii exitus, Vaginæ orificium. |
| Internæ | <ul style="list-style-type: none"> <ul style="list-style-type: none"> Secundariæ <ul style="list-style-type: none"> Tunicæ { Propria, Communis. Venæ & Arteriæ { Spermaticæ, Hypogastricæ, Pudendæ. Vasa Lymphatica. Nervi { Sexti paris, Ossis sacri. Ligamenta { Lata, Rotunda. Tubæ Fallopianæ. { Dextra, Sinistra. Primariæ <ul style="list-style-type: none"> Uterus. { Fundus, Cervix. Vagina cujus pars { Anterior, cui vesica incumbit, Posterior, cui intestinum adjacet, Superior, in quâ cervix propendet, Inferior, quæ pudendis annectitur. Testes { Dexter, Sinister. |

TABULA PRIMA,

Mulierum Partes Genitales è corpore exemptas, & in situ naturali collocatas exhibens.

A A. *Arteria Magnæ truncus.*

B B. *Venæ Cavæ truncus.*

C. *Vena Emulgens sive Renalis dextra.*

D. *Vena Emulgens sive Renalis sinistra.*

E. *Arteria Emulgens sive Renalis dextra.*

F. *Arteria Emulgens sive Renalis sinistra.*

G G. *Renes.*

H H H. *Uretheres abscissi.*

I. *Arteria Spermatica dextra.*

K. *Arteria Spermatica sinistra.*

L. *Vena Spermatica dextra.*

M. *Vena Spermatica sinistra.*

NN. *Arteriæ iliacæ.*

OO. *Venæ iliacæ.*

PP. *Rami Arteriæ iliacæ interni.*

QQ. *Rami Arteriæ iliacæ externi.*

RR. *Rami Venæ iliacæ interni.*

SS. *Rami Venæ iliacæ externi.*

TT. *Arteriæ Hypogastricæ ad uterum & vaginam delatæ.*

VV. *Venæ Hypogastricæ dictas arterias concomitantes.*

XX. *Arteriæ Hypogastricæ rami ad vesicam urinariam tendentes.*

YY. *Venæ Hypogastricæ rami ad vesicam delati.*

ZZ. *Arteriarum Umbilicalium portiones.*

a. *Uteri fundus communi tunicâ obvolutus.*

bb. *Ligamenta Uteri Rotunda, prout ejus fundo committuntur.*

cc. *Tubæ Fallopianæ in situ naturali.*

dd. *Tubarum Fimbriæ.*

ee. *Tubarum Foramina.*

ff. *Testiculi in situ naturali.*

g. *Intestini Recti portio.*

h. *Uteri Cervix communi tunicâ (ut vasa melius conspiciantur) denudata.*

i. *Vaginæ Uteri pars anterior, à vesicâ urinariâ liberata.*

k. *Vesica urinaria contracta.*

ll. *Vasa Sanguinea per vesicam excurrentia.*

m. *Musculus Sphincter collum vesicæ constringens.*


n. *Clitoris.*


oo. *Nymphæ.*

p. *Meatus urinarius.*

qq. *Labia Pudendi.*

r. *Vaginæ Orificium.*





C A P U T II.

De Pudendo Muliebri.

GEnitales Mulierum partes aliæ sunt Internæ, aliæ Externæ. Externæ dicuntur, quæ citra dissectionem conspiciuntur, aut quæ post aliqualem partium diductionem vel dilatationem in conspectum prodeunt.

Quæ citra diductionem sese omni tempore examinantium oculis exhibent, sunt Fissura magna, Labia, Monticuli, & Pili: quibus adjungere possumus Pubem & Perinæum. Quæ omnia *Pudendorum* nomine indigitari possunt, propterea quod importuno tempore & loco detecta, mulieribus pudorem adferre soleant.

Fissura magna apud *Galenum* Cunnus vocatur, vel à forti cunei impressione, vel potius κύνε à κύνει quod est concipere. Apud *Hippocratem* etiam Natura legitur. Dicitur & Vulva à valvis: vel (ut quidam opinantur) à volendo; eo quod insatiabiliter coitum

tum velit, atque desideret, secundum illud Proverb. cap. 30. *Tria sunt insaturabilia ... Infernus, & os vulvæ, & terra.* Romani etiam partem illam, Porcum appellarunt, quod aliqui factum judicant, cum in festo nuptiali porcum immolare solerent, aut quia illo vocabulo significare vellent, quòd fœmina instar scrofæ fœcunda esse deberet: eodem porrò nomine *Aristoteles* Naturam muliebrem χοῖρον Porcum vocat, unde verbum χοιροπολεῖν, quod est porcum vendere, sive quæstum corpore facere. Alii denique, qui verborum lusionibus delectantur, partem illam Saltum, Hortum, Fundum, Arvum genitale, Concham, Larvam, Canem, imò quandoque Scissuram nominarunt: propterea forsan, quòd inter homines multa paret schismata atque divisiones: nam, teste *Horatio*,

Fuit ante Helenam Cunnus teterrima belli

Causa.

Puden-

Pudendum muliebre, cujus nomina jamjam recensuimus, unicum ac simplex est; quàmvis *Licetus* & alii, præter communem Naturæ ordinem, illud quandoque duplex observaverint.

Situm est extrinsecus intra ossium Pubis & Ani regionem, & similem cum membro virili locum obtinet, scilicet in imi ventris regione: ut coitus tanto facilius peragatur, & ut naturalia corporis excrementa tanto commodius absque aliarum partium defœdatione expellantur.

Primaria pars, quæ hic nobis perlustranda examinandaque venit, Rima sive Fissura magna dicitur: quia ab ossium Pubis inferiori parte ad Anum usque ferè pertingit; ita, ut inter illam & Anum spatium, quod Perinæum sive Interforamineum appellatur, vix pollicis transversæ latitudinem excedat. Hæc sæpius repetito coitu, ob labiorum frænuli depressionem, grandescit; & magis adhuc fre-

quentiori partu, ob partium extensionem, dilatatur.

Ratio verò cur Natura tam amplam Fissuram in mulieribus ordinaverit (quæ scilicet ipsius Vaginæ orificium plus quàm duplo superat) primaria videtur: quia externa cutis ad dilatationem non tam idonea existit, quam membranacea pars, ex quâ interna illius Fissuræ substantia componitur: Natura igitur sui admodum sollicita, difficultati, quæ parturientibus suboriri poterat, prudenter prospiciens, tam amplum aditum efformavit.

Ufus hujus Rimæ est, canalis modò, Penem tanquam in fossam dirigere, urinæ aliisque corporis excrementis exitum præbere, & fœtus exclusioni inservire.

Fissuræ hujus circuitus, genitalis muliebris Ambitus à *Celfo* appellatur, nos tamen malumus cum aliis Anatomicis ejus parietes sive latera Vulvæ Labia seu Labra indigitare: quorum
cutis

cutis inferior ligamentosa, Frænum labiorum dicitur, quod in virginibus tensum, in puerperis laxatum plerumque conspicitur. Frænuli hujus laxitas, summaque depressio vel abolitio, inter alia, perditæ virginitatis signum quodammodo exhibere creditur.

Labiis illis proximè adest spatium illud inter duo inguina medium, ubi pili Pudendorum primis adolescentiæ annis prorumpunt, quod Pubes dicitur, propterea quod ibi pubertatis signum primum appareat: erumpunt enim pili circa decimum-quartum ætatis annum: *Cum ratio firmior (ut inquit Theodoretus serm. 3. de provid.) vitium à virtute discernit, Natura velamentis naturalibus eas corporis partes prospexit, ob quarum denudationem homines quam maximè erubescere solent.*

Ufus Pilorum est, partem velare, & ab externis injuriis præservare; cui tamen Naturæ beneficio Italicæ, & Orientales fœminæ illarum partium nitorem

nitorem atque elegantiam præponentes, arte sibi, ut inutiles, Pilos illos evellunt.

Pubis autem superior pars præ reliquis nonnihil eminentior & crispior, Veneris Mons, nominatur, quem in Veneris castris militaturi omnium primò conscendere debent.

Externa Monticulorum substantia cutis est; interna verò, cujus beneficio ita attolluntur, maximâ sui parte pinguedo est, cujus copiâ in junculis præsertim, Monticulos illos seu molliuscula Veneris pulvinaria constituit; ne scilicet utriusque sexus ossa Pubis in coitu ad invicem illisa, dolore Veneris actum interturbent: inserviunt præterea, ut Rima melius claudatur, & partes internæ ab externis injuriis melius muniantur.

Monticulorum pinguedini subjectus est musculus à Sphinctere podicis ad Inguina protensus, qui non ad Vulvæ labia, sed ad Vaginæ orificium constringendum (ut infra demonstrabi-


strabimus) destinatus est; hinc etiam-
num patet Pudendi labia motu vo-
luntario minus prædita esse, quàm
in equis aliisque animalibus, quæ illa
pro libitu movent.

Hæc de partibus genitalibus citra
diductionem conspicuis summatim
dicta sufficiant; nunc externarum re-
liquæ nobis recensendæ veniunt, quæ
minimè sine prædictarum dilatatione
comparent: sed disjunctis ab invicem
Pudendi labris, in conspectum se-
se offerunt: ut Clitoris, Nymphæ,
Meatus Urinarius, & Collum Vaginæ,
quæ singula singularibus suis locis
pertractabimus.

TABULA SECUNDA

Repræsentat Pudendum muliebre.

- A. *Glans Clitoridis.*
- B. *Præputium Clitoridis.*
- C. C. *Nymphæ.*
- D. *Meatus urinarii exitus.*
- E. E. E. *Vaginæ orificii coarctatio pro-
ut eam in virgine 24. annorum
invenimus.*
- F. *Vaginæ orificium modicè dilata-
tum.*
- G. G. *Labia Pudendi à se invicem di-
ducta.*
- H. *Frænulum Labiorum.*
- I. *Perinæum.*
- K. *Ani pars.*
- L. *Pili Pudendi.*



CAPUT. III.

De Clitoride.

PAtefacto communi partium internarum aditu, prominet in superiori Pudendi parte, teres & glandiforme corpusculum, Græcis κλειτορίς dictum, ab obscæno verbo κλειτορίζειν, quod hanc partem lascivè fricare ac contrectare significat.

Hujus inventionis gloriam sibi arrogandam *Fallopious*, eandemque sibitribuendam *Columbus* arbitrati sunt: quanquam illa veteribus non fuerit incognita: *Hippocrates* enim ob similitudinem *Columellam*; *Avicenna* pari ratione *Albatram* seu *Virgam* vocat; *Albucaſis* Amoris dulcedinem; alii *Oestrum veneris*, *Libidinis sedem*, ac *Irritamentum* nuncuparunt; propterea quòd nulla Pudendi pars in congressu majori delectationis sensu afficiatur, aut mulieres in *Venerem* magis, quam illa, exagitet. Cæterum demonstrat *Riolanus Anthropol.* l. 2. cap.

cap. 35. Clitoridem veteribus Anatomicis *Nymphæ* nomine cognitam fuisse; ne tamen particulam hanc cum Nymphis postmodum describendis confundamus, eam semper *Clitoridis* nomine indigitabimus, cui tamen adscribenda volumus ea, quæ Veteres de Nymphâ nobis tradiderunt.

Summopere mirati sumus quosdam Anatomicos, non majorem hujus partis mentionem facere, ac si in rerum Naturâ non existeret; quandoquidem illam in omnium mulierum cadaveribus hætenus à nobis dissectis visu tactuque satis perceptibilem offenderimus; in aliis tamen minor, in aliis major existit, nam pro ratione ætatis aut vitæ magnitudine multum variat, & admodum inæqualis est; in virginibus enim usque ad decimum sextum circiter annum leviter tantum prominet, idque præsertim in iis, quæ particulam illam non multum agitarunt; contrarium verò contingit in iis, quæ sive ignorantes parvu-

lę, siue lascivientes adultę frequenter hanc partem contrectaverunt; ut & in adultioribus, iis præsertim, quę peperere, aut virum passę sunt.

In vivis ac mortuis magnitudinis illius diversa ratio habenda est; in his enim spiritibus dissipatis concidit & minor evadit, in illis verò, cum omnia calore ac spiritu turgeant, majorem semper reperies.

Magnitudo tamen naturalis, siue ea quę ut plurimum in mulieribus observatur, Uvulę non relaxatę magnitudinem ferè obtinet.

Extraordinario Naturę lusu in adultioribus observavimus Clitoridem instar digiti internodii propendere, ita ut absque labiorum diductione, aut crurum divaricatione facillimè conspiceretur; præternaturalis illius partis magnitudinis exemplum longè manifestius præterito anno nobis exhibuit Infans, cujus Clitoris tantam cum membro virili similitudinem referebat, ut cum obstetrice unà vicinę mulie-

mulieres, ac peritiores alii illum masculinum judicaverint, & masculino Nomine in baptismo insigniri jusserrint: hanc tamen Naturæ fraudem detexit post mortem accurata harum partium dissectio, cujus historiam infra trademus, atque illius partes tam internas, quàm externas ad vivum delineatas exhibebimus. *Plazzonus* pariter refert se vidisse Clitoridis partem externam in tantam magnitudinem productam, ut quatuor digitorum longitudinem æquaret: simile exemplum se observasse jam pridem nobis testatus fuit unus ex primariis hujus civitatis Medicis; idem quoque à se observatum refert *Riolanus*. *Schenckius lib. 4. obs.* narrat se Hagenoæ in Muliere nobili Clitoridem depræhendisse minimo digito longam, quæ augebatur & intendebatur, quotiescumque rebus venereis indulgebat; quale quid etiam observavit *Tulpius*. Visa est *Platero obs. lib. 3.* in quâdam muliere collum an-

ferinum crassitie & longitudine adæquasse.

Præternaturalis Clitoridis magnitudo deformitatem, pudorem, atque molestiam summam mulieribus ordinariè procreat, quatenus vestimentis inter ambulandum, aut domestica munia obeunda attritus, ita eas ad libidinem irritat, ut quasi dementiæ captæ volentes nolentes in viri amplexum ruant; imò, quod horribilius est, virorum ad instar cum aliis mulieribus coëant, ac mutuis coitibus tam incubis, quam succubis sese polluant; unde *Mart. de Bassa* tribade:

Commenta est dignum Thebano ænigmate monstrum,

Hic ubi vir non est, ut sit adulterium.

nam

Inter se geminos audet committere Cunnos,

Mentiturque virum prodigiosa Venus.

Plura Fricatricum exempla legere si quis

quis desideret, adeat *Leonem Africanum*, peregr. lib. 3. *Arresta Paponis* lib. 22. tit. 7. arresto 2. *Amatum Lusitanum* cent. 7. cur. 18. *Schenckium* & alios.

Ceterum quo magis excrescit Clitoris, eo magis coitum impedit, ea enim præter modum turgens, instar Priapi, hortum muliebrem à virili impetu tuetur: quam ob rem conductis ad id provectioris ætatis feminis illam exurunt Orientales mulieres: & Ægyptii hanc Pseudovirgam nupturis virginibus excindere consueverunt: quin etiam partis hujus circumcisionem Æthiopibus usitatam rentur *Bellonius*, & *Paulus Jovius*: modum verò amputandi tradunt *Aëtius* & *Ægineta*, estque hujus partis Chirurgia Orientalibus mulieribus tam necessaria, quam decora.

Clitoridis pars externa eadem membranâ tegitur quâ Pudendi labia, quæ in superiori Fissuræ parte angulo acuto juncta productionem

membranofam & corrugatam conftituunt, quę membrana ob fimilitudinem & ufum quem cum virili præputio obtinet etiam Clitoridis Præputium appellatur. Magnitudo hujus præputii aliquando tanta observatur, ut flacceſcentem Clitoridem omnino tegat.

Reliquæ Clitoridis partes, quia in pinguiori Pubis regione latitant, ideo Anatomicos, inquit *Fallopius*; etiam latuerunt: ne tamen earum cognitio, quę artificioſa (ut teſtatur *Laurentius*) ſeſtione indiget, nobis etiam lateat, ſingulas examinabimus, inter quas noſtro indicio primum locum obtinent duo corpora nervoſa ſive capſulę oblongę, quę nervoſa quãdam membranâ undiquẽ inveſtiuntur. Originem ducunt ab inferiore parte oſſium Pubis, diſtincto à ſe invicem principio, & utrimque ſub oſſibus illis obliquẽ delata, in unum cœunt corpus, & tertium illud efficiunt, quod ſuperiori parte commiſſurę

furę ossium Pubis membranaceâ quâdam substantiâ firmissimè annectitur, quâ mediante Clitoridem, & per eam totum quasi Pudendum suspendit, ac impedit quo minus ejus partes concidant: non tamen ita duo corpora nervosa tertium Clitoridis corpus constituunt, quin interventu cujusdam membranę, quam Septum appellamus, pars ejus dextra à sinistrâ dividatur, eâdem fere ratione, quâ illud in membro virili contingere descripsimus. Tertio huic corpori in anteriori parte apponitur Glans cum Præputio statim descripto.

Substantia Clitoridis non est ossea, qualem in Veneto scorto ab amicis suis observatam scribit *Bartholinus observ. cent. 3. hist. 69.* sed ejusdem constitutionis, ac Penis virilis; ut similiter, dum necesse est, intendi atque laxari possit: differt tamen à Membro virili, si totam ejus fabricam consideres. Primò, quòd partes ejus bifurcatę duplo longiores sint,

B 4

quàm

quàm conjunctę; in Pene verò partes conjunctę quadruplo longiores sint bifurcatis. Secundò, quòd nullam, ut Penis, Urethram vel similem canalem habeat. Tertiò, quòd glans ejus non perforetur ut in viris, sed cęco tantum foramine, virilem quasi glandem mentiatur. Differt præterea magnitudine à virgâ virili; nam Clitoridis spongiosa corpora naturaliter constituta (licet flatu, aut aliquo liquore siphonis beneficio distendantur) vix unquam simul juncta crassitie minimum adæquabunt digitum.

Musculos Clitoridi annexos esse unanimi consensu tradiderunt omnes, qui illius descriptionem moliti sunt: de eorum tamen numero multùm inter se differunt: alii namque duos, alii vero quatuor enumerant: nos autem judicamus duos illos musculos, qui ab ossibus Coxendicis oriuntur, & supra ejus crura excurrunt, iisque implantantur, Clitoridi omnino adscribendos esse, eorumque musculo-

rum usum existimamus, suâ contractione Clitoridis crura comprimendo, tertium ejus corpus cum Glande magis distendere.

Aliud musculorum par, quod Clitoridi à plerisque adscribitur, à Sphinctere podicis lato principio ortum retro Pudendi labra intra Clitoridem & Plexum retiformem perrepans, Clitoridi ita annectitur, ut illud contrahendo Vaginæ orificio potius, quam erigendæ Clitoridi destinatum judicemus.

Vasa Clitoridis quod attinet, ea sunt Arteriæ, Venæ, & Nervi: quorum duo priora à Pudendis, & Hæmorrhoidalibus; posteriora à Sextæ conjugationis trunco originem ducunt. Communicantur verò Clitoridi vasa à Pudendis orta, ubi duo ejus ligamenta sive crura coëuntia, tertium ejus corpus constituunt; supra cujus dorsum aliquantulum primò exspatiantur, deinde ad latera ejus descendunt, & reliquas Pudendi

partes adeunt, emittendo tantum exiguos quosdam ramulos ad internam Clitoridis substantiam.

Notandum hic Nervos per Clitoridis dorsum excurrentes admodum magnos esse, & ad omnes Pudendi partes disseminari: Venas verò dextri & sinistri lateris, ut plurimum per anastomoses simul copulari, antequam ad Clitoridis latera descendunt, & ad Plexum retiformem, ac alias Pudendi partes excurrunt; ubi in plures ramos dividuntur, qui rursus innumerabilibus in locis simul copulantur; ita, ut inflato uno ramo omnes ilico intumescant. Inter dextri & sinistri lateris Arterias anastomoses rarissimè observantur.

Ab Hæmorrhoidalibus Clitoridem vasa habere judicavimus, cum inflatâ Clitoride insignia vasa ad Hæmorrhoides descendentia flatu distendi videremus.

Usum horum vasorum est, Clitoridem & reliquas Pudendi partes copioso

pioso sanguine & affluente spiritu intendere; eodem ferè modo, quo vasa Penis ipsum erigere solent.

Ufus Clitoridis est, Pudenda, ne collabascant, sustinere, & torpentem Venerem excitare: Glans enim tam acuto ac perceptibili sensu prædita est, ut non immerito Amoris dulcedo, Veneris OEstrum, &c. appelletur: & revera nisi illæ Pudendi partes tam exquisitissimo delectationis, & tanti amoris sensu præditæ essent, nulla mulier in se suscipere vellet tam molestam novem mensium gestationem, laboriosissimam & sæpe exitialem foetus exclusionem, plenam solitudinibus & curis liberorum educationem.

TABULA TERTIA

Clitoridis varias figuras complectitur.

Figura I. exhibet partem anteriorem Clitoridis.

- A. *Clitoris.*
- BB. *Crura Clitoridis.*
- C. *Glans Clitoridis.*

D. *Præ-*

D. *Præputium Clitoridis.*

EE. *Nympha.*

FF. *Pars periostii mediante quo Clitoridis crura inferiori parti ossium Pubis annectuntur.*

GG. *Musculi Clitoridis.*

HH. *Musculorum pars, quæ ossibus Ischii sive Coxendicis implantatur.*

II. *Nervi.*

KK. *Arteria.*

LL. *Vena.*

} *ad omnes Pudendi partes excurrentes.*

Figura I. exhibet Clitoridis partem posteriorem.

A. *Clitoris.*

BB. *Nympha inverse.*

CC. *Musculi per Clitoridis crura excurrentes.*

DD. *Eorundem musculorum fibrae carneæ, cavitationem quodam modo efformantes.*

EE. *Sphincteris fibrae carneæ, nervosa Clitoridis substantia annexa.*

Figura III. & IV. exhibent Clitoridem diversimodè dissectam.

a. *Clitoris.*

b. *Glans Clitoridis cum suis Nymphis.*

cc. *Spongiosa Clitoridis substantia, septo intermedio à se invicem divisa.*

dd. *Cruris spongiosa substantia nullo septo intermedio divisa.*

fig. I





fig. III




fig. IV



fig. II





C A P U T IV.

De Nymphis.

Eodem apparatu quo ad Clitoridis partem externam examinandam pervenimus, etiam ad productiones sive protuberantias, *πτερυγία* Græcis dictas, progrediemur. Hæ Latinis Alæ & Carunculæ cuticulares dicuntur: mavult tamen *Galenus*, & cum eo in anatomia præstantes Viri protuberantias istas, Nymphas appellare: ea propter quòd aquis è vesicâ profilientibus proximè adstare reperiantur; quandoquidem inter illas, tanquam duos parietes urina magno impetu cum sibilo sæpe & absque labiorum irrigatione erumpat: vel quòd sint castitatis præsides, aut Sponsum primò intromittant.

Sitæ sunt Nymphæ in superiori Pudendi parte incipiendo à Clitoride, cujus glandi licèt angustiori principio, equidem tam firmiter uniuntur,

ut ejus productiones dici possint: nec hoc tantum, verumtamen etiam productionem membranofam corrugatam instar præputii Clitoridem investientem quodammodo constituunt: & accurata harum partium conjunctio proculdubio ansam dedit, quare partes adeò diversæ eodem nomine confundantur: velut infra demonstrabimus.

Descendunt itaque Nymphæ à Clitoride utrimque ad latera Meatus Urinarii, usque ad colli Cervicis medium, ubi sensim evanescunt; adeò ut difficulter earum termini demonstrari possint.

Numero duæ sunt, dextra & sinistra, quæ tamen mediante Clitoridis glande sibi mutuò in superiori parte firmiter uniuntur.

Magnitudo harum partium Clitoridis magnitudinem ut plurimum sequitur, atque proinde multum variat: in virginibus enim, & iis, quæ virum non sunt passæ, sæpe vix pollicis

licis transversa longitudinem habent, imò etiam aliquando tam exiguæ reperiuntur; ut nisi Clitoridem sursum protraxeris, ejus protensiones vix appareant; adeò ut mirum non sit, cur *Riolanus*; in quibusdam Nymphas sæpius defuisse, scribat. In mulieribus verò, & iis, quæ partes has petulcis digitis emulgere ac protrahere consueverunt, aliquando in miram magnitudinem excrescunt, quale naturæ vitium *Ægyptiis* tam familiare est, tantamque molestiam adfert, ut eas excindere cogantur, testibus *Galeno*, *Ægineta* & aliis, quos tamen hæc in re deceptos fuisse opinamur: Nymphotomiam enim appellant partium illarum excisionem, ob quarum nimiam extuberantiam in nupturis virginibus, Sponsus copulâ quandoque frustratur, aut saltem difficulter admittitur; & in conjugatis coïtus cum molestiâ peragitur. Quomodo autem Nympharum excrescentia coïtum impedire possit, non

videmus, quandoquidem tunc mulieres, quæ partes illas ob frequentem Veneris usum majores habent, difficilius cum viris coirent, quam virgines: cujus contrarium tamen quotidiana nos docet experientia; ideoque judicamus per Nymphotomiam Authores Clitoridis, & non Nympharum amputationem intellexisse; quod *Riolanus* pluribus probare nititur. Non solum apud Ægyptios particulas illas, Clitoridis magnitudinem ordinariò sequi solitas, in ingentem molem excrecentes, at in hisce quoque regionibus observavimus, Nymphas illas à Clitoridis regione usque ad infimam Pudendi partem duos digitos latas, & dimidium crassas deformiter extra Vulvæ labia propendere; neque propterea illas difficilius virum admisisse, unquam potuimus intelligere. Contingit etiam aliquando, ut alterutra tantum ita præter Naturam excreseat, aut si sint ejusdem magnitudinis, diversam tamen figuram

ram fortiantur singulæ.

Figura Nympharum naturalis (ea enim sic appellanda est quæ semper, vel ut plurimum observatur) nulli magis accedit quam ovali figuræ secundum longitudinem per medium divisæ, cujus partes inversæ si in unâ extremitate ita jungantur ut partes ovales ad se invicem accedant, duarum Nympharum figuram quodammodo exhibebunt. Ex quibus intelligi potest illas non malè paleari, seu cristis illis, quæ pullis gallinaceis, aut gallinis sub gutture enascuntur, comparari posse; eoque magis, cum in Veneris cestro percitis, eodem rubello colore gaudeant; in demortuis verò eas magis pallidas, & quandoque etiam lividas invenimus.

Substantia harum partium aut externa, aut interna est. Externa similis est illi, quâ vulvæ & oris labia atque interiores nasi parietes investuntur. Interna verò Nympharum substantia, quæ mollis & spongiosa est,

est, ex membranulis & vasis leniter conflata, expansionibus aptissima est: distenduntur verò eodem quo Clitoris modo, quatenus scilicet spiritus animales per nervos, & arteriosus sanguis per Arterias supra Clitoridis dorsum excurrentes copiosius in partes illas influunt; unde aliquando ita distenduntur, ut nisi virili conatu mulieres adjuventur, dolorem, blandioris titillationis loco, persentiant.

Ufus Nympharum est partes internas tueri, Meatum urinarium, & quodammodo Vaginæ orificium, tegere, ne pulvere, frigore, aut aliis externis injuriis lædantur. Inerviunt prætereà Nymphæ ad majorem voluptatis concupiscentiam; quatenus inflatæ, virile membrum comprimendo titillationem adaugeant; hinc forsan à Naturâ ordinatum est, ut post diuturnum Veneris exercitium partium laxitati Nympharum protuberantiâ succurratur, quò
con-

conjugale vinculum tanto potentius permaneat. Præsumunt item profilienti urinæ; & ita effusam dirigunt, ait *Riolanus*, ne in cavitatem cervicis distillet, quod an verum sit, aliis judicandum relinquimus.

C A P. : V.

De Hymene.

IN perscrutandis Naturæ abditis non minimam Hyſterotomicis curam atque difficultatem præbuit Hymenis investigatio: quoniam de eo multum inter se altercantur, atque digladiantur Anatomicorum peritissimi: multi enim illum, si inveniatur, præter Naturæ institutum esse audacter asserunt: Alii verò illum in omnibus, quas secuerunt, virginibus adfuisse stertoreâ voce exclamant; dicentes vel negligentia, vel imperitia aliorum tribuendum esse, si non inveniatur: neque hi adhuc quoad substantiam, situs locum, atque for-

mam illius inter se conveniunt.

Substantiam ejus quod attinet: Aliqui dicunt membraneam esse, ut *Soranus*: alii venosam & ligamento-
sam, ut *Avicenna*: alii circulum car-
neum, ut *Riolanus*: alii tenuissimam
& aranearum telis simillimam, ut
Piccolhominus: alii nerveam non
carneam, ut *Fallopianus*: alii retifor-
mem ex pluribus venis & subtilibus
ligamentis contextam, ut *J. Beren-
garius*: alii admodum crassam, ut
Columbus: alii in junioribus tenuem
ac subtilem, in adultioribus verò
crassiorem & robustiorem, ut *Spige-
lius*, qui Hymenem partim carno-
sum partim nervosum esse statuit.

Quoad situs locum, aliqui eum im-
mediatè post Urethram ponunt, ut
Fallopianus: alii in medio Cervicis ute-
rinæ, ut *Berengarius*: alii in Uteri
collo, non procul ab orificio interno,
ut *Piccolhominus*: alii sub Nymphis,
ut *Coiter*: alii à tergo colli Vesicæ in-
sertionis, paulo ve interius, ut *Vesalius*.

Formam si spectes, plerique uno foramine pertusum esse sentiunt, idque nunc rotundum, nunc oblongum & directè Vaginæ oppositum, superiori aut inferiori loco collocatum observarunt, ut *Aquapendens*: alii Hymenem productionem esse in sinu pudoris ex quatuor carunculis, myrti baccas referentibus totidemque membranis factam volunt, ut *Pineus*, cujus opinionem amplectuntur *Laurentius, Bartholinus, &c.* alii denique membranulam esse cribrum in modum crebris foraminulis perviam tradunt. Hæ sunt de Hymenis constitutione potissimorum Anatomicorum opiniones, quibus ea, quæ nobis in diversis virginum cadaveribus observare licuit adjungemus.

In junioribus ac recèsnatis puellulis inter Nymphas, Meatum urinarium, & Perinæum locum medium tam exiguo foramine pervium invenimus, ut pisum, quamvis minuscu-

lum, difficulter admitteret: cujus conformationem exhibet Tabulæ 4. fig. 1.

Foraminis hujus constitutionem dum examinarem accuratius in puellâ sex annos natâ, illud, ob proVectiorem ætatem, magis dilatatum & in Vaginæ orificii medio membranosis quibusdam rugositatibus circumvallatum offendimus, uti exhibet ejusdem Tab. fig. 2.

Quibus perspectis immissâ in foramen forfice, anteriorem Vaginæ partem dissecuimus, & conspeximus foramen illud in Vaginæ orificii medio ex membranosâ ejus coarctatione originem sumere, prope ejus ortum quàm in medio crassiorẽ existere, Vaginâ ipsâ satis amplâ ac latâ permanente. uti videre est ejusdem Tabulæ fig. 3.

Cum non opus sit foramen illud in cujuscumque ætatis filiabus figillatim hîc describere, lubet tamen ea, quæ cum Clarissimo Professore

L. Schacht

L. Schacht in filiâ 24 circiter annos natâ observavimus, hîc adjungere: ex quibus Vaginæ orificiî in reliquis puellis conformationem unusquisque facîle pro ratione ætatis demeriri poterit.

Diductis à se invicem Vulvæ labris in inferiori Pudendi parte altum conspeximus frænulum, pauloque interius membranosas rugositates circum Vaginæ orificium orbiculatim existentes ita dilatatas offendimus, ut membranofus quidam circulus tantum remaneret: uti exhibet Tab. 2. quem virile membrum absque dilaceratione subire neutiquam potuisset.

Hanc Vaginæ orificiî coarctationem in omnibus junioribus virginibus hætenus à nobis dissectis satis clarè conspeximus, magis ac minus, prout magis ac minus nobiles existent, quæ enim sunt admodum maturæ, haud tantam habent, quantam tenellæ, coarctationem: atque prop-

terea in primo coitu non tanto afficiuntur dolore, nec tam frequenter sanguinem emittunt, quam juniores, in quibus coarctatio illa plerumque tanta existit, ut, cum fortiori Priapo dilatari satis nequeat, dilaceretur, in eâque vasorum sanguineorum contextus disrumpatur, quod semper contingere judicamus quotiescumque primus coitus cum dolore sanguinolentus evadit; quamvis *Almansor* & alii à disruptis venulis & arteriolis Vaginæ rugas connectentibus illum manare sanguinem existiment: quia Vagina Uteri satis ampla est, nec illius rugæ venulis aut arteriolis inter se copulantur.

Quatuor Carunculas myrtiformes adeò decantatas, cum hætenus frustra quæsierimus, arbitramur proferosque Anatomicos orificii Vaginæ corrugationes seu membranosas inæqualitates nullo certo numero comprehendendas nobis pro veris Carunculis obtrusisse; quæ in parturientibus

bus & post partum ita oblitterantur, ut earum vestigium vel minimum remaneat: unde liquet membranofas illas corrugationes seu inæqualitates, quas pro Carunculis sive carnosiss eminentiis accipiunt, non esse veras Carunculas; quoniam in magnâ Vaginæ orificii distensione, qualis in partu contingit, suam figuram ac molem servarent, aut aliquot saltem earum vestigium remaneret; quod si contingeret, parturientibus magno forent impedimento: quandoquidem asperitate & inæqualitate suâ egredienti foetui tanquam obices resisterent. Hoc nostrum de Carunculis judicium confirmat *Riolanus* anthropog. l. 2. c. 35. cum dicit: *Carunculas illas ex corrugatione carnosæ (puta membranosæ) vaginæ Pudendi conflari, ut pars illa externa angustior ipsâ vaginâ, in partu æquè dilatari possit.*

Descriptis iis quæ circa sinus pudoris conformationem in virginibus observavimus, examinandum venit:

an præter Vaginæ orificii coarctationem statim à nobis descriptam, alia quædam membrana Interseptum virginale sive virginitatis claustrum dicta inveniatur? Aliam membranam reperiri refert *Wierus* de præstigiis Demonum l. 2. c. 38. ubi duas historias adfert, unam de filiâ duodeviginti annos natâ, cui saburra cum ingenti dolore restitit, eâque postea sponte perruptâ copiosus sanguis profusus est. Alteri verò, quæ pro gravida habebatur, novaculâ clausurâ apertâ, supra octo libras sanguinis atrî profluxere.

Item *Hildanus cent. 3. observ. 60.* scribit se in puellâ Coloniensi sedecim annos natâ, multis symptomatibus vexatâ, collum Matricis mediante solidâ validâque membranâ clausum deprehendisse, quam, cum remedia ab ipso proposita respueret, in hacce miseriâ reliquit. Eâdem observatione mentionem facit filiæ Monspeliensis septemdecim annos natæ,

natae, quæ doloribus parturientium non abfimilibus mirum in modum vexata, collum Matricis planè clausum habebat; sanguine menstruali extra vasa sua in Matricis capacitate novem mensium spatio, quasi grvida fuisset, retento: Medicorum ac Chirurgorum auxilio (incisione rectâ, quatuor digitorum transversorum longâ) liberata fuit, effluentibus libris decem aut duodecim sanguinis crassi ac purulenti instar fæcis vini.

Similem ferè casum apud *Benivenium* de abditis morb. causis *cap. 28.* videre licet. ejusdem rei exemplum lectu dignissimum refert *Aquapendens* oper. chirurg. *parte 1. cap. 82.* modum curandi hunc affectum tradit *C. Celsus lib. 7. cap. 28.* *Scultetus tabul. 40. & Severinus cap. 46.* sponte curatum refert *Bartholinus* observ. cent. 5. historiâ 43. Ast tales membranæ seu virginalia intersepta præter Naturam existunt, uti & Vaginæ ori-

orificii coarctatio, si tanta sit, ut nubilis virgo Penem proportionatum admittere nequeat, cujus rei exemplum perhibet *Paræus lib. 23. cap. 42.* ubi ait: *ipsam (membranam) semel tantum licuit mihi observare in virgine septemdecim annos natâ, quam cum mater viro despondisset, sciretque nihilominus ipsi in pudendis subesse aliquid, quod, quominus mater & fecunda esse posset, impediret; rogavit me ut ipsam inviserem. Reperi igitur membranam quandam nervosam, tenuissimam sub nymphis, proximè ad foramen per quod mulieribus urina effluit præ foribus (ut sic loquar) orificii cervicis uteri, medio sed exiguo foramine membranula illa pervia erat, quâ menses disfluere possent. Contemplatus ergo membranulæ illius tenuitatem, ipsam adaëctis vossellis rescidi, quidquid ad reliquam curationem factum esset opus matrem admonui: certè nupsit illa paulo post, & prolem peperit.*

Raro reperiri hanc membranam mecum sentit Realdus Columbus: sub nymphis, inquit, in nonnullis virginibus, non omnibus, alia membrana cernitur Hymen à veteribus appellata, quæ cum adest (raro autem adest) obstat quo minus penis in uterum immittatur: nam crassa est valde supra, vesicam versus, foramine donatur per quod menses fluunt. Addit & hanc se tantum observâsse in duabus virgunculis, & in unâ grandiore. Ex quibus observationibus elicere possumus, membranam Uteri ostium sepientem (si modo reperiat) contra Naturæ intentionem virginibus inexistere, aliàs incisione opus non fuisset, nec impediret ingressum Penis in Uterum. Naturæ namque institutum in creatione fœminæ fuit, illam oportuno tempore interveniente viri copulâ matrem reddere. At verò hæc membrana præ foribus Uteri existens conceptionem ad maternitatem à Naturâ institutam omnino

nino necessariam impedit, cum prohibeat ingressum seminis in Uterum. non inest itaque illa virginibus secundum Naturæ intentionem eoque minus cum rarò adsit; si enim naturaliter virginibus inesset, non rarò sed semper, aut ut plurimum inesset, pro eorum, quæ secundum Naturam insunt consuetudine. Quæ dubio procul ultro nobis concessuri sunt ii, qui Hymenem membranam esse in Vaginæ orificio naturaliter constitutam dicunt, ne tamen hi se nobis opponant, & de nomine quæstionem nobiscum agitent; examinent prius an id, quod Hymenem nominant, à nostrâ Vaginæ orificii coarctatione differat, & cessabit brevi sine dubio ulterior de Hymene controversia, quandoquidem *Casseri*, *Pinei*, aliorumque opiniones levi operâ cum nostrâ reconciliari possint; nam quod hi Carunculas, nos corrugationes seu membranofas inæqualitates, & quod alii carneam aut nerveam ex-

pan-

panfionem, nos membranofam coarctationem dicimus. Quod fi ita eveniat, nemo facile admittet præter hanc Vaginæ orificii coarctationem aliud virginale clauſtrum reperiri: uti nobiſcum ſentire videtur *Valleſius* libro de ſacrâ philoſophiâ cap. 25. Certe (ait) & cujuſvis ſectionis perito conſtare poteſt (quamquam ſunt quidem diſſectores, qui eſſe in ore uteri virginibus membranulam quandam annuli formâ affirmant) nulla pars eſt in uteri ore, aut cervice, quæ virginitatis cuſtodia ſit, & in corruptione pereat. Sed anguſtia tanta, & ſymphysis, ſeu coaleſcentia, & adſtriſtio labiorum tanta, ut ſine dilaceratione partium, quæ ſymphysi coierunt, admittere virile membrum non poſſit. Item *Fernelius* lib. 1. cap. 7. ſcribit enim: Uteri cervicem mediocri progreſſu plerique tradunt in virginibus exili membranâ dirimi venulis conſperſâ, quæ primo concubitu profuſo ſanguine diſrumpi ſolet, unde *Hymen* &

& *Hymeneion* Græce appellatur. At potius censeo cervicis latera nondum venerem expertis duntaxat, quasi conglutinata connivere, quæ primus concubitus magnâ ex parte divellit. Nec non *Riolanus* lib. 2. cap. 35. anthropog. inquit: Peritior factus in rebus *Anatomicis*, commentum *Severini Pinæi Chirurghi Parisiensis*, de istis *Carunculis Hymenem* constituentibus, vanum & fictitium esse deprehendi. Non inficior tamen illam angustiam *Cunni interioris*, quæ fit ab illis carnositatibus, ex reduplicato collo *Uteri* aliquid conferre ad dignoscendam *virginitatem*, & ex illis disjunctis carnositatibus attritis in primo coitu, supra vigesimum annum, præsertim in arctis virginibus, sanguinem stillare posse. Et aliquantulum inferius idem longè manifestius diversis exemplis demonstrat.

Cum itaque præter *Vaginæ orificiî* coarctationem toties repetitam naturaliter nullum reperiatur *virginitatis*

tatis munimentum; quæstio non minus jucunda quàm fructuosa discutienda venit: sc. An illa sit certum virginitatis indicium à Naturâ constitutum: id est signum distinguens virginem à muliere corruptâ venereoque congressui assuetâ, quo posito infallibile habeamus de virginitate argumentum, quo etiam remoto mulierem esse statuamus. Partem affirmativam non parum roborare videtur sacræ Scripturæ textus: Deuteronomii enim 22. cap. extat casus de linteolo cruentato maximè confirmans, dari certum virginitatis signum. verba sunt: *Si duxerit vir uxorem, & postea odio habuerit eam, quæsieritque occasionem, quâ dimittat eam, objiciens ei nomen pessimum & dixerit: Uxorem hanc accepi, & ingressus ad eam, non inveni eam virginem; Tollent eam pater & mater ejus & ferent secum signa virginitatis ejus ad seniores urbis, qui in portâ sunt; & dicet Pater: Filiam meam*

dedi uxorem huic, quam quia odit, imponit ei nomen pessimum, ut dicat, non inveni filiam tuam virginem: & ecce, hæc sunt signa virginitatis filiae meæ, & expandet vestimentum coram senioribus civitatis. Hæc sacra Scripturæ verba, dari certum virginitatis signum, luculenter demonstrare videntur; alioquin seniores populi, an virgo illi desponsata fuisset, judicare non potuissent.

Notandum hic obiter, signa alia propria esse, alia inseparabilia, alia propria & inseparabilia simul. Propria conveniunt uni duntaxat soli. Inseparabilia conveniunt omnibus. Utraque simul omnibus & solis.

Hisce positis dicendum erit linteum illud cruentatum, cujus mentio fit in Deuteronomio, signum quidem virginitatis esse, sed neque proprium, neque inseparabile, adeoque neque certum censi posse.

Probatur primum, quia non solum virgines cruentatum reddunt linteum;

teum; etenim jam corruptæ dolo malo sanguinem coëuntes emittunt, & rerum venerearum tyronibus virginem deflorasse imponunt: ac insuper sine Penis in Vaginam immissione illæsa omnino Vaginæ orificiæ coarctatione quandoque concipiunt, quatenus scilicet Uterus per fibras carneas secundum Vaginæ longitudinem excurrentes deorsum tractus breviori Peni occurrit, & eousque in salacioribus descendit, ut ejaculatum per foramen semen hiantе osculo excipiat: aut quatenus fœcundissimi virilis feminis in Vaginam effusi subtilior aura ad Testes ascendit, eorumque Ova fœcundat: quemadmodum hoc avium generationis modo postmodum describendo clarius evadet. Sed ne rationibus solum vobis id persuadere videamur, quorundam Clarissimorum virorum testimonia hic adjungemus. Refert enim *Riolanus Anthropog. lib. 2. cap. 35. Quamvis nulla fiat generatio*

sine Penis immissione, ex Galeni judicio omniumque Medicorum consensu, nuper tamen vidimus Parisiis mulierem, quæ ex laborioso & difficili partu laceratas habuerat partes genitales, cujus Nympheæ & quatuor Carunculæ tam arctè coaluerant, ut vix specilli cuspidem foramen admitteret, nihilominus decimoquarto abhinc anno concepisse. Intra Pudendi labra effusum semen Uterus hujus pabuli avidissimus attraxit, quemadmodum è profundis cuniculis cervus serpentes narium inspiratu allicit. Cum instaret partus introducto speculo matricis foramen dilatatum fuit in eam amplitudinem, quæ ad egressum fœtus necessaria erat, sicque fœtum perfectum emisit mulier incolumis & superstes.

Exemplum simile visum fuerat Parisiis anno salutis 1609. Mulier imperforata impotentiae & frigiditatis accusat maritum coram judice, quod nondum ab eo quidquam passa fuisset,
cum

cum utriusque partes diligenter inspicerentur, mulier inventa fuit gravida. Clementina 2. quæst. 15. de consang. Refertur in Francia olim imprægnatam fuisse quandam, cujus Virginitatis claustra omnia firma, atque illæsa manserant, adeoque imprægnatam esse virginem non desisse. Historiam facietam reperies apud Fabricium in operat. chyrurg. de Sacerdote, qui percontatus est Fabricium de confessione fœminæ, quæ ex viri amplexu sine Penis intromissione conceperat.

Nec absimilem historiam, refert Henr. à Mœinichen in observationibus Lyseri Cultello Anatomico adjunctis. observ. enim 13. Puella Romana à primo ortu clausa nisi quod exiguum esset foramen vix pisum capiens pro urinæ ac menstruorum egressu, assiduis Amasii precibus commota ipsius libidini nimium dedit, rata nullum conceptionis periculum futurum, quippe cujus vulvæ labia à nativitate conjuncta & unita penem non

admittebant. Cæterum fricationis hujus debitas dedit pœnas, ex ipso præter spem & opinionem gravida facta. Quinto à conceptu mense tumorem puellæ ventrem advertens mater, Jo. Trullium adit, & postquam omnia ipsi exposuisset, opem illius implorat, ne in partu tandem gravius vitæ periculum subiret filia. Dum itaque invisens Trullius cunctis perspectis ac examinatis, unita vulvæ labia sectione dirimit. Ipsa autem debito tempore filium peperit. nec absimile dum Venetiis essem contigit. Unita ab ortu vulvæ labia in tribus puellis Romæ sectione curavi.

Probatur secundum, quia non omnes virgines primo coitu sanguinem emittunt: nam præterquam quòd Vaginæ osculum præ avido coeundi concipiendique desiderio in grandioribus successu temporis dehiscat, ac in junioribus petulco digito vel simulato Priapo dilatetur: fieri etiam potest, Primò, ut menses fluant, vel pau-

paucis ante diebus fluxerint, ex quo genitales partes humectari, & relaxari contingit, sic ut minimo negotio & nullo ferè dolore dilatentur, cedantque subeunti mentulæ potius quàm dilacerentur.

Verùm similes ludificantis Naturæ casus, sponſis sæpenumero occasionem præbuerunt, de invictâ hætenus pudicitia subdubitandi, cujus eventus historias duas verè comicas refert *Pinæus lib. I. de virginitatis notis, cap. 6.* quarum alteram hîc enarrabimus. *Mercator quidam Bigamus à nobis vocatus, quia pro ſecundâ vice matrimonium contraxerat cum virgine eufarcâ ejus vicinâ, duos & viginti annos natâ. Horum autem nuptiæ factæ sunt, cubuerunt simul fluentibus adhuc menſtruis purgationibus, rem ſemel habuerunt, ſed ita facile liberaliter & oportuniè egerunt, ut ex virgine facta ſit mulier, quæ eodem temporis momento concepit, gravidaque ipſa fuit. Poſtridie*

verò nuptiarum Bigamus mane summo surrexit, atque ad merces emendas cum suis sociis rura satis longinqua petiit, nec reversus est ante vigesimum diem. Is dum ruri esset, rerumque suarum satageret, in memoriam sæpius revocabat facilem quum habuerat unicum cum uxore novà congressum, nec omnino suspicione castitatis ejusdem vacabat, quamvis hac de re conqueri unquam non decrevisset: siquidem à longo tempore uxoris amantissimæ & parentum ejus famam audiverat; agnoveratque optimam. Reversus verò domum Bigamus & uxor dormierunt simul, sed rem habere tentarunt frustra istà primâ vice, propter angustius multo redditum quam antea sinus pudoris officium, post fluxionem menstruorum & partium pudendarum exsiccationem. Qui propterea mirari non desinit, contra, plurimum torquetur, & apud amicum quendam conqueritur, dicens se facilius cum uxore dum

virgo

virgo esset, difficilius verò cum eàdem gravidà convenisse. Signa enim graviditatis apparebant inappetentia ciborum nempe, nausea perpetua, decolor facies, membrorum lassitudo & alia. Verum Bigamus mercator & non philosophus erat, nesciebatque istas partes sicut & alia corpora membranosa quæ humectantur plurimum dilatari & extendi posse, & cum exsiccantur, constrictiores & angustiores fieri. Quare virgo corruptam & corrupta ei virginem referebat. Nec mirum hoc cuiquam videri debet: etenim virgines quæ semel tantum aut bis coierunt, idque fluentibus menstruis, verius dilatationem solam, eamque parvam, quam lacerationem simul ullam passæ fuerunt.

Secundò; fieri etiam potest, ut naturalis Vaginæ orificii coarctatio ob defluentium humorum copiam, ita relaxetur, ut in defloratis laxior esse non possit: quemadmodum nobiscum experti sunt ii, qui ad puellarum

uteri prolapsum (in humidioribus hisce regionibus nimis familiarem) curandum, quandoque accersiti fuerunt. Hinc mirum nemini videbitur, si tales virgines ex primo coitu sanguinem non emittant.

Tertiò, non ex eâ partium laxitate tantum, enimverò si annosa & vegeta virgo tenello sponso committatur, utique sanguinem non emit-
tet.

His omnibus ritè perpenſis concludere possumus neque naturalem Pudendi orificii coarctationem, neque linteolum sanguine foedatum, certum & indubitatum virginitatis signum exhibere. Quod tamen citato sacrae Scripturae loco adversari nequaquam videtur, quandoquidem aliqui textus illius verba metaphoricè interpretanda existiment: turpe enim illis apparet, quòd defoedatum ejusmodi linteum coram judicibus expandèretur, nec verisimile esse quòd vir auderet falsò uxorem accusare.

sare, cum sciret parentes ejus virginitatis testimonium asservare: attamen alii verba illa, ut sonant, intelligenda putant, cum hæc consuetudo etiamnum apud Hebræos vigeat, nec non apud Afros, de quibus *Leo Africanus lib. 3. histor. Africae* scribit, apud Fezzæ præcipuæ Mauritaniæ civitatis incolas: quod simul atque sponsus & sponsa ex solempni apparatu sponsalium domum reversi sunt, obferato conclavi, dum nuptiale paratur convivium, pro Hymenæi celebratione simul congregi. Perhibetque annosam mulierem præ foribus expectare: hæc porrectum sibi à sponso, jam marito, cruentatum linteolum in mediam convivorum turbam ovans defert, tanquam raptæ virginitatis spoliū, ac symbolum. Hâcque ratione licherè tum discumbere, tum convivari. At si forte genio fortunâque sinistrâ, illo coitu nihil cruoris sponsæ per genitalia stillaverit, redditur illa parentibus, quibus magnum
inde

inde dedecus. Invitatorum verò turba triftis & impranfa domum revertitur. Eundem apud Romanos quondam invaluiſſe morem, palam teſtificari videntur hi *Claudian* verſus:

*Et veſtes Tyrio ſanguine fulgidas,
Alter virgineus nobilitet cruor,
Tunc victor madido proſiliat thoro
Nocturni referens vulnera prælii.*

idem in Syriâ adhuc obſervari à Syro ſe intellexiſſe ſcribit *G. Blaſius* in commentariis ad caput 7. *Veſlingii*.

Hanc conſuetudinem non in Africa modò & Aſia, verùm in Europâ, præſertim in quibuſdam Italiæ ac Hiſpaniæ regionibus ſervari *Horatius Augeni*us, *Joubertus*, aliique commemorant. Sed quàm fallacia atque ridicula hæc ſint, nemo ignorat: cum ſanguine ſuppoſititio veſicis felleis aliisve modis in vulvam immiſſo, & medicamentis adſtringentibus Vagina orificium frequentiori coitu relaxatum ac dilaceratum, mulierculæ ita coarctare norint, ut ſponſum alioſque

decipiant : *tantum* (inquit *Augenius* epist. med. tom.2. lib.1. cap.5.) *pos-*
sunt ejusmodi fraudes, ut viderim
sex probatæ famæ obstetrices, mulie-
rem quandam judicasse intactam vir-
ginem, quæ septem antea mensibus pue-
rum pepererat.

Dicendum ergo quòd licet Vaginæ
orificii coarctatio in virginibus haud
necessariò reperiatur, eam tamen ut
plurimùm adesse, atque in illius for-
tiori dilatatione vasorum sanguineo-
rum contextus rumpi ac sanguinem
effluere; quare lex Deuteronomii ex
eo quod plurimum evenit conflata
videtur, nec propterea declarat co-
arctationem illam, idcirco necessariò
apud virgines reperiri debere.

Externa quæpiam virginitatis ar-
gumenta à vocis, mammarum, pilo-
rum mutatione, colli commensura-
tione, apum tentamine, aliisque col-
lecta, verè inutilia ac infida sunt. Nec
tanti facimus falsos urinarum strepi-
tus, ut ideo temerè de puellarum pu-
di-

dicitiâ suspicari velimus. Experimenta verò ex potionibus, suffitu, similibusque desumpta, figmenta somniciosæ anus colo attexenda potius, quàm hîc recensenda, veniunt.

TABULA QUARTA

Vaginæ Orificiî conformationem, prout in Juvenculis observatur, demonstrat.

Figura I. recens
II. sex annorum } natæ Pudendum exhibet.

- a. *Vaginæ orificium.*
- bbb. *Membranosæ rugositates circumcirca Vaginæ orificium existentes.*
- c. *Meatus urinarii exitus.*
- dd. *Labia à se invicem diducta.*
- e. *Clitoris cum suis Nymphis.*

Figura III. idem Pudendum in anteriori parte dissectum exhibet.

- a. *Vaginæ Orificium.*
- bb. *Rugositates membranosæ.*
- cccc. *Anterior Vaginæ pars dissecta.*
- dd. *Meatus urinarius per medium divisus.*
- ee. *Nympha.*
- ff. *Pudendi Labia.*
- gg. *Vaginæ partes dissectæ, & à se invicem di-junctæ.*
- h. *Interna Vaginæ tunica corrugata.*

fig I



fig II





fig III



CAPUT VI.

De Meatu Urinario.

CUM de mirandis Pudendi partibus, partiumque particulis jam actum sit, ne quid intactum remaneat, quod ad majorem earum elucidationem quoquo modo pertinere videatur, meritò jam nobis Meatus urinaris perscrutandus venit, ne erremus cum idiotis mulierculis, quæ in urinæ suppressione cathetherem in Vulvæ Vaginam injiciunt, credentes ex illâ urinam reddi.

Digito circiter transverso sub Clitoride, immediatè supra Vaginæ orificium Nymphas inter Meatus urinaris exitus conspicitur; qui, sicuti reliquæ totius corporis partes, per quas humor aliquis notabili quantitate erumpere consuevit, aliquantulum prominet, quam prominentiam strictè loquendo malè Carunculam appellant Anatomici, cum nihil car-

nis in se contineat, eamque Urethræ orificium claudere volunt; nec hoc nobis verisimile videtur: quandoquidem musculus Sphincter Vesicæ collum constringendo sufficiat; ac proinde non magis in foeminis, quam in viris Urethræ orificium carunculam desiderat: haud etenim ab externis corporis injuriis metuendum est, ne Vesicam urinariam ejusve Meatum subeant, cum Nympharum productionibus, ac labiorum tegumentis satis superque muniantur.

Latitudo Urethræ facile scriptorii calami crassitiem superat; imò levi operâ, ita dilatari potest, ut digitum auricularem facillimè admittat, quod ab iis omnino notandum, qui ad curam mulierum Vesicæ calculo laborantium arcessentur; quoniam Meatus ulteriori artificio ita dilatari potest, ut calculi instar ovi columbini per eum extrahi valeant. Aliquando vidimus incredibilis magnitudinis calculos artificio nullo prorsus adhibito

bito, sponte Naturâ excretos esse, absque quòd urinæ incontinentiâ, vel alio quovis incommodo exinde laborarent.

Longitudo Cervicis Vesicæ in mulieribus digitalis internodii, aut ferè duorum transversorum digitorum longitudinem obtinet; quod clarè patet, si Urethra forcipe aliove instrumento magis idoneo ab exitu externo adusque Vesicam in anteriori parte dividatur, quod ad perquirendas reliquas ejus partes omnino necessarium est: optimè enim eo modo in parte exteriori conspiciuntur muscoli Sphincteris fibræ carneæ transversim abscissæ, quæ totam Uréthræ longitudinem cingunt, & adhuc latiori ductu ad Vaginæ latera & Anum descendunt.

Interius verò Urethra tenui membranâ cingitur, quæ in inferiori parte, prope Meatus urinarii exitum magnos ductus sive lacunas admittit, per quos materia pituitofo-serosa quando-

quandoque copiosè erumpit.

Inter membranam hanc tenuissimam, & fibras carneas statim descriptas reperitur secundùm totum Urethræ ductum substantia membranosa albicans unius ferè digiti transversî crassitiem habens, quæ totam Urethræ canalem cingit; & hæc est substantia, quam perreptant, & in quâ terminantur ductus illi, qui in principio Urethræ, & in inferiori anticâ Vaginæ parte reperiuntur, quemadmodum inflatis ductibus illis non obscurè cernitur; ita, ut non adeò malè substantia illa, mulierum Prostatae five corpus glandulosum possit appellari, de quo etiamnum agere nobis videtur *Galenus* lib. 14. de usu partium, qui ex *Herophili* decreto, perinde ac in viris, foeminis etiam glandulosas Prostatas inesse scribit.

Prostatarum illarum usus, est pituitoso-serosum succum generare, qui acrimoniâ & falsedine suâ mulieres salaciores reddit, pudendasque

partes delectabiliter in coitu lubricat; neutiquam verò ad Urethram humectandam, (ut quidam opinantur) illum liquorem à Naturâ destinatum esse, vel inde patet; quia ita in ejus exitu collocantur ductus, ut erumpens Urethram non attingat, quod non fieret, si ad humectandam Urethram liquor ille destinatus foret.

Gonorrhæam latè sumptam in mulieribus ex illis Prostatis provenire posse probatur: cum in viris Prostatarum fluxus Gonorrhæa vocetur, cur non & in mulieribus eodem nomine nuncupabitur, cum in utroque sexu partium & ductuum eadem ferè sit substantia? Præterea cum fœminæ semen fluidum, ut viri, in Testibus non habeant, ut infra probabimus; necessariò illarum fluxus Gonorrhæa dictus, vel ex Tubis, vel ex Utero, vel ex Vaginâ, aut Meatu Urinario derivandus est: sed in Tubis nihil est, quod tanto profluvio ansam dare possit:


test: in Vaginâ verò, Utero, ac præfertim ejus Cervice aliqui ductus quidem sunt, sed non tam patentes, quàm illi, qui ex Prostatis derivantur; quapropter ex his potius quàm ex illis mulierum Gonorrhæam derivandam judicamus, eoque magis cum in muliere Gonorrhæâ laborante, post mortem Prostatas exulceratas invenerimus.

Hæc sunt, quæ de Genitalibus mulierum partibus externis, iisque adjacentibus dicenda habebamus, nunc ratio postulat, ut ad internas nos conferamus.

TABULA QUINTA

Repræsentat Urethram, sive Meatum
urinarium in anteriori parte secun-
dum longitudinem apertum.


- A. *Vesica urinaria.*
- B. *Collum Vesicæ ad apertum.*
- C. *Urethra secundum longitudi-
nem aperta.*
- D. *Urethræ Orificium, in eo que la-
cunarum exitus.*
- EE. *Lacunæ Prostatas perreptantes*
- FF. *Lacunæ à glandoso corpore ex-
emptæ, & flatu distentæ.*
- GG. *Prostatarum sive glandosi cor-
poris interna substantia.*
- HH. *Vesicæ partes post divisionem à
se invicem diductæ.*
- II. *Uretheres abscissi.*
- KK. *Pudendi Labia.*
- L. *Vaginæ Orificium.*
- MM. *Sphincteris fibræ carneæ ab-
scissæ.*



REGNERUS DE GRAAF
TABULA SEXTA

Spatium inter Urethram & Vaginam exhibet.

- A. *Vesica Urinaria.*
- BB. *Uretheres abscissi.*
- CC. *Collum Vesicæ apertum.*
- DD. *Urethra per medium divisa.*
- EE. *Cæca lacunarum sive ductuum glandosum corpus perreptantium foramina.*
- FF. *Lacunæ per corpus glandulosum repentes.*
- GG. *Prostatarum sive glandulosi corporis inter Urethram & Vaginam existentis longitudo atque crassities.*
- HH. *Glandulosi corporis supra Urethram existentis longitudo & crassities.*
- II. *Vesicæ partes à se invicem ductæ.*
- K. *Vesicæ urinariæ interna facies.*
- L. *Rugosa Vaginæ substantia.*
- MM. *Vaginæ Orificium.*
- NN. *Labia Pudendi.*



CAPUT VII.

De Vagina Uteri.

INter Genitales mulierum partes internas principatum facilè obtinent Vagina, Testes, & Uterus. Quibus Vasa Præparantia, Deferentia, Lymphatica, Ligamenta, Nervi, &c. tanquam secundariæ famulantur; quas omnes eo ordine quo ab externis ad internas progredi statui-
mus succinctè depingemus, incipiendo à proximiorè parte internè, scilicet ipsâ Uteri Vaginâ.

Vocatur hæc ab *Aristotele* Matrix & Uteri Ostium, sed nimis confuse; quandoquidem nomina illa Utero magis, quàm illi conveniant: nec minus improprie à plerisque Anatomicis *Vesalium* secutis, Uteri Cervix vocatur, quoniam (inquit *Fallopins*) partem illam quæ verè cervix non est, Cervicem appellant, veram autem Cervicem ignorant; nam totus
ille

ille meatus, in quem virilis Penis inditur, ab istis vocatur Cervix, cum tamen ab antiquis Anatomicis, *Galen*o scilicet, atque præcipuè à *Sorano* in tractatu de Utero, vocetur αἰδοῖον γυναικείον, nec non etiam κόλπος γυναικείος nunquam autem Cervix, nisi improprie loquantur, nam vera Uteri Cervix appellatur ea, in qua ostiolum illud angustum est, quod Penis numquam, aut rarissimè ingreditur, sed solummodo attingit; semen verò per ipsum in fundum Uteri procedit.

Quapropter ne detur confusione locus, canalem hunc in sequentibus Uteri Vaginam nominabimus; nec immeritò cum membrum virile in se recondat, atque illud non aliter quàm vagina gladium aut cultrum excipiat: Varias ejus nominationes si quis desideret, consulat *Riolanum*, ac alios, qui fusiùs de illà scripserunt.

Sita est in Hypogastrio sub ossibus Pubis, in inferiori parte Pudendum,
in

in superiori Uterum; in anteriori Vesicam, & in posteriori parte Intestinum rectum obtinet, cui tam firmiter annectitur, ac si communi constarent tunicâ: hinc læsâ exulceratâve unius tunicâ, alterius quoque facilè consumitur, ita, ut excrementa per sinum pudoris (quemadmodum aliquando conspeximus) continuò absque voluntatis arbitrio fædissimè profluant.

Figura ejus oblonga est, quæ in coitu undique sese Peni applicat, & secundùm omnes dimensiones sese eidem accommodat; ita, ut Vaginæ figura concava, eadem sit cum Penis figurâ convexâ. Extra coitum, libidinis pruritus, ac menstrualem fluxum ejus latera sæpissime in se concidunt; & Vagina intestini cujusdam flaxidi figuram refert; tempore partus aliâ rursus figuram adoptat. In infantibus & recens natis notabilem capacitatem habet, licèt ejus orificium angustissimum sit. In adultioribus

ribus (nisi valde tritæ sint) semper ejus orificium angustius est, quàm medium; & rursus ejus finis sive terminus qui Utero affigitur magis coarctatur; ita, ut dum aperitur secundum longitudinem, figuram quodammodo navicularem repræsentet.

Ridiculum planè est, quòd aliqui partem illam masculorum Peni ita correspondere velint, ut, quæ in viris foris, illa in foeminis intus collocata sint: ridiculum dicimus; quia nullam omnino cum Pene similitudinem habet.

Magnitudo hujus partis varias inter Anatomicos excitavit controversias: quia non minus difficulter Vaginæ, quàm Penis, cujus vagina est, longitudinem & latitudinem metiri potuerunt. Ne tamen eam prorsus intactam relinquamus; scito nos eam sæpius in florentis ætatis defunctis mulieribus nunc sex, nunc septem, nunc octo, nunc novem transversos digitos longam observasse; adeo, ut
fatis

fatis accuratè cum membro virili quadret, ac glans mentulati facillimè ad Uteri osculum pertingat, & illud aliquando dolore afficiat. Cujus rei historiam non injucundam perhibet *Hildanus*, cent. 6. observ. 61.

Craffities ejus in superiori parte latitudini straminis appropinquat: in inferiori verò propter accreta eandem duplo aut triplo superat.

Latitudo eadem ferè est, qualis recti Intestini; sed hæc etiam cum longitudine plurimùm variat; nam in coitu nunc brevior fit, nunc longior, nunc constringitur, nunc dilatatur; idque magis vel minus prout foemina plus minusve libidine agitur: imò testantur ganeones se in indomitæ salacitatis proscdis partem illam ita coarctatam invenisse, ut in virginibus minus libidinosus reperiri solet.

2. Interna Vaginæ substantia, eadem nempe quam Penis attingit, nervea est; eam modò per partes describemus.

Diducto Vaginæ orificio, adeò rugosa cernitur ipsius substantia, ut bovis palato membranofam illius superficiem non malè comparaveris; nisi quòd inæqualitates sive rugæ non tam recto ductu incedant; quemadmodum clarè conspicitur, si Vaginam secundùm longitudinem aperueris: tunc etenim cognosces rugas illas admodum confusè simul necti; ac in anteriori parte, cui Urethra incumbit, longè plures esse, quàm in posteriori, cui Intestinum rectum adjacet (licèt aliquando contrarium contingat) quod ideo volunt, ut glans Penis inæqualitate illâ blandius agitata majorem in coitu tentiginem, atque delectationem procreet. Inferior pars Pudendum versus, superiori semper rugosior est; nam hæc ut plurimum lenis existit.

Rugæ sive plicæ, de quibus agimus, ab internâ tunicâ sumunt originem, quæ in virginibus evidentissimæ sunt; in mulieribus verò sensim
ma-

magis & magis oblitterantur : adeò, ut ex multâ attritione ac reiterato coitu tandem abolefcant, & tota interior Vaginæ facies lenis evadat; uti videre est in scortis, nec non honestis Matronis frequenti prole beatis, & diuturno mensium, vel albo fluxu laborantibus; in iis enim omnibus substantia fit durior. Meminimus nos aliquando calculos in hac tunicâ invenisse.

Antequam ulterius provehamur, nobis dicendum occurrit, per totum Vaginæ ductum plurimos reperiri porulos; nullibi tamen plures atque majores, quàm in inferiori ejus parte circa Meatus urinarii exitum; ibi enim non minores sæpenumero inveniuntur, quàm illi, quos in Meatu urinario supra descripsimus, & lacunarum sive ductuum nomine insignivimus. Ex omnibus illis ductibus tam majoribus, quàm minoribus materia seroso-pituitosa tantâ copiâ emanat; quanta ad humectandas illas par-

partes necessaria est; & in Veneris actu ad lubricandas vias tam copiosè erumpit, ut etiam extra Pudenda profluat, & hæc est materia pro vero mulierum semine à multis habita.

Hic etiam notandum, materiam illam tantâ cum delectatione ex ductibus illis proflire, quantâ cum voluptate è Prostatis virorum solet; ita, ut non adeò à ratione alienum videatur si effluxum illum, mulierum Pollutionem appellemus; & licet revera, quod emittunt, semen non sit, equidem æque male agere censentur, ac viri sese polluentes, illæ, quæ lascivis cogitationibus, petulcis digitis, aut aliis instrumentis contra honestatis mores excogitatis, malevolè mentem eòusque exagitant, ut talem materiam abundanter ejiciant: nam non semper semen, sed aliquando tantummodo similis materia è Prostatis virorum erumpens pollutionem causat. Materiæ hujus seroso-pituitosæ quantitatem aliquam ex nervosâ Vagina.

ginæ tunicâ aut glandulis in illâ contentis provenire, non inficias imus, maximâ tamen sui parte, eam ex mulierum Prostatis circumcirca Urethram positâ prorumpere reperient ii, qui horum ductuum propagines investigabunt.

Internis Vaginæ partibus descriptis ad externas progredimur, quarum primò in parte inferiori ablata Clitoride occurrit musculus Sphincter, qui lato fibrarum ductu, tres fere digitos æquante, ad latera ejus ascendens inferiorem Vaginæ partem arctè amplectitur; non alium in finem, quàm ut partem amplexam, cum necesse sit, constringat, & hoc maxime tempore coitus; nisi enim partes illæ constringi ac dilatari possent, impossibile foret, ut generationis actus tam fæliciter inter diversæ magnitudinis & ætatis homines celebraretur: mulierum enim Vagina tam affabre facta est; ut se omnibus, & singulis fere mentulis accommodet; sic ut
brevi

brevi occurrat, longæ cedat, crassæ dilatetur, tenui constringatur: Natura enim omnibus Penis differentiis consuluit, ut non opus sit, sollicitè vaginam cultello æquam quærere; sed ubique Opificis beneficio inveniat; ita, ut omnes viri cum omnibus foeminis, & omnes foeminæ cum omnibus viris convenire possint, si cætera consentiant. Flaccescente Pene, cum eodem Uteri Vagina concidit, sicque Uteri osculum dum extrahitur non refrigeratur.

Constrictionem supra memoratam mirum in modum opitulantur corpora illa, quæ, remotis carnosis expansionibus à Sphinctere ortis, in inferiori Vaginæ parte utrimque prope Pudendi labia conspiciuntur: ascendant enim ab inferiori parte utrimque ad membranofam substantiam, quâ Clitoris vicinis partibus annectitur, in eaque terminantur ac evanescent: ita ut dextri & sinistri lateris corpora nullam inter se communio-

nem habeant, uti videre est, si alterutrum flatu distendatur: nam inflato dextri lateris corpore, sinistrum non intumescit; nec è contra inflato sinistro dextrum intenditur, aut clitoris erigitur, quare nec illam cum corporibus illis communionem habere judicamus. Horum exterior substantia tenuissimâ constat membranâ; interior verò, quæ plerumque ut interna Clitoridis substantia ob coagulati sanguinis copiam nigricat, ex multis vasculis & fibrillis sibi invicem laxè unitis contexta est; quam, cum retis complicati figuram quodammodo referat, Plexum retiformem nominamus.

Plexus ille nostro judicio ibi collocatus est, ut Vaginæ orificium tanto melius coarctetur, & virile membrum accuratius amplectatur; nam ille copioso sanguine distentus, cum propter muscoli Sphincteris fibras carneas illum comprimentes extrorsum nequeat, necesse est, ut introrsum

sum cedat, & Vaginæ orificium coarctet. Harum partium distensio ad oculum apparebit, si vasa sanguinea per Clitoridis dorsum excurrentia parumper inflentur, quia cum Plexu illo totum Pudendum intumescit.

Ablatis iis, quæ Vaginæ adnasci solent, reliquam ejus substantiam externam proponemus; quæ est membranosa, rara, laxa, & fibris carneis secundum longitudinem excurrentibus prædita, reliquis partibus ita agglutinata, ut ejus extrema facile determinari nequeant; nisi prope Uteri ostium, ubi ejus partes à Naturâ ita distinguuntur, ut haud difficulter internosci possint.

Vasa quæ per externam internamque Vaginæ Uteri substantiam vagantur, sunt Arteriæ, Venæ, Nervi, Ductus ipsi proprii, & fortassis etiam vasa Lymphatica.

Arterias habet ab Hypogastricis & Hæmorrhoidalibus. Illæ, quæ ab Hæmorrhoidalibus enascuntur, inferior-

rem tantùm Vaginæ partem obambulant; quæ verò ab Hypogastricis prodeunt, ad Vaginæ latera descendentes, per reliquam ejus partem exspatiantur: majores tamen & crassiores furculos versus partem ejus posteriorem, quàm anteriorem, emittunt, qui in superiori parte cum Uteri arteriis ut plurimùm uniuntur.

Venæ similiter quæ inferiorem ejus partem occupant ab Hæmorrhoidalibus proficiscuntur; reliquæ verò ab Hypogastricis descendunt, & lato ac varicoso ductu ad Vaginæ latera excurrento, & varios hinc inde furculos spargendo, integram quasi Vaginam amplectuntur, & cum Uteri venis in superiori parte, pluribus in locis conjunguntur: quare hoc fiat in sequentibus exponemus.

Nervi Vaginam occupantes præsertim Sacri ossis ramulis accepti referuntur. Ductus ipsi proprios statim descripsimus, & Vasa Lymphatica postmodùm describemus.

Vaginæ actio erectio est, cum in coitu Vaginæ ductus à Pudendo ad Uterum usque erigatur; sic ut Penis regiâ quasi viâ ad Uterum pervenire queat. Natura autem in Vaginâ talem erectionem molita est, ut congrua Pudendorum affricatio ad semen eliciendum necessaria fieret, & semen facilius ad Uteri fundum pertingeret; nam si Vagina non erigetur in coitu, facilè evenire posset, ut complicaretur, complicata commodam Penis immissionem impediret, impeditus penis semen determinatum non in Uteri osculum internum ejacularetur, sed per cavum Vaginæ locum effunderetur, effusum verò ad latera Penis efflueret: denique fieri posset: ut à fortiori Priapo facile læderetur: unde, refert *F. Plazzonus*, non ita pridem contigit, ut juvenis quidam cum sponsâ juveniculâ primâ nocte congressurus, validâ veretri intrusionē, & violentâ festinatione non modò cervicem, sed & ipsum intesti-

num rectum perrumperet. cuius rei causam non aliam esse judico, quam quod vulva non assueta erigi, ad novum opus languida flaccesceret, nec peni irruenti directam viam præbere nosset. Nec fabulas me narrare putandum est, siquidem possem ipsas personas nominare, nisi Hippocratici juramenti memor, hujusmodi curationes inter arcana sepeliendas esse censerem.

Postquam singularum Vaginæ partium constitutionem, & usum explicuimus; difficile non erit totius verum usum determinare, qui est membrum virile erectum excipere, emissum semen in Uterum dirigere, profluente menstruo famulari, ac nascituro partui, ejusque comitatu transiitum præbere.

TABULA SEPTIMA

Repræsentat Uteri Vaginam à posteriori parte secundum longitudinem apertam.

- A. *Rugosa Vaginæ interna substantia hinc inde exiguis punctis persita.*
- B. *Uteri Osculum in superiori Vaginæ parte propendens.*
- C. *Uteri Collum.*
- D. *Uteri fundus.*
- EE. *Tubæ Fallopianæ sive Oviductus.*
- FF. *Rugosa Oviductus interna substantia.*
- GG. *Nervi per Ligamentum alis Vespertilionum assimulatum dispersi.*
- HH. *Testiculi.*
- II. *Testiculorum Ligamenta vulgò Vasa Deferentia dicta.*
- KK. *Ligamentorum Latorum portiones.*
- F 5 LL. *Ner-*

LL. *Nervi exigui per Uterum disseminati, prout aliquando à nobis observati sunt.*

MM. *Ligamentorum Rotundorum portiones in Abdomine existentes.*

NN. *Ligamentorum Rotundorum portiones extra Abdomen protensæ.*

OO. *Peritonæi portiones Ligamentis adhærentes quousque ea concomitantur.*

PP. *Superior Vaginæ pars tenuior à se invicem diducta.*


QQ. *Membranosæ substantiæ in inferiori Vaginæ parte existentis crassities.*


R. *Meatus urinarii exitus.*

SS. *Cæca lacunarum glandosum corpus perreptantium foramina.*

T. *Clitoris.*

V. *Nervi insignes per Clitoridis dorsum excurrentes.*





C A P U T V I I I .

De Utero.

VAginæ jam descriptæ immédia-
tè adhæret Uterus, locus qui-
dem humilis, sed tam altâ considera-
tione ac admiratione dignus, ut acu-
tissimi ingenii Scriptores eum se ad-
mirari quidem, at intelligere non
posse ingenuè confiteantur; ita ut,
qui ipsos comprehendit, ab ipsis
comprehendi se minimè patiatur.
Ne tamen intacta relinquamus ea, ad
quæ nos rerum series adduxit, de illis
lubentissimè nostras cogitationes at-
que observationes vestris submitte-
mus judiciis.

Uterus apud Latinos, Matrix, qua-
si omnium Mater, appellatur; quia
quamdiu foetum in se continet, matris
vices in alendo ac conservando gerit:
vel quia pars illa matres efficit, si e-
nim illâ carerent mulieres, nunquam
matres fierent. Dicitur etiam Utri-
culus

culus ab utre ; quia cavus est ; & instar utris foetum in se recondit. Nuncupatur & ab aliquibus Vulva, Loci muliebres, Genitura, Postrema, Ovum, &c. Quibus porrò nominibus apud Græcos, & alios insignitus fuerit, in *Riolano*, *Rolsinccio* & aliis videri potest. Quare nos ea, ut minus necessaria pertransibimus, ut tanto citius ad ea quæ lectori magis placitura sunt perveniamus.

Uterus numero tantum unicus est; licet præter communem Naturæ ordinem aliquando bipartitus aut duplex observatus fuerit.

Situs est in Hypogastrio seu Abdominis parte infimâ, quæ Pelvis dicitur; ubi inter Vesicam & Intestinum rectum, tanquam inter duo pulvinaria collocatur; ut homines ex fragili & periturâ materiâ inter stercus & urinam nati, & in terram, ac cinerem resolvendi; vilis & abjectæ suæ conditionis memores, superbiæ alas demitterent. Primariò tamen hic Uterum

rum collocatum existimamus ; quia locus ille generationi aptissimus est, nam non solum sine ullius partis læsione pro foetus amplitudine in magnam molem distenditur, verum etiam ab omnibus externis injuriis protegitur ac conservatur : ab anteriori namque parte ab osse Pubis, à posteriori ab osse Sacro, à lateribus ab ossibus Ilion, tanquam tutissimis manibus circumdatur : atqui etiam parturo foetui inde exitus ad inferiora facilis est.

Hanc Uteri distensionem prudens Natura in gravidis prospiciens, in foeminis coxarum capacitatem ampliore efformavit quam in viris, hinc etiam nates habent latiores, & ad sedendum promptiores,

Non semper in medio præcisè collocatur ; sed quandoque, licet rarius, illum nunc magis versus dextram, nunc magis versus sinistram Hypogastrii partem situm offendimus ; quod præsertim in prægnantibus ab aliis

94 REGNERUS DE GRAAF
aliis Anatomicis notatum inveni-
mus.

Alligatur parte suâ, quæ propriè
Collum dicitur, Vaginæ, Intestino
recto & Vesicæ; ipsius verò fundus,
qui ad foetus incrementum augeri de-
bet, omnino liber est, nullique an-
nectitur parti, ut extendatur contra-
haturque liberius.

Figura Uteri varia est: alia in gra-
vidis, alia in non gravidis; in his pyri
quodammodo compressi figuram re-
præsentat: malè igitur ob depressio-
nem illam cucurbitulæ Chirurgo-
rum, (utpote cujus fundus rotundus
est) eum assimulant; & adhuc magis à
Veritate aberrant, qui illum rotundum
aut quadratum pronunciant. In gra-
vidis verò prioribus mensibus Vesicæ
urinariæ non absimilis est, pedeten-
tim tamen magis magisque distendi-
tur, & quidem ita, ut si Collum
ejus excipias postremis mensibus
ad figuram sphæricam proximè acce-
dat.

Collum enim (quod omnino notandum est) dilatationem Uteri non insequitur, at pristinum ferè statum usque retinet; idque non in hominibus solùm, verùm in vaccis, ovibus, aliisque animantibus indies evenire conspiciamus.

Nec miramur *Galenum* cum suis asseclis mulierum Utero cornua affixisse, quandoquidem (referente *Vesalio* lib. 5. cap. 15.) *Galenus* ne per somnium quidem muliebrem Uterum unquam inspexerit, sed tantum vaccinum, caprinum, ovillum, &c. in quibus cornua reperiuntur, uti quisque apud laniones & in Tab. nostrâ xx videre potest: & multò adhuc evidentius cornua illa in canibus, suibus, gliribus, cuniculis, &c. conspiciuntur, quoniam Uterum statim à fundi ipsius orificio, ita in duas partes di-remptum gerunt, ac si indicem à medio digito maximè diduceres, illosque digitos Uteri partes esse fingeres, quæ in non gravidis recta ducuntur,
in

in prægnantibus ob foetus in illis contentos cornuum arietum ad instar incurvantur.

Ad Uteri figuram quoque spectare videtur ejus Cavitas, in quâ vulgus perperam septem cellulas enumerat; quarum tres in dextrâ Uteri sede, masculis; tres in sinistrâ femellis dicatas, septimam autem in Uteri medio existentem, Hermaphroditis tribuit. Nec ullo septo intermedio dividitur pars dextra à sinistrâ, neque etiam per lineam aliquam, secundum longitudinem Uteri excurrentem, separatur (quamvis illam opinionem plerique foveant Anatomici) nisi substantiam ejus secundum longitudinem dissecando, lineam illam efformaverint. Ratione tamen constitutionis unica hæc Uteri cavitas in duas dividi potest; sic ut una Colli, altera ipsius Uteri dicenda sit; illa oblonga est, & in extremitatibus magis quam in medio coarctatur, nam inferior ejus angustia, quæ pro-

priè Os Uteri dicitur, in virginibus tam exigua est, ut stylum tenuiorem solummodo excipiat, & nullo conatu vel minimus digitus in eam intrudi possit; quod cum ita sit non videmus quâ probabilitate *Spigelius* libro 8. cap. 20. Os Uteri in coitu ita dilatari statuit, ut Penis glandem suscipiat. Et dubitamus an fieri possit, quod refert *Riolanus* antropog. lib. 2. c. 35. ut longior Penis, dum orificium Cervicis Uteri apertum est fluentibus menstruis, in id osculum introducatur, & introductus ibi detineatur; ut in canibus fieri assolet: licet *Hippocrates* lib. 1. de morbis mulierum, scribat; mulieres, quibus Os Uteri nimio coitu laxatum, cum plus æquo apertum sit, non concipere: nam licet menstruorum fluxu aliququaliter relaxatum foret; voluptate & inde factâ constrictione, ita coarctatur, ut Penis osculum illud neutiquam subire possit; si verò minus in coitu delectetur mulier Vaginæ laxitas Pri-

po faciliè cedit, secundò si membrum virile illud Uteri osculum tam faciliè subintraret, quot non abortus excitarentur, ab iis, qui postremis gestationis mensibus cum uxoribus suis coëunt.

Altera sequitur difficultas, an in gravidis Os Uteri exactè claudatur, nec ne? *Spigelius lib. 8. cap. 23.* confidenter scribit, Uteri Os interius gravidis hiare, tantoque magis quanto sunt partui viciniore: cujus opinionem etiam confirmare videtur *Hippocrates sect. 5. aphor. 51. quæ uterum ferunt iis os uteri connivet.* quem locum alii aliter interpretantes, Uterum accuratissimè claudistatuunt; sed ut nostram de hac quæstione sententiam paucis exponamus, dicemus utramque sententiam maximè probabilitate niti; hiat enim quatenus primis gestationis mensibus eandem apertionem servat, & clauditur quatenus materiâ instar glutinis viscidâ quàm accuratissimè obturatur;

nec etiam inficias ibimus Os illud postremis gestationis diebus paulatim magis & magis dilatari, quandoquidem illud explorasse se digitis suis cum *Spigelio* nobis obstetrices affirmaverint.

Osculum Uteri in Vaginę capacitate prominens, tincę piscis ori, aut ut *Galenus* mavult, glandi virili persimile est. Sectionem seu rimam habet transversam; foramen Osculi in virginibus exiguum est, ast in mulieribus quę sæpe pepererunt, majus evadit; si verò nimium laxetur, vel exulceretur, vel cicatrice obducatur, vel humidum nimis fiat, sterilitas sequitur.

Tota Colli uterini cavitas rugosa est & multis exiguis ductibus perforatur, ex quibus pressâ colli substantiâ materia pituitoso-serosa erumpit, in quem finem ignoramus, nisi forsân ad humectandum, & ad Venerem excitandum, ibi humor ille à Naturâ ordinatus fuerit. Ductus illi per

membranofam & forfan quodammodo glandulofam Uteri (præfertim ejus Colli) fubftantiam difperfi, hunc humorem accipiunt, qui in falacioribus tempore coitus adeò copiofè erumpit, ut de nimia humectatione quandoque conquerantur mariti. Notandum hic in uteri Collo inter rugas, feu fibras potius, sæpè numero hydatides diverfæ magnitudinis reperiri.

Altera & quidem propria Uteri cavitas licet latior fit, fabam tamen majusculam in non gravidis vix capit.

Figura ejus probè confiderata proximè ad triangularem accedit, nifi quòd angulus verfus Collum longior fit; alii duo anguli in fundo exiftentes utrimque à Tubis Falopianis exiguo foramine perforantur, per quod primò feminis virilis pars subtilior, & poftèa Ovum muliebre pertransit. Hujus cavitatis tunica levior eft, & extra menftruorum proflu-
vium

vium non nisi exiguis porulis pervia, ex quibus serosa quædam substantia, modicâ quantitate exsudat, fortassis in eundem usum, ut ille humor, qui è Collo copiosè prodit.

Est insuper Uteri magnitudo varia, pro mulieris ætate, temperamento, libidinis usu, corporis proceritate, foetura, aut sterilitate, &c. neque proinde Uteri magis quam Ventriculi magnitudo aptè describi potest: ut tamen iis, qui nunquam mulierum dissectionibus adfuere, talem ejus magnitudinem demonstramus, qualem in diversæ ætatis mulieribus cognoverimus, breviter exponeamus. In recens natis notavimus Uterum aliquando drachmam, aliquando drachmam unam & semis pependisse. In vetulis verò, & virginibus jam pubescentibus ejusdem fere magnitudinis est, & ut plurimum ab uncia unâ ad fescunciam ponderat. Denique in validioribus, & iis quæ sæpius pepererunt, aut frequentius Veneri

indulgent, major evadit, rarius tamen duas uncias excedit. In statu verò præternaturali Uterum quadraginta libras ponderasse observavimus, cujus historiam, quatenus proxim Medicam exercentibus utilissima est, ne detur confusio loci, ad calcem hujus capitis annectemus.

Uteri mediocris longitudo ab osculo usque ad extremam fundi partem tres circiter digitos transversos adæquat; latitudo circa fundum duos digitos & semis quadrat, circa Colum verò duorum digitorum transversorum latitudinem non excedit.

Craffitiæ totius Uteri necdum aperti duos fere digitos transversos habet, nisi quòd circa ejus fundum aliquantulum magis protuberet.

Uterus in gravidis ita amplificatur, ut, qui ante in prægnationem ossis Sacri initium non supergreditur, fundus ejus postea ad Umbilicum, & ulterius extendatur, ac totam Pelvim non modò adimpleat; verum
etiam

etiam intestina tenuia, & reliqua viscera sursum comprimat. Hujus incrementi causam non eandem assignant omnes; aliqui enim tempore ingravidationis Uterum ad tantam molem excrescere statuunt, quatenus ejus membranæ ad foetus incrementum explicentur, eâdem ratione ut Vesica urinaria propter urinæ affluentis copiam, adeo ut *Galenus, Vesalius*, & alii credant, Uterum quo magis extenditur eò magis attenuari; sed ocularis experientia refragatur & autoritas *Sylvii, Mundelli, Arantii, Varoli, Plateri, Bauhini, Heurnii, Laurentii*, &c. nam à primo conceptu usque ad partum totius Uteri fundi substantia augetur, quatenus in foetus gestatione propter affluentis alimenti copiam, sensim Uterus ita dilatetur, ut postremis mensibus dum major alimenti copia ad Uterum confluit pollicem vel (ut quidam volunt) duos digitos transversos æquet; & quod mirum ac consideratione dignif-

gnissimum est, Uterus quo magis dilatatur eò magis etiam incrassatur ejus substantia, cujus contrarium in Vesicâ, Ventriculo, ac reliquis corporis partibus contingit: præterea extremis mensibus penè membraneam suam substantiam exuere videtur, ita enim si dissecetur rubescit, totque-foraminulis (quæ nihil aliud sunt quàm vasa per medium dissecta) pervia conspicitur, ut spongiosam quasi substantiam induat: nec minùs mirum multis videbitur quòd sedecim circiter dierum spatio post partum Uterus, tantus quantus est, ad pristinam fere magnitudinem redeat, quod nostro judicio contingere videtur quatenus fibris per Uteri substantiam dispersis sese contrahentibus, sanguinis copia, quâ spongiæ in modum imbuitur, exprimitur, atque Uteri substantia rursus in unum cogitur; hinc Lochiorum fluxus; qui nihil aliud est, quàm sanguinis in Utero contenti aut affluentis copia, per

per vana sanguinea in Placentæ divulsione aperta, erumpens; patentibus has vias aliquando in puerperis defunctis conspeximus, dum per Siphonem liquorem in Arterias Hypogastricas aut Spermaticas infunderemus, qui non minus quàm flatus in Uteri capacitatem erumpebat.

An verò instante menstruorum fluxu ejus moles augeatur, varii variis sentiunt, reperiuntur enim, qui existimant sanguinem menstruum ab eo tempore, quo menstrua cessant, sensim magis & magis accumulari; donec tandem distentâ Uteri substantiâ per vias à Naturâ ideo concessas suo tempore erumpat: alii verò qui menstruorum fluxum à sanguinis in illis partibus fermentatione deducunt, non tam sanguinis copiam, quàm ejus fermentationi, hunc fluxum adscribunt; neque proinde Uterum instante menstruorum fluxu adeò extendi existimant. Quæ posterior opinio nobis magis quàm prior arridet:

G 5

quia

quia nunquam in virginibus à nobis dissectis tam notabilem diversitatem in Uteri magnitudine invenimus; quod omnino necessarium foret, si totus menstruorum sanguis in Uteri substantiâ accumularetur. Sed de his sequenti capite latius.

Substantia Uteri non prægnantium conspicitur nervea membraneave; ut dilatari & contrahi pro necessitate queat: minus candicat quàm cætera corpora, quæ generatim nervosa dicuntur, quia carneum aliquid præ se fert, præsertim in Uteri fundo & parte ejus externâ; in Collo verò, & in parte ejus internâ, magis nervea apparet; hoc est durior & albicantior existit. Propria hæc Uteri substantia, quæ triplici fibrarum genere pertexta dicitur, duabus membranis intercipitur, unâ communi, & alterâ sibi propriâ.

Communis Uteri membrana valida crassaque, externam ejus faciem undique tegens, à Peritonæo originem

nem habet. Externa ejus superficies levis aqueoque humore oblita est aliarum partium ad instar, quæ invicem tangere quidem, non autem con-
nasci satius fuit. Mediante hac mem-
branâ validissimè nectitur Intestino
recto, Vesicæ, & reliquis partibus ad-
jacentibus, quemadmodum superius
à nobis traditum est.

Hanc Uteri membranam aliqui
duplicem, aut triplicem constituunt,
sed cum hoc parum ad negotium fa-
ciat; illud lubens pertransimus, eò-
que facilius cum membranas, quæ à
plerisque Anatomicis pro simplici-
bus habitæ sunt, facili negotio in du-
plices, triplices, imò quandoque qua-
druplices dividere possimus.

Propria Uteri membrana dicitur
ea, quâ interna ejus substantia tegi-
tur, atque hæc non à Peritoneo, quem-
admodum prior, originem ducit, sed
ab internâ Uteri substantiâ, cui ita
annectitur, ac si ejusdem substantiæ
foret; neque proinde difficulter pro-
dis-

dissecantis arbitrio crassa aut tenuis demonstrari potest. Sunt qui tunicam jam dictam cum *Galeno* geminam fingunt, sed malè, quia bruta tantum dissecuerunt, quorum cornua licet unicâ membranâ obvolvantur, simul tamen sumpta geminam quasi Uteri membranam constituunt. Membranam hanc in fundo Uteri admodum glabram & levem invenimus; contingere tamen potest, ut scribit *Higlmorus disq. anat. lib. 1. parte. 4. cap. 4.* quòd in menstruatis à venarum prominentibus orificiis aspera sit. In Collo verò admodum rugosa ac multis conspicuis foraminulis perforata est. Communicat cum interiori Vaginæ atque Tubarum tunicâ, ut postea demonstrabitur.

Vasa Uteri sunt Arteriæ, Venæ, Nervi, Vasa Lymphatica, Tubæ, & Ductus ipsi proprii.

Arteriæ originem habent partim à Spermaticis, partim ab Hypogastricis; ac proinde hæ infernè, aliæ supernè

pernè provenire dicuntur; has ad Uteri fundum derivari existimant, illas verò maximè per Uteri Cervicem excurrere scribunt; sed Arteria illa, quam à Præparante deducunt, utrimque cum insigni ramo ab Hypogastricis oriundo, ita conjungitur, ut difficulter (quemadmodum infra demonstrabimus) utriusque terminum determinare possimus. Arteriæ illæ ad Uteri latera anfractuosè collocatæ, varios hinc inde ramulos emittunt, quorum aliqui anteriorem, alii posteriorem & internam partem circumvoluto atque serpentino ductu perambulant; quorum aliqui alterius lateris arteriis per Anastomoses copulantur; quod jucundissimo spectaculo cernitur, si alterius lateris Arteria Hypogastrica, aut SpermatICA infletur; alterius namque lateris arteriæ, ut plurimum simul intumescunt, quod adhuc longè foelicius succedet, si Uteri tunicam à Peritonæo ortam, sub quâ hæc vasa disseminantur, sine

no-

notabilium vasorum læsione absteris; tunc enim vasa illa tam clarè se conspicienda præbent, ut ad dicti veritatem nihil amplius desiderari possit.

Non solùm per anastomosim uniuntur vasa, quæ per Uteri substantiam sparguntur; sed etiam ea, quæ per Vaginam excurrunt; ita ut aliquamdiu inflato unius arteriæ principio, plerumque totius Uteri & Vaginæ arteriæ distendantur: prout clarè conspicitur, si iteratis vicibus ad modum pulsus arteriarum vasa illa inflentur.

Arterias toties memoratas non recto, sed flexuoso ductu per Uterum excurrere judicamus; ut tanto melius absque ruptionis periculo gravidationis tempore distendi, & Uteri molem insequi possint.

Hic etiam obiter notandum duplo, vel triplo plures arterias majores & magis flexas per Uterum, quàm per Vaginam excurrere; in quem finem

nem id ita à Naturâ ordinatum sit, sequenti capite de Menstruorum fluxu inquiremus.

Uteri Venas qui lustrare cupiunt, invenient pariter à Præparantibus vasis ingentem ramum ad Uterum descendere, & ab Hypogastricis venis, utrimque unum ramum insignem prodire, quorum ramificationes tam ad Uterum, quàm Vaginam pari passu ambulant, nisi quòd illæ, quæ ad Uterum properant, copiosiores, existant. Venarum Præparantium & Hypogastricarum divaricationes infinitis in locis sibi per anastomoses nectuntur; præsertim tamen ad Uteri latera, ubi vasa illa ad modum arteriarum tam patenti anastomosi sibi invicem copulantur, ut unum idemque vas appareat: quemadmodum solo flatu, licet plures habeant valvulas, luce clarius innotescit, nam absque morâ & longè facilius quàm de arteriis dictum est, statim omnes Uteri, Testium, & Vaginæ venæ distenduntur,

tur, iis solummodo exceptis, quæ à Pudendis aut Hæmorrhoidalibus ortæ, per Pudenda repunt.

Uteri vasa non semper eodem modo sese habere, ratio docet, & autopsia confirmat: multò enim majora sunt in gravidis ac puerperis, quàm in vacuis. In gravidis aliquando ea in tantam amplitudinem dilatata vidimus, ut facilè digitum in eorum cavitatem immitteremus, quæ cessante Lochiorum fluxu, ita denuo contrahuntur sive coarctantur, ut sedecim circiter dierum spatio, cum Utero pristinam quasi figuram recuperent, nisi forsan in iis, quæ sæpius Uterum gestarunt, propter earum extensionem, magis contortæ & flexuosæ remaneant.

An etiam eo tempore quo menstrua fluunt majora sint, necdum potuimus observare: licèt aliquando dissecuerimus tales, quarum menstrua immediatè ante mortem fluxerant. Probabile tamen est quòd tempore

pore menſtruorum magis à ſanguine diſtendantur, & ab illâ vaſorum diſtenſione proveniant dolores & gravitates, quas aliquando inſtante menſtruorum fluxu perſentiunt mulieres. In Uteri vaſis ſæpe reperiuntur Polypi, & quidem tanti, ut ipſa adimpleant, nec non quandoque in calloſam quaſi ſubſtantiam degenerent.

Nervos Uterus ſuſcipit duplicis generis, tum à propaginibus rami ſextæ conjugationis interni, tum ab oſſe Sacro.

Ab Utero plurima oriuntur Vaſa Lymphatica, quæ externam ejus ſubſtantiam perreptando, ſenſim coëunt, & rivulorum ad inſtar augeſcunt, donec ad magnum Chyli Lymphæque receptaculum, ubi terminantur, pervenerint. Vaſa hæc in reliquis animalibus etiam conſpicua, *Bartholinus cap. 10. de lact. thor.* procul dubio pro vaſis lacteis deſcripſit; quandoquidem iis Uterus omnino careat.

H

Ad

Ad Vasa Uteri etiam spectare videntur Tubæ Fallopiantæ, quas peculiari capite postmodum describemus.

Horum Vasorum usus varius est. Arteriæ namque sanguinem advehunt, tam ad Uterum ac ipsi annexa & tempore graviditatis annectenda nutriendum, quàm ad corporis excrementa purgandum. Venæ autem sanguinem residuum ad cor revehunt. Nervi verò spiritibus animalibus ad Uterum vehendis destinati sunt. Vasa Lymphatica demum lympham ad cor deducendo inserviunt.

Postremò usus Uteri est; principia formationis fœtus in suam capacitatem propulsa fovere, eique nutrimentum præbere, & ab injuriis præservare, ac tandem fœtum ipsum lucis & liberioris auræ indigum expellere, & forsan etiam muliebri corpus ab excrementis purgare.

Anno 1669. cum Delphis præxim medicam exercemus, 25. Martii rogavit

gavit nos *J. Ametis*, ut charam suam conjugem gravissimo morbo detentam inviseremus, quæ tum temporis maximè conquerebatur de dolore ventris, lumborum, & anxietatibus circa præcordia, quæ omnia ita angebantur, dum capite demissiore decumberet, ut semi-erecta continuo in lecto quiescere teneretur, idque propter ventrem, qui in horrendam molem excreverat, cujus primordia jam ante 25. annos persentire cœperat, causam verò omnino ignorabat, quam nos, antequam examen, ut fas erat, instituissimus, in hyprode querendam & inveniendam opinabamur; sed postquam ab ægrâ intellexissemus, quod nullas in ventre dum sese verteret fluctuationes unquam persentiret, atque ventrem cum inæqualli duritie in latere sinistro parum infra umbilicum multo magis quàm alibi intumefactum videremus, judicabamus potius Tumorem


H 2


illum,

illum, cum nec hepatis nec lienis regioni corresponderet, atque à corpore quodam indurato & intumefacto originem duceret, à Mesenterio ejusque glandulis intumefactis provenire, eoque facilius, cum in memoriam revocarem, nos cum Clariss. Professore *D. Dimerbroekio* in nosocomio Ultrajectino talem ventris tumorem à Mesenterii tumore ortum in demortuo quodam vidisse. Quapropter tali Prognosi, qualem morbi magnitudo desiderabat, institutâ, quandoquidem pleraque medicamenta respueret, non nisi Enemata in anum injicienda, ac mixturas ad corroborandum ac dolorem sedandum cochleatim sumendas præscripsimus; quibus [medicamentis per quatuor circiter menses doloris ferociam quodammodo lenivimus. donec 24. Julii, anno ætatis suæ quinquagesimo miserrimam vitam cum feliciore morte commutaret.

Aperto cadavere, reliquis visceribus bene dispositis, in Abdominis cavitate quatuor circiter pintas invenimus liquoris admodum putridi, & præterea ingentem tumorem rotundum, qui reliquam Abdominis cavitatem adimplebat. Hunc tumorem ex adhærentibus illi Testiculis, Tubis, &c. Uterum esse cognovimus, qui nostro & adstantium judicio, ad minimum quadraginta libras pendebat; cum Uterus naturaliter constitutus, rarò duarum unciarum pondus excedat. Monstroso hoc Utero cruciali incisione dissecto, vidimus illius substantiam in anteriori parte solummodo transversæ pollicis crassitiem habere; in lateribus verò ac posteriori parte, eâ videlicet quæ lumbis adjacet, duodecim transversos digitos adæquare; quæ Uteri substantia partim scirrhusa, partim quasi glandulosa sive ex globulis rotundis indurato vitello non absimilibus com-

posita cernebatur. Uteri verò medium sive cavitatem internam materia quædam majori pugno crassa, nigricans & putris occupabat, quam statim à fœtu, molâ, vel placenta in Utero putrefactâ originem sumpsisse judicabamus, quod ultimum mariti relatione confirmabatur: retulit enim nobis uxorem suam ante 25. annos secundo vel tertio ingravidationis mense vesiculam quandam aquâ plenam per muliebria absque placenta excrevisse, subsequente maximo lochiorum fluxu per sex septemve menses durante, eoque cessante uxoris suæ ventrem sensim magis magisque intumuisse; accedentibus symptomatibus superius enarratis.





TABVLA OCTAVA

Exhibet virginis Uterum transversim dissectum.

- A. Uteri fundus transversim dissectus.
- B. Uteri fundi cavitas.
- C C. Uteri substantia multis & exiguis foraminibus à Vasis transversim dissectis perforata.
- D D. Cervicis Uteri prope fundum transversim dissectæ substantia.
- EE. Cervicis Uteri cavitas, prout in iis, quæ nunquam pepererunt, coarctata existit.
- FF. Vasa ad Uteri latera excurrentia transversim dissecta.
- G G. Communis Uteri membrana.
- H H. Ligamentum Uteri Latum.
 - II. Ligamenta Uteri Rotunda.
- KK. Oviductus sive Tuba Fallopiana.
- LL. Foleaceum Tubarum ornamentum.
- M. Testiculus dexter.
- N. Ejusdem Testiculi Ligamentum.
- O O. Membranosa Ligamenta quibus Tuba Testibus annectuntur.

TABULA NONA

Exhibet Uterum in anteriori parte
incisione decussatâ apertum.

AA. *Uteri decussatim divisi partes
ita dispositæ, ut ejus cavi-
tates & spongiosæ illius
substantiæ crassities appa-
reat.*

B. *Uteri fundi cavitas.*

C. *Cervicis Uteri cavitas.*

D. *Coarctatio inter fundi & Cer-
vicis cavitates plerumque
conspicua.*

E. *Uteri Osculum.*

F. *Pars Vaginæ Osculo Uteri ad-
hærens.*


GG. *Tubarum portiones.*

HH. *Styli per Tubas in Uteri fun-
dum inserti.*

II. *Propria Uteri membrana in-
ternam ejus substantiam ob-
velans.*

KK. *Interior Colli uterini substan-
tia minus spongiosa.*

TA.



TABULA DECIMA

Exhibet Uterum ita dissectum, ut
Tubarum in ipsius cavitatem
transitus appareat.

AA. *Uterus secundum longitudinem
divisus.*

BB. *Uteri fundus transversim dis-
sectus, ut Tubarum in Uteri
cavitatem ingressus conspi-
ciatur.*

C. *Tubarum principium ut est na-
turaliter coarctatum.*

DD. *Tubarum progressus sensim
magis & magis dilatati.*

EE. *Ligamenta Testiculorum ab-
scissa.*

FF. *Ligamenta Uteri Rotunda.*


G. *Uteri fundi cavitas.*

H. *Cervicis cavitas, & fibrosa
ejus substantia.*

II. *Propria Uteri membrana.*

KK. *Uteri Osculum.*

L. *Cervicis Uteri coarctatio.*



CAPUT IX.

De Fluxu Menstruo.

Menstruorum fluxus quid sit, nemo Medicorum ignorat: sed per quas vias expurgetur; quâ ratione à Naturâ excitetur; an quantitate, an verò qualitate vitiosus sit; item quomodo fluxus albus à Gonorrhœâ sit distinguendus, subobscura controversia Anatomes Professorum animos distrahere solet: quapropter missis minoris momenti difficultatibus circa menstruorum fluxum notari solitis, jam memoratas tantùm hoc in loco compendiosè delibabimus.

Ad primum quod attinet existimamus, menstruam eluviam naturaliter per Uterum expurgari, & non per Vaginam, Pudendum, aut alias corporis partes, per quas perperam
ejus

ejus fluxum derivari quidam autumant. Et ne isthæc opinio nostra solis speculationibus suffulta videatur, rationes & experimenta, quibus eam tuemur, in medium proferemus. videmus enim foetus nutrimentum quod toto gestationis tempore à materno sanguine desumitur, per nullas alias vias, quàm per Uterum transire: item illum, qui, enixo jam foetu, Lochiorum nomine foras eliminatur eadem viâ erumpere: uti id in puerperarum dissectionibus quandoque nobis observare licuit; nec dubitamus, quin idem quoque notabunt ii, qui inflatis Hypogastricis vasis vel Præparantibus ad oscula in Uteri fundo hiantia diligenter attendent: quorum igitur menstruorum fluxus, qui ejusdem planè Naturæ existit, per alias vias erumpere niteretur? Hujus opinionis probatio à sanguineis vasis facilè desumitur, quoniam longè plura ac majora ad Uterum, quam reliquas ejus loci partes excurrunt; idem quo-

quoque confirmare videtur lumborum dolor, quem instante menstruorum fluxu, plerumque à vasorum Hypogastricorum distensione mulieres persentire solent : atque tandem evincit ocularis inspectio : refert enim *Highmorus* in menstruatis internam Uteri membranam à prominentibus venarum orificiis asperam esse : adstipulatur à *Castro* lib. 2. de Naturâ mulierum cap. 11. dum inquit : testari mulieres se vidisse Uteri procidentiam laborantes, quibus ex Uteri osculo sanguis evidentissimè promanabat : si enim menstruorum fluxus naturaliter per Uteri Vaginam, & non per Uterum erumperet, vanus atque superfluous esset abortionis metus, cum ille in gravidis sanguineis atque alimentari succo repletis sponte excitaretur : siquidem Natura faceret id, quod ejus minister per venæ sectionem aliquando præstare tenetur, ne superabundanti sanguinis copiâ fœtus de suffocatione periclitetur : et
enim

enim mulieres sunt, quæ ad justum tempus foetum gestare nequeunt, nisi per venæ sectionem in brachio institutam, earum sanguis minuatur. Cujus rei veritatem Medicorum observationes passim obviæ abundè confirmant.

At videmus indies in prægnantibus quoque plethorâ laborantibus tantum abortionis periculum imminere, ut magnus medicinæ Dictator effatus sit, mulieri utero gerenti si purgationes procedant impossibile esse, foetum sanum permanere: quod sano sensu de immoderato fluxu per Uterum erumpente sumendum arbitramur.

Petet hîc forsan aliquis, si per Uterum in gravidis menstruum fluxus expurgetur, quare non semper abortiunt hoc profluvio infestari solitæ? Respondemus id posse fieri si menstrua moderata sint, & per illam Uteri partem evacuentur, quæ omnino à placenta libera est; non enim illa omnibus

Uteri

Uteri partibus, sed tantum alterutri
 ejus lateri (uti postea demonstrabitur)
 adhærescit: si verò fluxus immodera-
 tus existat, aut per placentæ locum
 erumpat, placenta in totum aut eo-
 usquæ dissolvetur, ut foetus superstes
 manere nequeat: idem quoque con-
 tinget in modicâ menstrui purgatio-
 ne, cum scilicet illa ob Uteri osculum
 pituitâ validissimè obturatum expur-
 gari non possit, placentam Uteri dis-
 tensione resolvat; aut pravis quibus-
 dam qualitatibus à stagnante men-
 struo provenientius foetum peri-
 met.

Sed ultra interrogabit hîc aliquis,
 quorsum propagines illas venarum,
 quæ juxta os Ilii à divisione venæ
 Cavæ oriuntur, & in Uteri Vagi-
 nam utrimque implantantur, Natura
 fabrefecisset; nisi per eas menstruus
 sanguis expurgaretur? & quare tanta
 est inter Vaginæ & Uteri vasa com-
 munio? Respondemus illas primario
 Naturæ fine tam copiosè ibi destina-

tas esse, ut Vaginæ erectio, quæ membro virili correspondere debet, sælicius excitetur : communionem verò tantam inter utriusque vasa desiderari, ut in venereo congressu, ubi simul agunt, unà quoque incitarentur.

Non tamen hic Vaginam sic excludendam volumus, ac si nunquam per illam prodirent menstrua, videmus enim, & clarissimorum Virorum testimonia perhibent, illa per vomitum, alvum, urinam, per oculos, nares, aures, gingivas, mammas, umbilicum, minimum manus digitum, ac alias infuetas corporis partes interdum promanare. Quid ni similiter illa citra Naturæ ordinem per Vaginam Utero proximam, tot insuper vasis locupletatam prorumpere possent. Quin imò existimamus Naturam frequentius sese per hanc, quàm per alias corporis partes exonerare : unde contingere nonnunquam potest, ut innoxie menstruorum fluxum experian-

riantur gravidæ.

De ratione ac modo, quo menstrua excitari solent, Medici adhuc minus inter se conveniunt: aliqui enim cum *Aristotele* 2 & 4 de generatione animalium, periodicæ hujus excretionis causam referunt ad lunæ motum: alii ad solam plethoram, credentes totâ mensis periodo circa Uterum collectum sanguinem vasa tam diu distendere, donec nimia distensione irritata, sarcinam suam in Uteri capacitatem sese contrahendo deponant: sed illa speculationibus innixa potius quam propagandæ veritati consentanea videntur.

Ad primum quod spectat, cunctis mensis temporibus hanc vel illam menstruo expurgari videmus, citius aut tardius pro temperamentorum varietate: non est itaque hujus periodi causa in sempiternos & immutabiles lunæ cursus referenda. Alteram verò opinionem, menstruæ purgationis motum à solo exuperante san-

guine

guine, qui in Uteri vasa perlabitur, eaque copiâ & calore distendit ac aperit, derivantem, non ratio tantum, sed & frequens cadaverum dissectio prorsus refellendam esse demonstrat: siquidem nullâ probabilitate nititur, quod sanguis (qui perenni circulationis lege continuò per omnes corporis partes movetur) tanto temporis spatio in Uteri vasis stagnaret; quibus addendum, Uteri vasa haudquam tantam sanguinis copiam continere posse, quanta unâ periodo evacuari solet: præterea in mulieribus instante menstruorum fluxu subitaneâ morte extinctis, ac dissectis, Uteri vasa mirum in modum distenta inveniri deberent; at illud numquam invenire potuimus, nec ab aliis inventum legimus: & licet aliquantulum magis quandoque turgerent, illud profectò parum facere posset ad quantitatem singulis mensibus expurgari solitam.

Quibus rectè consideratis arbitra-

mur menstruorum colluviem statis circuitibus per Uterum excernendam à fermentatione potius quàm lunæ motu, aut solâ sanguinis copiâ excitari: quandoquidem quotidianâ experienciâ constat, multis menstrua fluere, quæ jejuniis sese macerant, magnas Hæmorrhagias, aut diuturniorem morbum passæ sunt: neque existimamus fermentationem illam in Uteri vasis tantùm, sed in totâ massâ sanguineâ contingere; quoniam videmus in mulieribus quarum menstrua fluunt, non Uterum solum affici, sed caput doloribus infici, pedes lassitudine detineri, ventriculum ac reliqua corporis membra his vel illis molestiis infestari: nec non sanguinem illum per nares, pulmones, ac alias jam dictas corporis partes subinde manare; quæ neutiquam evenirent, nisi integra sanguinis massa fermentationis motu exagitaretur. Ratio verò cur per insuetas illas Naturæ vias quandoque menses expur-

gentur,

gentur, potissima nobis videtur obstructio, quatenus scilicet sanguis menstruali fermentatione agitatus, per Uteri vasa, propter polypos in illis quandoque à nobis observatos, aut aliam materiam pituitosam, cicatricem, pravam conformationem, &c. erumpere non potens, per debiliora corporis loca prorumpit; eodem planè modo, quo vinum, cerevisia, & alia vase firmiter inclusa, dum fermentantur, per debiliores dolii partes quâ datâ portâ ruunt.

Si petat hic aliquis à quâ causâ fermentatio illa procedat? & cur semel tantum in mense menstruus sanguis excernatur, cum reliqua excrementa singulis expurgentur diebus? Respondebimus illa ad definitos Naturæ motus, & certas illius leges nobis adhuc incognitas referenda; si namque quotidie expurgarentur menstrua, nunquam aut rarò mulieres conciperent; neque hominum quisquam foeminæ in amplexum iret, si ejus

genitalia perpetuo cruore maderent. Menstrui sanguinis naturam perpendentes plurimi, non quantitate tantum, sed & qualitate peccare existimârunt; quia sæpè cum molestiâ prodit, ac mulieres miris cruciatibus affligit: præterea sanguinis illius contactu Penis cum menstruatâ concumbentis excoriatur, si novella vitis eo tangatur in perpetuum læditur, steriles fiunt tactæ fruges, moriuntur insita, exuruntur hortorum germina; si mulier prægnans alterius menstrua supergrediatur, aut illis circumlinatur, abortum facit: ei autem quæ uterum non gestat, concipiendi spem adimit: purgantis spiritus & vapor ab ore specula atque eboris nitorem obscurat: gustatus hic sanguis canes in rabiem agit, homines verò diris cruciatibus affligit, comitiales morbum, pilorum effluvium, aliaque elephantiorum vitia infert: idcirco à Veteribus inter venena relatus; pari malignitate existimatur atque san-

guinis elephantici potus.

Alii contra sentiunt: quia, si menstruus sanguis qualitate peccaret, mulieres toto tempore, quo naturaliter aggregatur, mirabiliter afficeret, & ejus augmentatione symptomata quoque augescerent, quæ instante mensium profluvio terribilia evaderent. Dicunt præterea, cum foetus illo retento sanguine nutriri oporteat, neutiquam illum, qualitate noxium, multoque minus veneficum (ut quidam volunt) existere.

Sed probabilior nobis videtur postremorum opinio, quæ statuit sanguinem menstruum naturaliter constitutum solâ copiâ peccare, & effectus pravos modò enarratos illi non quatenus tali competere, sed quatenus stagnatione vitiato, ex eâ enim putrescit facile, & à putredine æstum, auramque pravam concipit, tantoque facilius, quanto jugiter confluunt ad Uterum veluti ad sentinam undique corporis muliebris

sordes & excrementa, quibus immixtus confluens sanguis facilè corrumpitur; intenditque ex alieno miasmate propriam prutilaginem: Natura enim speciei propagandæ admodum sollicita (quantum possibile est) foetui nutriendo bonum atque laudabilem succum suppeditat, cujus qualitates describens *Hippocrates* dicit illum in sanis mulieribus velut à victimâ procedere, & citò congelari; cui sententiæ *Aristoteles* 7. de partibus animal. 2. his verbis subscribit: *& quæ menstrua vocantur erumpunt, quod sanguis quasi recens occisi animalis est.*

Horum gravissimorum virorum authoritatibus non minus quam rationibus jam allegatis constat sanguinem menstruum ex naturâ suâ benignum humorem esse; qui tamen, ut modò dictum est, aliquando ita immutatur, ut, propter pituitosi aut ferosi humoris copiam ipsi permixtam, album aut ferosum menstruo-
rum

rum profluvium inducat ; quod periodicum quandoque fluendi modum retinet , nonnunquam verò continuum evadit ; unde misera mulier tristis , onerosa , pusillanimis , segnis , imbecillis , atque consumpta , nec non sæpe sterilis redditur : quia si materia per Uteri cavitatem deducatur , illum tam debilem reddet , ut semen continere nequeat , vel ipsum semen corrumpet , vel aliâ quâdam ratione conceptui officiet. Dico sæpè ; quia si præter Naturam fluxus ille per Vaginam deturbetur , Uterus ipse & excipere & retinere semen poterit ; ita ut conceptio nequaquam impediatur , aut foetus ab ejus suppressione lædatur. Cujus rei exempla quandoque vidimus. Sed fluor ille sive per Vaginam sive per Uterum prodeat , subinde tam acris evadit , ut loca , per quæ transit , mordicando & exulcerando mortem inducat. Ejus rei sequens exemplum jam pridem nobis videre licuit. *Honestâ quædam Ma-*

trona diuturniori Fluore detenta, cum propter pudorem, Medicorum auxilia detrectaret, Fluoris illius acrimonia ita adaucta est, ut præ nimio dolore incedere aut quiescere non valeret: hinc vehementiori feбри coacta, tandem nostrum imploravit auxilium. Examinatis itaque ægræ symptomatibus, affectisque partibus perlustratis, Pudendi labia mirum in modum tumefacta & ulcerata comperimus; quæ cum Chirurgi egerent operâ, accersitus fuit *Henricus Annema*. Medicamentis autem tam internis quàm externis adhibitis brevi temporis spatio Labiorum tumorem ac sordidissima eorum ulcera superavimus, feбри nihilominus & dolore in Hypogastrio manente; quapropter Vaginæ orificium convenientibus instrumentis tantulum dilatare coacti, vidimus Vaginæ latera materiâ concreti albuminis instar albicanti obfessa, quam dum blandius auferremus spatulâ, hæc momenti

temporis spatio ex rubro nigricanti colore non aliter obducebatur, ac si per tempus aliquod in igne detenta fuisset: tanta erat materiæ illius acrimonia, ut nec injectionibus, fomentis, aut aliis medicamentis temperari potuerit, sic ut tandem miserrimè vitam finiverit.

Aperto cadavere, præsentibus expertissimo D. H. d' *Aquet* Medico & H. *Annema* Chirurgo: Uterum undique aut exulceratum aut scirrhusum deprehendimus: Vagina verò transmittendâ virulentâ istius humoris colluvie, adeò putris evaserat, ut levi spatulæ attactu ubique pertunderetur, patentique aditu cum Intestino recto aliisque vicinis partibus confunderetur.

Cum de Fluore sive albo menstruorum profluvio nobis hic fermo sit; alia difficultas oboritur, num scilicet Fluor ille, si continuus existat, à Gonorrhœa sit distinguendus? ita namque inter se conveniunt, ut nisi
men-

mentem adhibeat Medicus, præ similitudine facilè in errorem abeat, quanquam à diversis partibus procedant, per distinctaque loca excernantur; siquidem Fluor iisdem, quibus menstrua fluunt, ductibus ejicitur; quod vel ideo judicamus, quia menstruum cruorem ita subinde immutari cernimus; ut, qui primò veluti à victimâ, referente *Hippocrate*, prodibat, nunc minus floridus, postea pallidus, ac sensim albus appareat, Fluoremque muliebrem, album, dictum efficiat.

Gonorrhœam verò ex glandoso corpore provenire, & per lacunas circum & in Meatus urinarii exitu collocatas erumpere, cadaveris cujusdam mulieris hoc vitio infecti dissectio palam fecit; nam Utero ejusque Vaginâ innoxiiis, corpus glandosum sive prostates Urethræ circumpositas solum malè affectas offendimus. At dicet aliquis, quomodo illa

Me-

Medicus internoscere valebit, si mulier affecta se castam, honestam, & ab omni virili consortio alienam profiteatur? Utcumque dijudicare poterit, si ad prolabentem materiam, ægrotantisque querimonias diligenter attendat: materia namque Fluoris, alteram in Gonorrhæâ, manantem longè quantitate superat: querelas si consideret; Fluore sædatis lumbari cruciari dolore, alias verò Gonorrhæâ laborantes de obortâ circa pudendas partes acerbitate lamentari audiet. Sin minus his contentus certior esse velit, genitalia inspiciat, siquidem Meatus urinarii exitum circumstantes partes, (in quibus lacunarum exitus terminantur) mucosâ quâdam materie obsessas ac interdum exulceratas reperiet, reliquis Vaginæ partibus decenter sese habentibus; cujus contrarium in fluxu albo fieri assolet. Sed hæc vulvæ inspectio non semper necessaria est, cum Medicus haud sit culpandus, si
me.

medicamenta secundum ægrotantis querimonias præscribat; si vero illum eludat, nec optatum præscripto medicamine succellum contumax mulier consequatur, id sibi imputet, digna enim talis est, ut nequitiae suae debitas poenas luat.

C A P. X.

De Ligamentis Uteri.

Ligamenta, quibus Uterus suo in loco detinetur, quatuor sunt, quorum duo Lata, alia Rotunda dicuntur. Ligamenta Uteri Lata à Peritonæo proficiscuntur, quæ non Uteri tantum ac Vaginæ lateribus alligantur, sed cum præcipuâ illius parte, Vasa, Testiculos & Tubas quodammodo amplectuntur, & in se recondunt.

Horum Ligamentorum beneficio licet Uterus non ossibus Illis alligetur, ut perperam creditum est, equidem firmiter in suo loco detinetur.

Sub-

Substantiam obtinent membranofam, laxam & mollem; ut commodè contrahi ac dilatari possint: hinc *Aretæus* alis *Vespertilionum* Ligamenta illa assimilavit; & quia fibris quibusdam carnis speciem referentibus intertexta sunt, nonnulli Ligamenta illa Musculos esse putaverunt, sed minus rectè; quandoquidem præter rubicundum colorem, quem in cadaveribus diutius asservatis acquirunt, nullam speciem carnis præ se ferunt.

Laxantur aliquando Ligamenta illa propter vim partus, nimiam corporis humiditatem, &c. ut Uteri osculum in Sinum pudoris decidat, & inversa Vagina extra propendeat; quemadmodum ejus rei exemplum adfert *Felix Platerus* in observ. lib. 3. *Thom. Bartholinus* cent. 11. hist. 91. & cent. 5. hist. 9. *Dom. de Marchettis*, anat. cap. 7. & alii, quorum integrum catalogum refert *Blasius*, in commentariis ad *Veslingium*.

Reperiuntur tamen qui ob sarcomata,

mata, aut alias Vaginæ excrescentias,
 aut protuberantias quandoque à se
 observatas, Uteri prolapsus omni-
 no negant; aut adeò raram pronun-
 tiant; ut vix aut ne vix quidem eam
 unquam contingere credant; quo-
 rum tamen opinioni calculum no-
 strum non apponimus; quandoqui-
 dem ratio dicet humores à toto cor-
 pore defluentes Ligamenta Uteri
 humectare, ac relaxare posse; & expe-
 rientia confirmet in locis humidiori-
 bus hunc morbum satis familiarem
 esse: meminimus namque nos uno
 tempore ad quatuor diversas filias,
 quarum virginitas innoxia habeba-
 tur, vocatos fuisse, quæ Uteri pro-
 lapsu laborabant; quibus partim fo-
 mentis astringentibus, partim annuli
 cerei in Pudenda immisione non
 vulgare attulimus auxilium. Si nobis
 objiciant non Uteri sed Vaginæ pro-
 lapsus fuisse, quos statim retulimus;
 petemus, an Utero in suâ sede per-
 manente Vagina in tantum prolabi
 possit;

possit, ut extra Pudendum propendeat? si verò Uterus simul è naturali suo loco descendat, descensum hunc, Uteri Prolapsum vocamus; qui pro-ut major vel minor est, sic Uterus aliquando ad mediam Vaginam, interdum ad usque Vulvæ orificium, nonnunquam denique totus extra Vulvam prolabitur, ac variis modis afficitur; ita ut aliquando eum extirpare coacti fuerint; cujus rei memorabilia exempla referunt *Paulus Aegineta, Langius, Mercurialis, Duretus, Fernelius, Paræus, Licetus, Sennertus, Soranus, &c.* Ex quibus constat foeminas absque Utero (licet ejus ablatio ob multiplicia vasa eum perreptantia periculosissima sit) vivere posse: sed quod *Avenzoar, Zacutus Lusitanus, Platerus, Wierus, Ant. Benivenius*, aliique scribant tales adhuc concipere posse, omnino ridiculum ac impossibile nobis videtur. Sed ut ad uteri procidentiam revertamur, cur quæso Li-

gamentis, membranosisque partibus, quibus naturaliter detinetur, relaxatis, non tam facilè descenderet, quàm breviori Peni tempore coitus (ut in confesso est) obviam venit.

Sed altera & quidem major difficultas est; scilicet, an Uterus ipse inverti possit? quantum ad nos attinet, existimamus in difficili partu dum placenta ei firmitus adhæret, & ab imperitis obstetricibus nimium attrahitur, id aliquando contingere posse, rarissimè licet eveniat: in virginibus (nisi quandoque incredibilia contingerent) impossibile judicaremus; propterea quòd crassa ac membranosa Colli uterini substantia in illis tantùm exiguo foramine pervia sit.

Ad cujus confirmationem sequentem observationem vobis communicabimus. Anno 1671. in nosocomio Delphensi dissecuimus mulierem procidentia uteri laborantem, in cuius Uteri Vaginâ nulla sarcomata nullasque alias excrecentias, sed tantum

tum ingentem cereum globum invenimus, cujus immissi beneficio Vagina (quæ aliàs ob Uteri Ligamenta nimium relaxata invertebatur, ac foris propendebat) cum Utero intus detinebatur: Uteri Cervix autem naturalem constitutionem retinebat, adeoque minimè invertebatur.

Ligamenta Uteri Rotunda oriuntur, à fundi Uteri lateribus, iis præsertim in locis, ubi Tubæ Fallopiæ Utero committuntur, & inter duplicaturam Peritonæi versus Inguina utrimque ascendunt, & ut Vasa Spermatica in maribus, ita hæc Ligamenta in mulieribus extra Abdominis cavitatem prodeunt; hinc illæ eadem ratione ut viri, herniis sunt obnoxie, quatenus scilicet, Peritonæum, eo in loco ubi Ligamenta exeunt, præter modum dilatatur: quemadmodum hisce diebus observavimus, dum filiam herniâ laborantem, post mortem dissecaremus; eo namque in loco, ubi Rotunda Uteri Li-

gamenta Abdomen deferunt, Peritonæum adeò relaxatum invenimus, ut integram foveam sive bursam efformaret, per quam intestina in Inguen descendendo herniam intestinalem producebant.

Postquam Ligamenta hæc Abdomen, uti jam dictum est, dereliquerunt, obliquè supra Pubis ossa versus pinguedinem ibi copiosè existentem excurrunt, in eâque prope Clitoridem in multas partes divisa terminantur, ac evanescunt.

Si fabricam eorum accuratius investigaveris, non adeò simplicia dicta Ligamenta reperies; è duplici namque membranâ, haud fecus atque ipse Uterus, componuntur; & interna eorum membranosa substantia omni vasculorum genere locupletatur; habent enim nervos, arterias, venas, & vasa lymphatica, carnis autem nihil obtinent: ideo miramur cur *Vesalius* ea, Musculos Uteri nominaverit; musculi enim non sunt, quam

quamvis aliquando rubra & carneo quodam tomento oppleta videantur.

Prope Uterum admodum lata sunt; ita, ut non Uteri fundo tantum, sed aliququaliter ejus Collo annectantur, & quò magis ab Utero recedunt, eò magis angustantur; adeò, ut tandem teretia & rotunda evadant, quâ figurâ Peritonæum deferunt & divaricatis terminis in pinguedine Pubis evanescunt. Musculos suspensorios, à *Fallopio* in observationibus descriptos, non invenimus; nec in quem finem, Ligamenta illa concomitarentur, videmus.

Longitudinem plus minus spithamæ obtinent, sic ut nugari nobis videatur Author Anatomix vivorum, dum ad inferiora pedum hæc Ligamenta produci scribit; ejusque nugas exornare videntur, qui dolores femorum interiorum (quos primis gestationis mensibus persentiunt mulieres) inde deducunt.

Nec minus claudicare nobis videtur *Riolani* opinio, quæ statuit per hæc Uteri Ligamenta Rotunda excrementitios Uteri humores in glandulas inguinales deferri, atque in veneris bubones excitari: quod nobis neutiquam verisimile videtur, cum nulla vasa huic usui destinata contineant: nam quæ ad Inguina per Ligamenta aliquid adferunt, sunt tantum nervi, & arteriæ; hæ enim à Corde, illi vero à Cerebro, quod vehunt, accipiunt: reliqua autem Vasa aut Lymphatica aut Venæ sunt, quæ quidquid in se continent ad Cor revehant. Neque etiam hæc Ligamenta (licet id quidam velint) concava sunt, ut per illa aliquid ab Utero ad Inguina ascendat: iisdem rationibus corrumpit quoque *Weslingii*, & aliorum quorundam Anatomicorum opinio, quæ præterea statuit per utrumque hoc Vermiforme vas (cum à Testibus ad Vaginam meatus desint) clauso potissimo Uteri osculo,

eminalem materiam ex illorum ca-
vitatibus ad Pudenda excerni; aut, ut
alii volunt, per Clitoridem erumpere,
quod adhuc magis incredibile est;
quandoquidem Ligamenta illa nul-
lum cum Clitoride communionem
habcant; utpote quorum extremita-
tes, quæ in pinguedine Pubis termi-
nantur, ad minimum pollicis trans-
ferri latitudine à Clitoride distent.

Quomodo *Spigelius* prope Ute-
rum hæc vasa semine repleta invene-
rit, assequi neutiquam possumus;
nisi purulentam, aut aliam quandam
materiam pro semine assumpserit.

Cum Uterus quatuor illis Liga-
mentis, uti dictum est, aliis partibus
firmè alligetur; poterit aliquis,
quomodo Uterus in hystericis affe-
ctionibus ad Hypochondria & Fau-
ces, uti apud plurimos in confesso
est, ascendere possit? respondemus
id impossibile esse: licet *Hippocra-
tes* sect. 3. de artic. & lib. 1. de morb.
Mulierum affirmet, Uterum aridum

siccum suoque genio defraudatum ad Hepar gratiosi humoris fontem excurrere, ut humectetur. Cui etiam suffragatur *Fernelius*, qui sæpe tactuprehendit illum instar globi cujusdam in Ventericulum efferri, eumque graviter opprimere, & manu depressum in propriam sedem propellere: nam Uterus in cadaveribus, ubi omnia Ligamenta magis laxa sunt duabus manibus apprehensus, licet maximâ vi sursum trahatur, nequidem vix supra os Sacrum efferri potest: nam præter quatuor Ligamenta illa, quibus partibus inferioribus annectitur, etiam Vesicæ, Recto intestino, & mediante Vaginâ Pudendi partibus externis adnascitur. Necessarium itaque foret, ut si Uterus ad Umbilicum tantum adscenderet, Pudendum cum Podice non sine summis cruciatibus mirum in modum retraheretur, de quibus nunquam hystericâ passione etiam gravissimâ affectas conquerentes audivimus.

Globi autem ad fauces ascendentes, de quibus, quotidie conquerruntur mulierculæ, & quos *Fernelius* in Ventriculum efferri manuprehendit, nihil aliud quam flatus quidam austeri sunt, his enim eructatis diminitur non tantum, sed quandoque in totum cessat paroxysmus; quemadmodum pluribus probaremus, nisi mallems curiositati nostræ frænum injicere, quàm à proposito aberrare.

Horum Ligamentorum usus est Uterum suâ in sede detinere: Rotunda tamen id magis in gravidis præstare videntur; quatenus scilicet postremis gestationis mensibus, dum in magnam molem excrevit Uterus, eum ab utrâque parte detinent, quo minus in hanc aut illam ventris partem inclinet; hinc illa superioribus partibus erant colliganda, ut tanto melius suo fungerentur officio; atque hunc verum Ligamentorum usum esse, illorum fabrica satis superque demonstrat.

TABULA UNDECIMA.

Uterum cum suis Ligamentis exhibet.

A. Uteri fundus.

B. Uteri Cervix.

C.C. Ligamenta Uteri Lata.

DD. Ligamenta Uteri Rotunda.

E.E. Peritonæi portiones Ligamenta Rotunda, quousque ea in Abdomine sunt, tegentes.

FF. Peritonæi partes quæ in Herniis dilatari solent.

GG. Ligamenta Uteri Rotunda extra Abdominis cavitatem protensa.

HH. Ligamenta Rotunda prout in pinguedine Pubis terminantur.

II. Ligamenta aliis Vespertilionum assimilata.

K. Intestinum rectum.

LL. Tuba Fallopiana.

MM. Foramen in Tubarum extremitate.

NN. Tubarum Fimbriae.


OO. Fimbriae prout aliquando simul junguntur.

PP. Fimbriae quarum beneficio Tuba plerumque Testibus annectuntur.

QQ. Testes, per quorum membranam Ova transparent.

RR. Ligamenta Testiculorum quibus Utero annectuntur.

SS. Vasa Lymphatica prout ea, ex brutorum disse-





SS. *Vasa Lymphatica prout ea, ex brutorum*
disse-

dissectionibus edocti, per Uterum, Testes, & Tubas in mulieribus excurrere opinamur.

T. Vesica urinaria.

V. Vesicae urinariae interna cavitas.

X. Vesicae Collum musculo Sphinctere obvolutum.

Y. Stylus per Collum Vesicae insertus & per meatum urinarium prodiens.

Z Z. Uretherum in Vesicam insertio.

aa. Vesicae dissectae Labia à se invicem distracta & inversa.

bb. Interna Vesicae sub stant.

cc. Uretheres.

dd. Styli in Uretheres immisi, ut eorum in Vesicam exitus conspiciantur.

ee. Fibrae carnae à Sphinctere ortae, & per Vaginam repentes.

f. Clitoris.

gg. Crura Clitoridis.

hh. Clitoridis extrema ab ossis Ischii tubere divisa.

ii. Musculi Clitoridis.

kk. Musculorum principia.

l. Præputium Clitoridis.

mm. Pudendum.

nn. Nymphae.

o. Meatus urinarium.

pp. Labia Pudendi.

CAPUT XI.

De Vasis Præparantibus.

Vasa Præparantia in Mulieribus etiam quatuor sunt, & parum differunt ab iis, quæ in Tractatu nostro de Virorum Organis gener. interserv. descripsimus. ne itaque actum agendo nostrum & lectoris tempus inutiliter teramus, proponemus dumtaxat differentias, quas in illorum Vasorum investigatione observavimus.

Differunt primò Arteriæ Spermaticæ in eo, quòd, quæ in viris recto fere ductu ad Testes properant, in mulieribus nunc per varios cincinnos capreolos pampinosve vitium imitantes contorqueantur, nunc rursus de latere in latus flexæ serpentino ductu Testes appropereant, idque in uno, quàm in altero potentius, & rarissimè eodem modo, ac in viris constitutæ sunt.

Differunt secundò quoad longitudinem, nam Arterias Præparantes mulierum etiam maximè contortas, dum expanderemus, numquam tam longas observavimus, quàm in viris ordinariò inveniri solent; quia viro-
rum Testes extra Abdominis cavita-
tem in Scroto propendent; mulie-
rum verò in Abdominis cavo, supe-
riori ossium Coxendicis regioni an-
nectuntur, atque proinde mulierum
Testes ab origine Vasorum dimidiâ
solummodo parte distant: sed horum
Vasorum longitudo, iudicio nostro,
parum ad seminis perfectionem fa-
cere videtur, quandoquidem galli
gallinacei, quorum Arteriæ Sperma-
ticæ admodum exiguæ sunt, in Te-
stibus semen æque perfectum ha-
beant, ac reliqua animalia, quorum
Arteriæ Spermaticæ longissimæ sunt.
Præterea sanguinis circulatio tam
velox est, ut tantilla hæc mora, quâ
in arteriis etiam longissimis moratur,
parum ad ejus perfectionem contri-
buere

buere videatur, eoque minus cum nulla ibi ab arterioso illo sanguine excrementa secedant, aut alius nobilior humor cum eo permisceatur: graviter itaque decepti fuerunt Veteres, qui in vasis illis sanguinem albescere sibi finxerunt, atque propterea Arterias ultra Testes excurrentes, Vasa semen Deferentia appellarunt.

Differunt tertiò quoad divaricationem & insertionem; divaricantur namque in mulieribus tardius, quàm in viris; eâ ratione, ut arteriolæ quæ ad Testes properant, ejus furculi potius, quàm divaricationes appareant.

Insertionem si spectes, in eâ non exiguam diversitatem reperiēs, nam in viris ordinariò in duos ramos finduntur; quorum unus & quidem primarius ad Testem, minor verò ad Epididimides excurrit. In mulieribus autem primarius divisionis ramus non ad Testem, sed ad Uterum
 pro-

properat, ubi Arteriis Hypogastricis ita annectitur, ut nemo horum Vasorum terminos facile determinaverit, aut dicere possit num Testes à Præparantibus, an verò ab Hypogastricis Arteriis sanguinem accipiant. Quod ad primam difficultatem attinet, existimaremus ibi utrorumque Vasorum terminos esse, ubi illa tenuissima existunt, ex quo præsupposito, etiam sequetur & ob oculum apparebit Testes muliebres partim à Præparantibus, partim ab Hypogastricis Arteriis sanguinem suum nancisci; nam Arteriarum Hypogastricarum rami antequam dictos terminos attigerunt, duos vel tres furculos ad Testes properantes emittunt. Arteriæ Præparantes verò ordinatò, idque prope Testes, in duos vel tres ramos dividuntur, quorum singuli rursus (exceptis ramis illis, qui Arteriis Hypogastricis occurrunt) in plures minores ramos subdividuntur, atque unius subdivisionis rami-

fica-

ficationibus Testiculi, alterius autem ramificationibus Tubæ Fallopianz gaudent; quæ quandoque omnem arteriosum suum sanguinem ab Hypogastricis hauriunt; uti id statim clarius proponemus, dum ad Tubarum Vasa investigatio nostra pervenerit. Non tantum subdivisiones ramorum, qui ad Testes excurrunt, per externam Testiculorum substantiam repunt; sed & intimam perambulant; quemadmodum id Tab. 14. 15. & 16. luculenter demonstrant.

Ad Anastomoses inter Arterias & Venas Præparantes quod attinet, eas omnino rejicimus: quandoquidem Testes, & quæ in iis continentur Ova sanguine nutriri debeant; quod neutiquam contingeret, si Vasa illa priusquam ad Testes pervenirent, per Anastomoses simul unirentur: nam sanguis indifferenter per motum Cordis ad omnes corporis partes propulsus, non Testiculorum Parenchyma, aut Vasorum capillarium

extremities, aliasque vias difficiles subibit, quotiescūque patentes & commodiores invenit. Ad cujus ulteriore demonstrationem, sequens experimentum, à nobis ad sanguinis circulationem incredulis quibusdam demonstrandam, excogitatum, in medium proferemus. Accēpimus intestinulum cujusdam aviculæ, cujus utroque extremo calamum tenuiorem alligavimus, eâ ratione ut in titulo Tract. nostri de Vir. Org. gener. inserv. lit. A. videre est. Hujus instrumenti extremitatem unam in apertam arteriam jugularem immisimus, alteram verò in venam jugularem inseruimus, firmiterque arteriam & venam circumcirca calamum ligavimus, cujus beneficio sanguinis circulatio ex arteriâ in venam jugularem tanto impetu peragebatur, ut visu tactuque sanguinis circulatio perciperetur; ipsa namque vena jugularis ab impulso sanguine non minus, quam arteria, pulsabat; ita ut animal vehemen-

L

men.

mentiori circulationis motu in summo vitæ periculo versaretur, & reliquæ partes minus sanguine irrorarentur.

Venarum Præparantium in mulieribus talis ferè constitutio est, qualis in viris, excepto quòd multò breviores sint, nec viæ brevitās flexuum multitudine compensetur. Alia denique differentia hic notanda occurrit, scilicet quòd illæ, non tantum ad Testes; sed etiam ad Uterum, & quandoque ad Tubas, (ut postea dicetur) excurrant. Nonnulli scribunt Anatomici Venam dextram ordinariò furculum aliquem ab Emulgente sibi adsciscere, ut illo tanto melius puellarum generationi opitularetur: *hoc autem meo iudicio, inquit Plazzonus lib.2. cap.8. ideo fit, quod cum à Naturà institutum sit, quodlibet generare sibi simile, fœminæ quoque magis sibi similes proles progignere intendant, unde sanguinem serosiores utpote ad procreationem fœminarum aptiores,*
in

in majori copiâ contribuunt, utrimque ab Emulgente elicited. Id veritati minus consentaneum videtur; nam Vena illa non nisi rarissimè furculum illum admittit, & licet semper admitteret, equidem id nihil profus ad foemellarum generationem conducere, quandoquidem sanguis ille secundum circulationis leges, non ad Testes properet, sed ab ipsis redeat. Eadem quoque ratio destruit sententiam illorum, qui Venam sinistram propterea ab Emulgente oriri autumant, ut serofus humor per illam deferatur, & acrimoniâ suâ cum semine permixtâ majorem in coitu voluptatem pariat: & ne Vasorum Spermaticorum munia diversa forent, exclusu quodam Naturæ subinde observato, plerumque Venam dextram furculum aliquem ab Emulgente sibi acquirere statuerunt.

Vasa jam descripta in prægnantibus ac puerperis longè ampliora sunt, quàm in vacuis, idque non alium in

finem, quàm ut desiderata sanguinis copia illa commodius atque fælicius pertranseat.

Ufus Vasorum Præparantium, est Ovorum generationi, foetus & solidarum partium nutritioni, ac menstruorum expurgationi inservire; quatenus sanguis per Arterias advehitur ad omnes illas partes, ad quas ejus ramificationes perveniunt, in iisque secundùm Naturæ legem segreganda relinquunt, reliquo sanguine per Venas redeunte; unde perseveranter adhuc sustinemus, si Vas sanguinem referens adsit, necessariò etiam adferens adesse debere, & contra; licet Juvenis quidam aliàs non infimæ spei Anatomicus scribat; se dolere, quòd dixerimus, nugari omnes Anatomicos, qui dicunt aliquando unam, aliquando utramque Arteriam Spermatricam deesse; quandoquidem *in virgine quâdam duos circiter & viginti annos natâ quatuor arterias spermaticas, venam nullam invenerit*; quod erro-

erroneum probabitur, si absolutè loquatur: hoc est, si quatuor arterias Spermaticas, venas omnino nullas invenerit. Si verò dicat venas adfuisse, utpote de quibus Natura *sibi aliunde, ut sanguis auferatur, prospexerit*; quod aliquando observavimus & ipse insinuare videtur; eadem dicit, quæ nos in Tractatu de Vir. Org. &c. pag. 37. asseruimus; in venarum Præparantium exortu varium Naturæ lusum observari: nam arteria, quæ sanguinem ad Testes advehit, & vena quæ sanguinem à Testibus revehit, undecumque oriantur aut desinant, nobis Spermaticæ dicuntur. Si dicat tantummodo arterias adfuisse; illæ, vel habebunt usum, vel non habebunt: si habeant usum (qui est sanguinem advehere) necessariò alia aderunt vasa quæ ejusdem sanguinis superfluitates revehent. Si dicat non habere usum; dicemus tunc arterias illas non diu posse subsistere; quandoquidem vasa officio suo defuncta

functa sensim evanescere videamus; quemadmodum in arteriis Umbilicalibus, foramine Ovali, gallinarum vulvâ, aliisque quamplurimis id quotidiana experientia demonstrat.

Non est itaque quòd doleat egregius ille Vir, nisi quod censoriam suam virgulam præmaturè nimis in nos erexerit.

TABULA DUODECIMA

Exhibet Uterum, Vaginam, Tubas, & Testes ita disposita, ut arteriæ Præparantes & Hypogastricæ cum suis ramificationibus clarè conspiciantur.

A. Uteri fundi pars anterior.

B. Uteri Cervix.

C C. Vagina pars anterior à Vesicâ liberata cum suis fibris carneis secundum ejus longitudinem protensis.

DD. Vagina pars posterior post sui divisionem se invicem diducta.

EE. Arteria Hypogastrica.


FF. Arteria Hypogastrica tortuoso ductu ad Uteri latera excurrentes.

GG. Arteria Hypogastrica rami ad Uterum flexuoso ductu exspatiantes.

HH. Ejus-

- HH. *Ejusdem Art. rami Arteriis Preparantibus occurrentes, & ad Testes ramulos quosdam emittentes.*
- II. *Ejusdem Art. rami ad Tubas properantes.*
- KK. *Ejusdem Art. rami ad Uteri ligamenta Rotunda excurrentes abscissi.*
- LL. *Ejusdem Art. rami insignes Vaginam perreptantes.*
- MM. *Ligamentorum Uteri Latorum portiones abscissæ.*
- NN. *Testiculi extra situm naturalem protracti, ut Arteriarum ramificationes melius conspiciantur.*
- OO. *Tubæ Fallopianæ.*
- PP. *Foramina in extremitate Tubarum existentia foliaceo ornamento circumvelata.*
- QQ. *Arteriæ Preparantes supra simbras collocatæ quarum situm naturalem Tab. prima exhibet.*
- R. *Arteriæ Preparantis ramus ad Tubam ejusque simbras excurrents.*
- SS. *Arteriæ Preparantis rami ad Testes tendentes.*
- TT. *Arteriarum Preparantium & Hypogastricarum anastomoses.*
- VV. *Ligamenta alis Vespertilionum assimilata.*
- XX. *Ligamenta Testiculorum quibus Utero annectuntur.*
- Y. *Arteriæ Hypogastricæ ramus ad Tubam ejusque simbras excurrents.*

- a a. *Anastomoses inter Uteri utriusque lateris arterias.*
- b b. *Anastomoses inter Uteri & Vaginae arterias.*
- c c. *Anastomoses inter Vaginae utriusque lateris arterias.*
- d d. *Vesicae urinariae pars.*
- e. *Musculi Sphincteris collum Vesicae urinariae ambientis portio.*
- f f. *Musculi Sphincteris fibrae carnae Vaginae partem inferiorem amplectentes.*
- g. *Clitoris.*
- h h. *Crura Clitoridis ab ossibus Ischiis separata.*
- i. *Præputium Clitoridis sursum protractum, ut Glans conspiciatur.*
- k. *Glans Clitoridis.*
- l l. *Musculorum Clitoridis partes abscisse.*
- m m. *Musculi unius lateris supra Plexum retiformem excurrentis fibrae carnae in situ naturali.*
- n n. *Ejusdem musculi alterius lateris fibrae carnae extra situm naturalem.*
- o o. *Plexus retiformis denudatus.*
- p p. *Labiorum Pudendi pars posterior.*
- q q. *Posterior Vaginae pars à se invicem divisa.*
- r r. *Arteriae supra Clitoridem excurrentes.*
- s s. *Earundem Arteriarum rami Plexum retiformem ac omnes Pudendi partes permeantes.*



Y. 11. 1. 1. 1.

na
ente.
plexum
paries

TA.

TABULA DECIMA-TERTIA

Exhibet Venas tam Præparantes quàm Hypogastricas cum suis ramificationibus flatu distentas, ad Testes, Tubas, Uteri partem anteriorem, ejusque Vaginam excurrentes.

- A. Uteri fundus.
- B. Uteri Cervix.
- C. Vagina.
- D. Testiculus sinister in situ propemodum naturali.
- E. Tuba sinistra in situ naturali.
- F. Testis dexter extra situm naturalem deorsum protractus.
- G. Tuba dextra extra situm naturalem sursum protracta.
- HH. Venæ Præparantes abscissæ.
- II. Anastomoses inter venas Præparantes.
- KK. Venarum Præparantium propagines ad Testes tendentes.
- LL. Venarum Præparantium rami ad Tubas & folliculeum earum ornamentum excurrentes.
- MM. Venæ Præparantes per anastomosin Hypogastricis junctæ.
- NN. Venæ Hypogastricæ tubulo, ut insilentur, annexæ.
- OO. Venarum Hypogastricarum rami insignes ad Uteri latera excurrentes.
- PP. Earundem propagines ad Uterum tendentes.
- QQ. Earundem rami ad venas Præparantes expansantes.
- RR. Earundem rami ad Tubas progredientes.
- L 5 SS. Earun-

- SS. Earundem rami ad Ligamenta Uteri Rotunda exspatiantes abscissi.
- TT. Earundem rami ad Ligamenta Uteri Lata tendentes.
- VV. Earundem rami insignes ad Uteri Vaginem properantes.
- XX. Earundem rami ad pinguedinem, & membranosas Vaginae lateribus adjacentes partes excurrentes.
- Y. Vesica urinaria circa collum abscissa.
- Z. Z. Musculi Sphincteris fibræ carnea.
- a. Clitoris.
- bb. Ejus crura.
- cc. Ejus muscoli.
- d. Ejus Præputium.
- e. Ejus Glans.
- ff. Nympha.
- g. Meatus urinarii exitus.
- h. Osculum Vaginae.
- ii. Vulvæ labia.
- kk. Venæ supra Clitoridis dorsum excurrentes sibi invicem per anastomosim junctæ.
- ll. Earundem venarum propagines ad omnes Pandendi partes excurrentes.
- mm. Perineam.
- n. Anastomoses inter Uteri & Vagina Venas.
- oo. Anastomoses inter utriusque lateris Venas Hypogastricas.



C A P I T U L U M XII.

De Testibus Muliebribus

Sive Ovariis.

Testes muliebres quoad situm, figuram, magnitudinem, substantiam, integumenta, & usum, à virilibus (uti jam dicemus) multum differunt.

Situm namque obtinent non extra, ut in viris, sed in intimâ Abdominis cavitâ, utrimque duobus digitis transversis ab Uteri fundo, cujus lateribus annectuntur, valido quodam ligamento, quod à plerisque Anatomicis Vas Deferens appellatur; propterea quòd semen per illud à Testibus ad Uterum transferri crediderint: ab alterâ parte mediantribus vasis Spermaticis, ac membranis quibus vasa Spermatica involvuntur circa Ossis Ilii regionem Peritonæo firmiter annectuntur: ita ut ab utrâque parte affixi Testes quasi suspensi

spensi eandem fere altitudinem cum Uteri fundo in non gravidis obtineant; in gravidis verò licèt aliquantulum Uteri fundum insequantur, cum tamen non assequuntur, hinc evenit, ut quo Uteri fundus magis ascendit, eo etiam magis ab illo distent, ac inferiorem quam ipse locum obtineant.

Testiculi nullo Cremastere musculo suspenduntur, licèt cum *Sorano* id quidam scripserint.

In interiori Abdominis cavo collocantur, ut Utero propius adstarent & tanto melius atque fælicius id, ad quod nati sunt, efficerent: quemadmodum infra pluribus demonstrabitur.

Mulierum Testes, cum anticâ & posticâ sui parte lati atque depressi sint, à virilibus multùm discrepant: in inferiori namque parte gibbum semi-ovalem obtinent; in superiori verò (quàm vasa sanguinea subeunt) magis plani, quàm gibbosi apparent;

ita

ita ut Testiculi à sanguineis vasis & suis ligamentis divisi, semi-ovalem figuram quodammodo depressam exhibeant.

Superficies eorum quoque magis, quam in masculis, inæqualis existit; quatenus propter contenta hinc inde inæqualiter protuberat, & diversis quandoque in locis ab involucri depresso sive retracto exiguas quasdam fissuras repræsentat.

Magnitudo insuper eorum pro ratione ætatis non parum variat; in pubescentibus enim & in ætatis flore constitutis plerumque sesqui-drachmam pendent, sic ut tantum dimidiam virilis Testis magnitudinem præterpropter obtineant; licet proportionem servatâ latiores & succi pleniores existant. In proVectioribus verò ac decrepitis minores, duriores, & magis exhausti sensim magis & magis emarcescunt, nunquam tamen evanescent; minimos namque vetularum Testiculos adhuc scrupulum pon-

ponderasse notavimus. In infantibus demum ac recens natis à granis quinque ad semi-scrupulum plerumque ponderant; ita ut in his adhuc minores sint, quàm in decrepitis: quamvis plerique Anatomici dicant, illos majores in infantibus esse, atque cum glandulâ Thymo sensim decrescere. Præter Naturam tamen Testiculi in miram aliquando magnitudinem excrescunt, tantamque liquoris copiam in se recondunt, ut hydrope nonnunquam afficiantur: cujus rei exempla plura *Schenckius* refert in observationibus, *Riolanus*, & alii.

Integumenta horum Testiculorum etiamnum à virilibus multum differunt; hi namque pluribus tunicis amiciuntur, ut foris penduli ab omnibus injuriis muniantur; illi verò tali munimine non indigentes, unicâ præsertim tunicâ sibi propriâ, à *Galeno* Dartos appellatâ, investiuntur; quæ, quamvis duritiei sit mediocris, à Testium substantiâ haud facilè divel-

vellitur; ita enim iis adhæret, ac si continua cum eorum substantiâ foret.

Superiorem verò Testiculorum partem membrana à Peritonæo orta cum vasis sanguineis ad illos prope-rans involvit: atque hæc quidem communis de muliebrium Testiculo-rum involucris opinio est. Aliqui ta-men, qui coctione aut alio quovis ar-tificio propriam eorum membranam à Peritonæo non ita distinguere no-runt, ut diversæ appareant, illos uni-câ tantum membranâ à Peritonæo oriundâ tegi nobiscum judicabunt, eamque crassiorē videri, quatenus ejus parenchymati tam firmiter an-nectitur & unitur; ut, quo modo ab eo separari aut in plures membranas dividi possit, vix videamus: quod cum parum ad rhombum faciat, de horum integumentorum numero ju-dicium cuique liberum relinque-mus.

Ablato Testium involucro sub-
albida

albida eorum substantia nobis contemplanda venit, quæ toto cælo à masculorum Testiculorum substantiâ differt: Hi enim (exceptis quibusdam membranulis ac vasis Præparantibus) ex seminariis vasculis componuntur, quæ sibi invicem juncta, non tantum viginti, sed & quadraginta ulnarum longitudinem facile excedunt: fœmellarum verò Testiculi neutiquam ex similibus vasculis simul conflantur; ac proinde nemo unquam, qualemcumque diligentiam adhibeat, illos vel minimum dissolvat.

Componitur autem interna eorum substantia ex multis præcipue membranis ac fibrillis laxè sibi invicem unitis, in cujus intercapedine plurima reperiuntur corpora, quæ ipsi aut secundum aut præter Naturam insunt. Quæ semper secundum Naturam in membranosâ Testiculorum substantiâ jam descriptâ reperiuntur, sunt Vesiculæ liquore plenæ, Nervi,
&

& Præparantia vasa, quæ eodem ferè modo, ac in viris (ut supra memora-
vimus) ad Testes excurrunt, & to-
tam eorum substantiam perreptant,
ac Vesiculas subeunt; in quarum tu-
nicis rami quamplurimi post copio-
sam divaricationem evanescunt; eo-
dem modo ut in avium vitellis Ovarii
racemo adhuc annexis contingere vi-
demus.

Vasa Lymphatica in Testibus re-
perta, an eorum substantiam subin-
trent, necdum tam clarè vidimus, ut
illud (licèt veritati consentaneum)
asserere audeamus.

Quæ verò secundùm Naturam ali-
quando tantùm in mulierum Testi-
bus inveniuntur; sunt globuli, qui
glandularum conglomeratarum ad-
instar ex multis particulis à centro ad
circumferentiam recto quasi ductu
tendentibus conflantur, & propriâ
membranâ obvolvuntur. Hos glo-
bulos non omni tempore in foemella-
rum Testiculis existere dicimus; quia

post coitum tantum in illis deteguntur, unus aut plures, prout animal ex illo congressu unum aut plures foetus in lucem edet. Neque illi adhuc in omnibus aut ejusdem generis animalibus semper eodem modo sese habent: in vaccis enim flavum, in ovibus rubrum, in aliis cineritium colorem sortiuntur: præterea aliquot post coitum diebus tenuiori substantiâ præditi sunt, & in sui medio limpidum liquorem membranâ inclusum continent, quo unâ cum membranâ foras propulso, exigua solum in iis capacitas superat, quæ sensim ita aboletur, ut postremis gestationis mensibus ex solidâ tantum substantiâ conflare videantur; enixo jam foetu globuli illi rursus imminuuntur, ac tandem evanescunt.

Quæ denique præter Naturam in mulierum Testibus quandoque observantur; sunt Hydatides, lapilli, steatomata, aliaque similia.

Ex jam enarratis unusquisque fa-
cile

cilè colliget , Vesiculas sive earum contenta sola esse, in quorum gratiam Nervi, Arteriæ, Venæ, Integumenta, & reliqua in Testibus naturaliter observata facta sunt.

Vesiculas has *Vesalius*, *Fallopious*, *Volcherus Coiter*, *Laurentius*, à *Castro*, *Riolanus*, *Bartholinus*, *Whar-tonus*, *Dom. de Marchettis*, & alii variis nominibus descripserunt: quorum testimonia verbotenus hîc recensere nimis tædiosum foret; nul-latenus tamen duos impræsentiarum recitare gravabimur, ut ex eorum ore dicti veritas comprobetur. *Fal-lopius* enim in observationibus ana-tomicis inquit; *vidi quidem in ipsis quasdam veluti vesicas aquâ vel hu-more aqueo, aliàs luteo, aliàs verò lim-pido turgentes: à Castro autem lib. 1. cap. 4. de Naturâ Mulierum, dicit: Testes intus, præter vasa, sinus quosdam habere tenui aquosoque humo-re ac crassiusculi lactis sero simili, aut ovi candido liquori, plenos: alii deni-*

que hæc Vesiculas Hydatides appellant: mavult tamen Clariss. D. *van Horne* illas in Prodromo suo Ova nuncupare, quæ nominis usurpatione cum nobis præ reliquis arrideat, posthac vocabulo illo ut magis convenienti utemur, atque Vesiculas illas cum Clariss. Viro illo Ova nominabimus, propter accuratam similitudinem, quam cum ovis in avium ovario contentis obtinent; nam illa dum adhuc minora existunt, præter tenuem quendam liquorem instar albuminis nihil continent: albumen illud etiam in fœmineis Ovis existere, non injucundo spectaculo conspicitur, si illa excoquantur; liquor enim in Testiculorum Ovis contentus coctione eundem colorem, saporem, ac consistentiam acquirit, cum albumine in avium ovis contento.

Nec refert, quòd fœminarum Ova duriori cortice non involvantur; quemadmodum avicularum ova involvi solent: hæc enim extra avium

corpus, ut pullus excludatur, fovenda sunt; illa verò in corpore foemineo focillanda manent; ac Utero tanquam testâ ab omnibus externis injuriis quàm accuratissimè muniuntur.

Sed priusquam ulterius in eorum descriptione procedamus, examinandum est, an illa in omni animalium genere reperiantur: & quomodo ab Hydatidibus differant?

Ova in omni animalium genere reperiri confidenter asserimus; quandoquidem ea non tantùm in avibus, piscibus tam oviparis quàm viviparis; sed etiam in quadrupedibus, ac homine ipso evidentissimè conspiciantur. In avibus ac piscibus Ova reperiri, cum unicuique notum sit, non est quod probemus: in cuniculis autem, leporibus, canibus, porcis, ovibus, vaccis, & reliquis animalibus à nobis dissectis, ea vesicularum adinstar, ut in avibus ovorum germina solent, sese disseccantium oculis exhibent; quæ in Testiculorum fu-

perficie existentia, communem tunicam hinc inde sublevant, atque ita per eam aliquando transparent, ac si brevi exitum minarentur.

Ova hæc pro animantium genere multum inter se differunt: observavimus enim in cuniculis & leporibus ea vix rapæ seminium quantitate excedere; in porcis ac ovibus ad pisi magnitudinem plerumque accedere; in vaccis cerasi amplitudinem quandoque superare.

Notandum tamen in animalibus his, præter maxima hæc Ova, etiam minora reperiri, quorum aliqua tam exigua sunt, ut vix conspiciantur: maximam verum in Ovis illis mutationem facit ætas & coitus: in junioribus namque animalibus minima sunt, & in provectioribus majora evadunt; post coitum autem ita immutantur, ut globulos antea descriptos referant, unum aut plures, prout animalia unum pluresve foetus ententur. Ova hæc tam copiosa sunt,
ut

ut in uno Testiculo quandoque viginti & plura enumeraverimus limpidissimo liquore turgida. Quæ omnia cum in aliis etiam animalibus necdum à nobis dissectis reperiri crederemus; rogavimus Clariss. D. N. *Stenonis*, quatenus nobis communicare dignaretur ea, quæ in diversis aliis animalibus (quorum nobis copia deerat, aut dissècandi opportunitas non concedebatur) circa fœmellarum Testes observasset: nec defuit voto nostro; verùm candidè nobis impertivit, se in Damis, Porcellis, Indicis, Taxis, Cervis, Lupis, Asinis, etiam Mulis, aliisque Ova diversæ magnitudinis invenisse. Quæ omnia cum nostris observationibus collata, in omni fœmellarum genere Ova reperiri satis superque confirmant.

Si petat hic aliquis, quid illa in vetulis, & mulis generationis impotentibus præstent? Respondemus illa nihil ultra Uterum, Testes, aliasque genitales partes, in illis non minus, quàm

quàm fœcundis animalibus observari solitas, conducere : sterilitatis autem earum plures dari poterunt rationes; ut, prava organorum conformatio, materia Ovorum conceptui inidonea, aliæque plures inter sterilitatis causas numerandæ.

Quoniam superius à nobis dictum sit, in Testiculorum substantiâ, vel ejus membranis aliud Vesicularum genus Ovis persimile quandoque reperiri; oportet ut hoc in loco proponamus differentias inter illud & Ova sæpius observatas.

Aliud Vesicularum genus *Hydatidum* nomine notum, duplici ordinariò constat tunicâ, cujus interior licet tenuissima sit, ab exteriori tamen haud difficulter separatur, nec liquor in illis contentus coctione facile indurescit. Contra verò communes Ovorum tunicæ à se invicem ægrè dividuntur, atque illorum liquor coctione illicò indurescit: hinc semper quotiescunque Vesiculas in excoctis Testibus

stibus indurato, liquidoque humore
plenas invenimus; has Hydatides; illas
Ova esse judicavimus: quibus adden-
dum, quòd Hydatides aliquando à Te-
sticulorum membranis veluti à pedio-
lo propendeant, quod nunquam de
veris foemellarum Ovis hætenus ob-
servare potuimus.

Ova hæc in Testibus generantur
ac perficiuntur, eodem planè modo,
quo vitelli in avium ovariis solent,
quatenus scilicet per arterias Præpa-
rantes sanguis ad Testes affluens, in
membranosa illorum substantiâ ma-
teriam iis generandis ac nutriendis
idoneam relinquit, reliquis humori-
bus per venas Præparantes aut vasa
Lymphatica ad Cor redeuntibus.
Posteaquam Testiculorum Ova na-
turalem magnitudinem acquisive-
runt, variis tunicis sive Folliculis in-
vestiuntur; inter quos immediatè
post maris congressum glandulosa
quædam materia excrescit, ex quâ
globulorum modò descriptorum sub-
stantia

stantia componitur. In quem finem id ita à Naturâ ordinatum sit; inferius explicare conabimur.

Communis itaque fœmellarum Testiculorum, usus, est Ova generare, fovere, & ad maturitatem promoverè; sic, ut in mulieribus eodem, quo volucrum Ovaria, munere fungantur; hinc potius Mulierum Ovaria, quàm Testes, appellanda veniunt: siquidem nullam similitudinem tum formâ tum contento cum virilibus Testibus propriè dictis obtinent: quapropter ut inutilia quædam corpora à multis habiti fuerunt; at minus rectè, quandoquidem illi ad generationem summopere necessarij existant; quod probat mira vasorum Præparantium circa illos contorsio, atque confirmat ipsa fœmellarum castratio, quam sterilitas infallibiliter concomitatur: licet *Varro* scribat, vaccas exsectis Testibus, si statim coëant, concipere; quod quidem de masculis verum, quatenus vesiculae semi-

seminales adhuc semine turgeant; non autem de fœmellis, quæ vesiculas illas non habent: adeò ut *Hofmanni* assertio veritati minus congrua appareat; quod pluribus ostenderemus, nisi id à *Whartono* factum foret. Quomodo autem Ova illa fœcundentur, & ad Uterum perveniant; sequentibus capitibus elucidabitur.

TABULA DECIMA-QUARTA

Vaccæ & Ovis Ovarium exhibet,
ut ea, quæ post coitum in illis
eveniunt, conspiciantur.

Figura I. Exhibet Testiculum Vaccæ.

- AA. Testiculus secundum longitudinem apertus.
- BB. Glandulosa substantia, quæ post Ovi expulsionem in Testibus reperitur, per medium divisa.
- CC. Cavitas; in quâ Ovum contentum fuit, fere aboleta.
- DD. Ova diversæ magnitudinis in Ovario contenta.
- EE. Vasa sanguinea ad Ova excurrentia.
- F. Tuba Fallopiana membranosa expansio complicata.
- G. Foramen in extremitate Tubarum existens.
- H. Tuba Fallopiana pars abscissa.

Fig.

Fig. II. Exhibet Testiculum necdum apertum.

- A. Testiculus.
- B. Glandulosa substantia extra Testiculum protuberans.
- C. Foramen in ejus medio existens.
- D. Tuba Fallopiana membranosa expansionis portio.

Fig. III. Exhibet Testiculum Ovillum cum transparentibus Ovis necdum masculino femine irroratis.

Fig. IV. Exhibet glandulosam globulorum substantiam ex Ovis Testiculo exemptam prout Ovum adhuc continebat.

- A. Glandulosa globuli substantia ad aperta.
- B. Locus ex quo Ovum exemptum est.
- C. Ovum ex eo exemptum.

Fig. V. Exhibet Testiculum Ovis ex quo Ovum ab aliquot diebus expulsum fuit.

- A. Testiculus per medium divisus.
- B. Glandulosa globulorum substantia cum cavitate suâ propemodum aboletâ.
- CC. Ova diversæ magnitudinis in Testium superficie hærentia.
- DD. Vasa sanguinea ad Ova excurrentia.
- E. Ligamenti Testiculorum portio.

fig III



fig V




fig I




fig IV



fig II



F


G

H

TABULA DECIMA-QUINTA

Exhibet Testiculum sive Ovarium
Vaccinum apertum, prout illud
ante coitum observari solet.


- AA. Testiculus secundum longitudinem apertus.
B. Ovum maximum seu maturum in Testiculo
ad hoc contentum.
CC. Ova minora seu immatura in Testiculo haren-
tia.
DD. Membrana Testiculorum Dartos appellata.
E. Ovum maximum è Testiculo exemptum.
F. Tuba Fallopiana membranosa expansio.
G. Foramen coarctatum in Tuba extremitate exi-
stens.
H. Tuba Fallopianae extremitas.
II. Tuba pars reliqua.
K. Cornu uterini pars abscissa.
L. Tuba Ligamentum in hominibus alis vesperi-
lionum assimilatum.



TABULA DECIMA-SEXTA

Exhibet Testiculum seu Ovarium
Mulieris cum annexo Tubarum
extremo.

- A. Testiculus secundum longitudinem in inferiori parte apertus.
- B B. Ova diversæ magnitudinis in membranosa Testium substantiâ contenta.
- CC. Vasa sanguinea in medio Testium ab ejus superiori parte copiosè provenientia, prout ad Ova excurrunt.
- DD. Ligamentum Testiculorum, quo Utero annectuntur, abscissum.
- E. Tuba Fallopiana pars abscissa.
- F. Tuba abscissæ cavitas.
- GG. Foramen in extremo Tubarum existens.
- H. Foliaceum Tubarum ornamentum.
- I. Foliaceum Tubarum ornamentum Testibus annexum.



CAPUT XIII.

De Semine Muliebri.

DE Mulierum Semine rerum naturalium perscrutatores multum inter se disceptant. Magnus enim *Aristoteles* lib 1. cap. 20. & lib. 2. cap. 4. de generatione animalium, cum *Averroë*, *Avicenna*, aliisque ab unâ parte, prolificum Semen mulieribus denegat : & ex adversâ *Hippocrates* libb. de Geniturâ & de Diætâ, illud non solum pro foeminis contendit, verum duplicem utrique sexui genituram, unam validiorem, imbecillio rem alteram adscribit. Similiter *Galenus* lib. 2. de Semine cap. 1. foeminas Semine pollere validissimis rationibus comprobare nititur : quos tanquam duces Neotericorum plurimi subsequuntur. Utriusque partis argumenta, à *Rod.* à *Castro* lib. 2. de Naturâ mulierum cap. 3. *Laurentio* lib. 8. quæstione 5. de Semine,

mine, aliisque amplâ verborum serie relata, quantum nobis possibile erit, in compendium contrahemus, in gratiam eorum, quibus Authores illos pervolvendi otium non suppetit: & quid demum de hâc quæstione statuendum sit, nostris observationibus atque ratiocinationibus decidere conabimur.

Aristotelici mulieribus Semen denegandum variis rationibus contententes, dicunt in primis, duplicem in foeminâ secretionem, Seminis videlicet & sanguinis menstrui simul ad generationem haud expedire. Secundò, mulieres, cùm pueris & eunuchis quoad vocem, pilos, & corporis habitum similes sint, etiam quoad Semen assimilari volunt. Tertiò, quo tempore mas pubescit & semen effundit, pubescit etiam foemina & menstrua apparent, virili itaque Semini menstruum muliebre correspondere debet, & non alterum. Quartò, si perfectum virile Semen

generationi sufficiat; quorsum Natura foemineum adjiceret. Quintò, si Semen emitterent foeminæ (cum altero generationis principio, menstruo nempe sanguine, quoque præditæ sint) citra prærequisitum maris congressum foetum edere possent. Sextò, si Seminis ad generationem ejaculatio nunquam sine voluptate contingat, mulieres non conferent Semen, quandoquidem aliquando sine voluptate concipiant. Septimò, gravida fit interdum foemina nullâ humiditatis suæ excretionem, nunquam verò citra menses; menstruum igitur non Semen muliebne necessarium est ad generationem. Octavò, in omni procreatione aliud materiam aliud causam efficientem præbere oportet, foemina dat materiam, non potest ergo efficiens esse. Nonò, libidinosæ foeminæ à crebro partu temperantur, & nonnullæ à salaci conspectu ter intra mensem sanguinis menstrui profluvium patiuntur, quasi

quasi conante Naturâ expellere id à quo irritatur. Decimò, Sacra Scriptura *Levitici* 15. viri seminiflui, & foeminae sanguinifluae expiationem ponit; quasi huic menstruum solum, illi Semen insit. Atque hæ sunt potissimæ rationes, quibus Aristotelici Semen mulieribus denegandum volunt.

Verumtamen non minoris ponderis argumenta Hippocraticæ sententiæ fautores pro suâ parte proferunt: Primò namque dicunt, Naturam nihil frustrâ moliri, sed organa Semini procreando, excoquendo, & deferendo dicata mulieribus insunt; ergo & Semen inest. Secundò, foeminae non minus quàm viri nocturnis pollutionibus infestantur; & in viduis ac iis, quæ Hystericis passionibus vexantur, copiosissima crassissimaque Seminis copia partium genitalium titillatione erumpit. Tertiò, dissectis foeminis quæ diutius à coitu temperarunt, Vasa seminaria, Testes, &

Uteri cornua albo crassoque Semine referta esse experientia docet. Quarto, Gonorrhæam & Priapismum sæpe experiuntur mulieres, & dum Semine nimium implentur partes genitales, libidinis stimulo agitatae furias sæpe, & rabiem concipiunt, quæ symptomata Seminis excretionem cessant. Quinto, castrata animalia, foeminas putamus, non solum foecunditate destituuntur, sed venereæ voluptatis omnem deponunt appetitum: quod in suis foeminis palam innotescere à *Galeno* & aliis comprobatur. Cujus rei bene conscius rusticus ille fuit, qui, *Wiero* teste, cum filiam suam Amasio clam indulgere animadvertisset, ipsam congruè vinculis obligatam castravit, ut erat fortè suus foeminas castrandi peritus; unde nata amoris & libidinis oblita, rei tantum domesticæ sedula deinceps operam navavit. Nec sanè minoris notæ est ratio illa, quæ à similitudine filiorum ad matres desumitur: cum enim

non

non à materiâ, sed ab efficiente similitudo oriatur, si matri filius assimilari debeat, ab ejusdem Semine efficiendi debebit: non solum secundum sexum, sed secundum plurima alia accidentia, ut verrucam, cicatricem, & alios morbos hereditarios: ex. gr. dum Arthritica Arthriticum, Epileptica Epilepticum, Calculosa Calculosum gignit. Si asini Semen equa exceperit, foetus non genitoris tantum, sed utriusque mixtam speciem præ se fert; item, si ovem caper inierit, ovis duriori lanitie gignitur; similiter proles ex albo & Æthiope foeminâ procreatæ, mixtum colorem nanciscuntur. Quis enim sanguinem menstruum singulare partium ideam in se continere unquam statuit? illud enim soli Semini competit, materia autem ut materia speciem mutare non potest; at foetus matri non minus assimilatur quàm patri; ergo matres tam bene Semen prolificum habent quàm patres.

Possemus hîc utriusque partis objectiones ac solutiones longis verborum ambagibus in medium adducere; nisi id vobis (utpote qui ea omnia ex Authoribus supra citatis satis pro libitu colligere potestis) tædio futurum crederemus, atque præterea à proposito, quo hanc quæstionem paucis pertractaturos promissimus, plurimum aberraremus; quod eò minus nobis consultum videtur, cum in neutram partem totaliter inclinamus; existimamus enim mulieres præter Ova superiori capite descripta nullum aliud Semen ad generationem conferre; quod ut melius percipiat, brevem & succinctam gallinarum partium genitalium historiam & pulli generationis modum, mutuat hinc inde Clariss. *Harvei* verbis, præmittemus.

In deplumatâ gallinâ, reperire est podicem, non (ut in cæteris animalibus) in orbem contractum, sed depresso orificio transversim scissum, &

duo-

duobus labellis conniventem ; quorum superius, alterum inferius intra se collectum tegit, & occultit.

Velabri superioris fabrica in galinâ, est similis superiori palpebræ: excute nempe, membranâ carnosâ & musculosâ textitur; cum fibris à circumferentiâ undique ad centrum ductis: ejusque interior superficies, ut palpebræ & præputii, mollis est. Habet enim in extremitate sui tarsum semicircularem, ad modum palpebræ: atque insuper, inter cutem & membranam carnosam, interstitium cartilaginofum, ab Uropygii radice cum tarso falcato ad angulos rectos copulatum; quâ fabricâ, seu caudâ, velabrum hoc dicta pudendi foramina facilius detegere & operire possit.

Sublato itaque, & rescisso hoc velabro, foramina aliquot apparent; quorum evidentiora sunt ani & vulvæ, exitus nempe excrementi & introitus in uterum. Obscurius autem

est foramen illud ab *Hieronymo Fabricio ab Aquapendente* inventum; duo reliqua verò, per quæ urina è renibus profluit, cum in intestini recti extremitate terminentur, non nisi eo aliquantulum dissecto in conspectum veniunt.

Ab orificio uterino exteriori, ad interiora, & matricem, in quâ ovum perficitur, transitus est; quem in aliis animalibus vaginam uteri sive vulvam, nominamus; in quam mas penem suum in coitu ad matricem usque emittit. At vero in gallinâ fœtante trajectus hic, non recto sed flexuoso ductu ad uterum properat, unde non minus quam ob laxitatem internæ tunicæ stylum seu setam difficulter admittit, neutiquam tamen flatui transitum denegat.

Gallarum ova galli femine per uteri foramen immisso fertilia redduntur; quatenus subtiliores ejus partes per uterum ac Oviductus processum, ad Ovarium pervenientes
omnia

omnia ejus Ova spiritali suâ aurâ irradiante fœcundent. Quod probatur: gallos enim in coitu Semen emittere, testantur eorum Testes & Vasa Spermatica Semine turgida, quibus compressis Semen per binos Penes (quibus Gallum adornatum invenimus) cum impetu erumpit: illudque ab incubante in Uteri vaginam injici evincit ratio: in intestinum enim aut uretheres si effunderetur (cum inde nulli ad Ovarium meatus inveniantur) brevi cum excrementis rursus expelleretur. In foramen cæcum sive bursam Semen injici, ac longo tempore conservari, ad Ova eò delabentia fœcundanda, ut autumat *Fabricius*, nullâ probabilitate nititur: quia foramen, in quod *Fabricius* putat gallum Semen suum emittere, inter hoc vulvæ ostium & Urogypium cernitur. Nos verò talem ejus usum non agnoscimus; quia promiscuè tam gallis quàm gallinis inest, & nullam cum Ovario communionem habet; cum
in

in cavitatem cœcam terminetur: neque unquam potuimus humorem Seminali in eâ reperire; quanquam *Fabricius* asserit, Semen ibidem, tanquam in bursa, per annum integrum reservari, omniaque interea Ova inde foecundari.

♂ Vaginæ longitudo duos vel tres digitos transversos æquat; latitudo tanta est, si extendatur, ut Ovo duriori cortice obvoluto transitum concedat; Substantia ejus mediocriter crassa est, & colorem subalbidum obtinet.

♀ Sequitur jam pars illa, quam *Harveus*, gallinæ uterum seu matricem appellat, in quâ ovum perficitur, albumine cingitur, & testâ contegitur, quæ ut maxima, ita crassissima & carnosissima est, pluribusque & majoribus plicis roborata; figura ejus interna ovalis cernitur, tanquam Ovi proplasma.

♀ Ascendentem Uteri portionem sive productionem, quam *Fabricius* secun-

secundum Uterum, *Harveus* processum appellat; nos Oviductum nominabimus, qui prout ascendit altius, ita quoque sensim magis attenuatur & gracilescit, minoribusque & paucioribus plicis constat; donec tandem in membranas (easque tenuissimas) abiens, infundibulum constituat; quod ad cinctum corporis usque pertingens, totum Ovarium complectitur.

Oviductus longitudinem ingentem obtinet, nam displicatus facilè tres ulnæ *Hollandicæ* quadrantes superabit, plicatus verò rarissimè quatuor digitos transversos excedit, & unà cum Utero membranâ ad modum mesenterii dorso alligatur; ne loco motus & implicatus vitellorum transitum impediat: sed liber & apertus eosdem molliter excipiat. Per hoc mesometrium plurima quoque vasa sanguinea refertissima, in singulas Oviductus plicas ramificantur. Est itaque ortu, substantiâ, fabricâ, usu,

&c

& officio mesenterio analogon. Quin etiam ab Uteri fundo secundum longitudinem, ligamentum est, quod ad infundibulum usque protenditur, & ut mesenterium ab unâ parte, ita & hoc ab alterâ parte Oviductus plicas, ne confundantur, detinet.

Oviductus & Uterus duabus constant membranis, quarum exterior lævis, interior verò admodum corrugata est, & multo quasi tenui albumine madet, unde vitellus descendens augetur, circumpositoque paulatim albumine perficitur. Hujusmodi igitur est constitutio Uteri & Oviductus in gallinâ foetante, in ef-foetâ verò adeò imminuitur, ut in tenuissimas membranas abeat, & non amplius flexuoso, sed recto ductu ad Ovarium tendat. Hujus Oviductus pars inferior, Vulvæ sive Vaginæ orificium appellata, ita clauditur; ut, quæ prius Ovis transitum concesserat, nunc fortiori flatui viam deneget.

Ovarium sive locus, in quo gallinarum vitelli continentur, positus est statim infra jecur ad spinam supra arteriam Magnam descendentem. Quo enim loco, in majoribus animalibus sanguineis, arteria Cæliaca mesenterium ingreditur, ad exortum nempe venarum Emulgentium, vel paulo inferius, & quo loco cæteris animalibus sanguineis & viviparis vasorum præparantium, ad testiculos tendentium, exortus est; & ubi gallus suos testiculos gerit, ibi etiam gallinæ Ovarium reperitur: In quo Ovorum rudimenta inchoantur; quæ initio (secundùm *Aristotelem* hist. anim. lib. 6. cap. 2.) minuta sunt & candida, adaucta postea lutea & flava conspiciuntur.

Superior *Fabricii* Matrix, quam nos Ovarium appellamus, nihil aliud est quàm pars membranosa in avium regione lumbari omni vasculorum genere laxè intertexta, in qua infinita propemodum vitellorum multitudo, quæ

quæ in uno veluti acervo conglobata conspicitur, rotundæ figuræ & cujuscunque magnitudinis; in quâ à minimo ad maximum ea intercedit differentia, quæ est à grano sinapis, aut decuplo minoris ad fructum fere nucis juglandis aut mespili.

Quæ in Ovario reperiuntur non Ova perfectæ censenda sunt, sed horum primordia sive rudimenta; quæ in racemo eo ordine & magnitudine disposita sunt, ut gallinæ singulis diebus ad partum priori succedat alterum. Nullum autem Ovum in Ovario cinctum est albumine; sed vitelli solùm reperiuntur, qui, prout è minimorum congerie sese extulerint, in ambitum prodeunt, ut infusiori spatium facilius amplientur. Ideoque *Fabricius* verè ait: *Vitelli in racemo majores in circuitu sunt, minores in medio seu à majoribus circumdati, denique minimi omnibus subiecti*. Dum enim augescentes majorem molem acquirunt, à reliquis separantur: quod

quod dum fit, singuli vitelli, præter tunicam propriam, aliam ab Ovario mutuantur, quæ illos extrinsecus amplectitur, & fundamento, unde oriuntur, adnectit. Quare à *Fabricio*, *pediolus* sive *pedunculus* nominatur; quòd ejus operâ, ut fructus ex arbore, sic vitellus è racemo nutrimentum hauriat, & crescat. *Est enim hic pediolus nexu membranæo cavatus, qui à racemi fundamento ad vitellum producitur; quem cum contingit, dilatatur, & (perinde ac nervus opticus in oculo amplificatus) vitellum externâ tunicâ obducit. Hunc fortè Aristoteles ὀμφαλῶδες, id est appendiculam umbilicalem, & veluti fistulam nuncupavit. Pediolus iste secum multa vasa in vitellum deducit, per quem passim ramificantur.*

Hæc quidem à *Fabricio* verè dicta sunt; sed fallitur dum ait: *Tunica hæc, non quidem totum vitellum circumdat, sed paulo illum ultra medietatem comprehendit: perinde ut in*
O glande

glande operculum retro appositum, calix appellatum: quo fit ut exterior vitelli portio, à proposito membrana destituta, conspectui sese offerat sine venis, & nudata appareat. Ambit enim fere integrum vitellum, nam in parte vitelli exteriori, sive à pediolo maximè remotâ, lata quædam linea apparet; in quâ nullæ arteriæ aut venæ facilè conspiciuntur: quapropter etiam colorem minus rubicundum refert: atque hæc est sola vitelli pars, quæ exteriori membranâ non obducitur; quemadmodum clarè innotescit, si, immisso in pedunculum tubulo, flatu exterior tunica distendatur, quæ in non maturis Ovis interiori firmiter adhæret; in maturis verò, ita dissolvitur, ut vitellus aut sponte sua decidat; aut contrahentibus sese exterioris membranæ fibris expellatur, qui ab infundibulo sive membranosa Oviductus expansione exceptus, per Oviductum ad Uterum, &c. dirigitur, remanente exteriori tunicâ cum

pedunculo racemo affixâ; quam propter similitudinem, Calicem cum *Fabricio & Harveo* vocamus, quæ sensim evanescit; quemadmodum in effoetis gallinis totum Ovarium solet, cujus loco glandulosum quid solummodo reperitur.

Paucis illis perspectis ac ritè consideratis, neutiquam difficile erit credere, simile quid etiam contingere in quadrupedibus atque mulieribus; cum organa huic negotio destinata, & ab avium organis non multum discrepantia obtineant: habent enim Ovarium; in eoque verissima Ova contineri superiori capite probavimus.

Sed cum non sufficiat demonstrasse in mulierum Testibus Ova Ovarumque primordia existere, atque eos Ovario analogos esse; dicendum modò restat, quomodo illa à virili semine foecundentur, & quâ viâ à Testibus ad Uterum perveniant.

Oviductum quoque mulieres habent

bent (quem *Fallopianus* Tubam appellat) per quem seminis virilis in Uterum ejaculati pars subtilior (quam auram Seminalem vocamus) ad Testes & Ova in illis contenta pervenire potest; itidem per eos Ova è Testibus, æquè bene ac in avibus ex Ovario prolabantia, ad Uterum transire queunt; quemadmodum sequenti capite pluribus demonstrabimus. Unde patebit mulieres aliam prorsus materiam, quàm viri, pro generationis symbolo conferre.

Sed reperientur proculdubio, qui liquorem illum, in Veneris certamine, aut libidinosis cogitationibus tanto impetu erumpere solitum, Semen esse credentes, sciscitabuntur unde ille proveniat, & in quem usum destinetur? existimamus illum erumpere primariò ex lacunis in Vagina & Meatus urinarii orificiis collocatis; secundariò verò ex meatibus in Uteri collo copiosè existentibus, cui proculdubio aliquid etiam conferunt

pori in Vaginâ ac Uteri parte internâ
existentes.

Sed ulterius inquireret aliquis, unde illi ductus sive lacunæ humorem illum hauriant? priores, illæ scilicet, quæ circa Colli orificium & Meatus urinarii exitum conspiciuntur, ex Parastatis mulierum seu potius crasso & membranoso corpore circumcirca Meatum urinarium existente humorem suum accipiunt; posteriores verò ex nervoso-membranosâ Colli uterini substantiâ liquorem suum colligunt. Reliquum liquoris, quod per Uteri ac Vaginæ poros effluit, ex membranosa & forsan etiam glandulosa earum partium substantiâ prodit. Ex dictis partibus liquorem in coitu membrum virile ac Pubem humectantem & in salacioribus mulierculis ad viri formosi aspectum sæpenumero erumpentem provenire, ratio suadet & experientia confirmat; ratio suadet, quia viæ illæ ad coitum facilitandum in principio

Vaginæ collocandæ erant; & experientia confirmat, quatenus in cada-
verum dissectionibus ex dictis parti-
bus copiosè exprimitur. Humorem
illum ad generationem neque formâ-
liter neque materialiter conducere
judicamus, quandoquidem Natura
humorem illum non in Vaginæ orifi-
cium, sed in Uteri cavitatem deriva-
set. *Galenus* hanc nostram senten-
tiam quoque confirmare videtur;
dum inquit: foemina cum masculo
frigidior sit, incoctum & tenuem in
Parastatis humorem habet, qui nihil
ad prolis generationem confert, sed
extra uterum effunditur.

Non itaque liquor ille, de quo lo-
cuti fuimus, à Testibus aut Tubis
provenit; quia Testes ne quartâ ex
parte tantum liquoris in se conti-
nent, quantum uno quasi saltu (ut
mihi narrarunt ejus rei expertes) è
Pudendis erumpere solet; & posito
quòd tantum liquoris in se contine-
rent, necdum tamen is tanto impetu
in

in medium prodiret; quandoquidem viarum desit capacitas, & liquor generationi destinatus diversis locis in Testibus, propriis membranis tam arctè cingitur; ut, licèt membranulæ comprimantur, non erumpat.

Non prodit etiam ex Tubis Fallopi-
pianis; quia nec illæ tantam liquoris
quantitatem continent; quandoqui-
dem ut plurimum vacuæ sint; & si ali-
quid contineant, illud, quantum no-
stris observationibus constat, admo-
dum parum est, & consistentiam cras-
siorem habet, quàm liquor ille, de
quo loquimur; neque propter distan-
tiam tanto impetu erumpere posset;
ut nec ille, quem è Testibus prodire
volunt.

Adstruximus hucusque mulieres,
præter Ova in Testibus contenta, ni-
hil ad generationem conferre; quæ
autem ratione illa ad Uterum perve-
niant, jam jam dicemus.

TABULA DECIMA-SEPTIMA

Galli Partes Genitales exhibet.

AA. Testiculi.

BB. Vasa semen Deferentia.

CC. Utriusque vasis Deferentis extremitas, duplicem in Gallo Penem efformans.

D. Penis cum vasis Deferentis portiuncula à reliquis partibus sejuncta.

EE. Uretheres abscissi.

FF. Uretherum exitus.

G. Intestinum Rectum adaperitum.

H. Foramen Quartum Fabricii.

II. Cloaca.

K. Foramen Fabricii seu Bursa à reliquis partibus separata.

TABULA DECIMA-OCTAVA

Gallinæ Partes Genitales exhibet.

A. Vitellorum sive Ovorum Racemum.


B B. Vitelli minores circa Racemi medium.

CC. Vitelli Majores in Racemi circumferentiâ positi.

DD. Pedoli sive Pedunculi.

E E. Vitellorum partes Calice non obvoluta, sive spatia per quæ Vitelli erumpunt.

FF. Calice.



- FF. Calices ex quibus Vitelli elapsi sunt.
 GG. Vasa sanguinea per Calicis tunicas disseminata.
 HH. Membranosa Oviductus expansio.
 I. Ejusdem pars Ovario annexa.
 K. Ejusdem expansionis pars ab Ovario deorsum protracta.
 L. Ejusdem medium cum membranoso Ligamento laxè copulatum.
 M. Membranosum Ligamentum Utero alligatum.
 N. Oviductus foramen sive Infundibulum.
 OO. Oviductus in situ naturali.
 P. Oviductus pars, Uterus appellata, in quâ Ovum aliquandiu detentum perficitur.
 Q. Oviductus pars, Vagina dicta.
 R. Vaginae Orificium, Vulva dictum.
 S. Intestinum Rectum apertum.
 TT. Uretherum exitus.
 V. Foramen Fabricii.
 XX. Styli in Uretheres immissi, ut eorum exitum appareant.
 Y. Commune orificium sive Cloaca aperta.
 Z. Labrum seu velabrum superius.
 * Demonstrat effectæ Gallinæ infimam Oviductus partem, in eâque Vaginae orificium (a.) à Naturâ tam arctè clausum, ut vehementiori flatui transitum deneget.

fig. I




fig. II



CAP. XIV.

*De Vasis Deferentibus Mulierum
sive earum Oviductibus.*

CUM in præcedentibus à nobis Costensum sit, mulierum Testes verum earum Ovarium esse; oportet ut hoc in loco demonstremus talia Vasa Deferentia à Naturâ extracta esse, per quæ Ova illa commodè ad Uterum transire queunt: sed cum nostra opinio planè nova & indiscussa sit; præmittemus ea, quæ ab aliis Authoribus de Vasis Deferentibus assignata legimus; quò postmodum maturiori judicio, utrum veritatis scopum attigerimus, num ab eodem discesserimus, judicare possitis.

Galenus cum plerisque Veteribus, processus illos breves, à Testibus ad Uteri fundum rectà tendentes pro Deferentibus vasis usurpavit. Alii verò qui in rebus anatomicis magis oculati videri cupiunt, cum *Fernelio*,
&

& *Laurentio* ex illo ductu ramulum quendam ad Uteri Cervicem derivari volunt; adeò, ut Vas illud, quod in principio atque progressu simplex est, prope Uterum in duo Vasa Deferentia dirimant; quorum brevius & latius ad Uteri fundum; alterum longius & angustius per ejus latera inter membranas utrimque excurrere, & ad finem oris Uteri interni, vel principium Cervicis desinere statuunt; priori foeminas non gravidas semen in Uteri fundum ejaculari volunt; posteriori verò gravidas illud in Cervicem effundere existimant. Meminerunt quoque secundi illius ductus *Higlmorus*, *Plazzonus* ac *Varolius*; sed hic refert cum *Laurentio* & aliis illius opinionis fautoribus, illum in gravidis, propter usum ipsi assignatum, amplissimum esse; in virginibus verò, & iis quæ non conceperunt adeò exilem, ut non nisi à peritis Anatomicis inveniatur. Huic ramulo adhuc alterum nobis adjungere

gere videtur *Riolanus lib. 2. Anthro-
pogr. cap. 35.* dum dicit: *Ab extremi-
tate infernâ Testiculi, vasculum du-
rum, candidum, & gracillimum, ut
parvus digitus longum enascitur, quod
Uteri fundo prope tubæ insertionem
implantatur, Ejaculatorium est Va-
sculum. Sed intra tubam Uteri, cor-
pusculum aliud nerveum, oblongum
& candidum continetur, quod ipsius
Ejaculatorii continuatio est, in fundo
Uteri simul junctum, cum extremi-
tate Ejaculatorii semen in cavum
Uteri effundunt, & ex suâ radice pro-
ducunt exiguum & gracillimum sur-
culum valde anfractuosum, qui late-
raliter perreptans Uterum, ad veram
Uteri cervicem producitur.*

Sed horum Clarissimorum Viro-
rum opiniones sola partium illarum
accurata investigatio evertit; hâc
enim constat ductum talem nun-
quam reperiri, qualem *Fernelius,
Laurentius & alii* describunt. Quid
autem Clarissimis Viris imposuerit
igno-

ignoramus, nisi arteriæ Præparantes id fuerint. Hæ enim prope Uteri fundum finduntur: eâdemque fere ratione ad Uteri latera descendunt, quâ illi Vasa sua Deferentia descendere statuerunt: prout evidentissimè patet, si liquorem aliquem in arteriam Præparantem infuderis: sed non observabis liquorem illum, Uteri internum osculum prætervectum, in Cervicem erumpere; uti illi de semine fieri affirmarunt: nam præter vias superius à nobis descriptas alias non invenimus, per quas liquor aliquis in Uteri Vaginam erumpit: ast illæ nullam cum dictis arteriis communionem habent; nisi quatenus ad partes illas, unde suum liquorem hauriunt, per capillares quasdam sui ramificationes sanguinem arteriosum advehant; qui pro semine in Testibus præparato (ut illi volunt) neuti-quam haberi potest. Non reperiuntur etiam ductus illi, quos *Riolanus* ad Uteri Tubas derivari voluit; nisi
ar-

arteriæ Præparantis ramificationem ad Tubas excurrentem, pro ductu illo improprie sumpserit.

Cum modò eviçtum sit, per ramificationes à Testibus ad Uteri cornua excurrentes, nihil feminis pertransire, oportet modò etiam examine-mus; an per processus ipsos breviores & latiores aliquid ad Uterum transeat? nos autem contra communem Veterum atque Neotericorum sententiam statuimus processus illos, quotiescumque reperiuntur, nihil aliud esse quàm ligamenta Testiculorum, quibus suo in loco detinentur, & neutiquam pro Vasis Deferentibus haberi posse; quoniam non sunt pervii, aut ullâ cavitate præditi; neque proinde quidquam feminis, aut ei analogum in se continere reperi-es, qualemcumque in dissecando diligentiâ adhibueris. Deinde hæc Ligamenta non perveniunt ad internam Uteri cavitatem, sed extimæ tunicæ annectuntur; nam duo tantum
fora-

foramina stylum admittentia in Uteri fundo inveniuntur; quæ non ad Ligamenta illa, sed ad Tubas Fallopianas excurrunt.

Hinc *Plazzonus*, & fortassis etiam *Veslingius*, *Bartholinus*, & alii, per varios ramulos venarum Lactearum æmulos (qui per membranas, quibus Tubæ Fallopiantæ Testibus nectuntur, excurrunt) semen primò ab Tubas; & deinde (cum necesse sit) ad Uterum propelli statuunt.

Sed ut partium accurata investigatio priorem sententiam evertit; sic posteriorem quoque ratio & autopsia destruit: quia in membranis illis quatuor tantùm Vasorum genera reperiuntur, nervi scilicet, arteriæ, venæ & vasa Lymphatica; atqui nullum eorum semini è Testibus ad Tubas transvehendo aptum est, non potest ergo per illa semen è Testibus ad Tubas transire. Sed hujus erroris causam fuisse arbitramur, quòd ejus sententiæ fautores, nervos per mem-

P

bra-

branam illam [Tab. 7. litt. G.] mirificè excurrentes pro vasculis semini transvehendo necessariis assumpserint. Ast rationibus superius allatis Clariss. *Whartonus* de gland. cap. 33. minus contentus, dicit: non necesse esse, ut Vasa Deferentia aperto ductu in Uteri cavitatem inferantur; cui ut fidem addat, adjungit: *Nam viri quoque ejaculatoria per cæcos ductus, seu potius per quandam transsudationem in urethram exonerantur.* quod quantum à veritate alienum sit, in Tractatu nostro de Viror. Organ. &c. abundè demonstravimus.

Porro si muliebrense semen non in Uteri cavitatem, sed in solidam ejus substantiam derivaretur (uti quondam Clariss. *Harvei* autoritate seducti credidimus) profectò semen illud virili spermate fecundatum, sanguinis circulatione facile ad omnes corporis partes propelleretur, & ubique, sufficienti calore fotum, fecundum producere posset; quod omnino
ridi-

ridiculum est. Præterea liquor in Testibus contentus (quem foeminarum semen dicit *Whartonus*) vesiculis suis firmissimè detinetur; nec nisi cum vesiculis illis è Testibus prodit: hoc autem non fieri per Uteri ligamenta existimamus; quia illa nullâ cavitate, nisi eâ, quam à vasis sanguineis suis obtinent, prædita sunt, sed ex solidâ & membranosa substantiâ in mulieribus constant, atque sic in primis vesiculæ illæ viâ tam difficili ad longitudinem duorum transversorum digitorum transire deberent, antequam ad Uterum pervenirent; unde ulterius per totam Uteri substantiam, crassiciem transversî digiti æquantem, ejusque membranam internam transire cogerentur; antequam Uteri cavitatem, in quâ perfici debent, pervenire possint. Quæ sententia, si non impossibilis sit, saltem longè majori difficultate premittitur, quàm nostra, quæ statuit Vasa Deferentia esse meatus illos, quos

Fallopianus in observationibus suis Anatomice Tubas appellans, his verbis describit: *Meatus* verò iste *seminarius* gracilis & angustus admodum oritur nerveus ac candidus à cornu ipsius uteri, cumque parum recesserit ab eo, latior sensim redditur, & capreoli modo crispat se, donec veniat prope finem, tunc dimissis capreolaribus rugis, atque valde latus redditus finit in extremum quoddam, quod membranosum carneumque ob colorem rubrum videtur, extremumque lacrum valde & attritum est, veluti sunt pannorum attritorum fimbriæ: & foramen amplum habet, quod semper clausum ja et concidentibus fimbriis illis extremis, quæ tamen, si diligenter aperiantur ac dilatentur, tubæ cujusdam æneæ extremum orificium exprimunt. Quæ Fallopii descriptio, pro usu, quem Tubis illis attribuit, satis accurata est: sed ad verum earum usum, cum alia quædam considerata veniant, in earum

rum descriptione aliquantulum immorabimur.

Numero duæ sunt, utrimque una.

Sitæ sunt in mulieribus ad latera Uteri, à cujus fundo, angusto admodum principio enascuntur, uti videre est Tab. 10. & Tab. 19. Atque harum Tubarum principia per Uteri substantiam, & aliquamdiu extra eam recto ductu excurrentia pedetentim dilatantur; at ubi Tubæ illæ notabilem capacitatem adeptæ sunt, sensim magis & magis incurvantur, & de latere in latus flexæ, aut capreo-lari ductu contortæ excurrunt: quâ ratione dimidiam circiter Testium partem è longinquo ambiunt; in fine verò, ubi latissimæ sunt, ilico rursus coarctantur; & partes ultra coarctationem sese extendentes, in multas particulas finduntur, ac fimbriis quibusdam, foliaceum ornamentum, nostratibus *Loof-werck*, referentibus, terminantur: cujus figura elegantissima conspicitur, si in aquâ positum

230 REGNERUS DE GRAAF
microscopii beneficio aut aliter perlustretur.

In foliaceo hoc Tubarum ornameto quandoque Hydatides excrefcunt: vidimus quoque singulis ejus extremitatibus calculos duriffimos adhærere, quos unà cum ornameto illo etiamnum confervamus.

Tubæ in vaccis, ovibus, cuniculis, aliisque animalibus ab uteri cornubus oriuntur; & earum extremitates non ut in hominibus finduntur, fed perpetuam & tenuiffimam membranofam expansionem adipifcuntur, atque eodem fere modo, ut Oviductus in avibus terminantur. Uti exhibet Tab. 14. litt. FF. & Tab. 20. litt. FF.

Diximus Tubas illas in extremitate fuâ coarctari, & non claudi; quia fecundùm ordinariam Naturæ difpofitionem, notabilem femper coarctationem habent; præter Naturam verò aliquando omnino clauduntur; cujus rei exemplum quoddam refert

Tab:

Tab. 19. Fig. 3. huic capiti annexa; quod infortunium iis accidisse credimus, qui illas semper clausas esse scripserunt. Hâc ratione etiam *Fallopins*, qui in institutionibus, illas clausas scripsit; in observationibus suis postea melius edoctus, errorem suum texit; dicendo concidentibus fimbriis claudi illarum foramina pervia: ita, ut pervias esse Tubas illas omnino statuendum sit, quemadmodum clarè patet, si per tubulum in Tubarum principium immissum flatus versus extremitatem propellatur, quia per eam ilico erumpet; quod in omni animalium genere hætenus à nobis dissecto semper evenire notavimus.

Ad valvulas Tubarum quod attinet, *Whartonus cap. 23. de gland.* dicit se nuper observasse in dissectione equæ gravidæ Tubas Fallopianas plurimis valvulis toto earum ductu muniri, ne quid feminalis materiæ per easdem versus Uterum, aut in ejus cavitatem deferatur: & è cavitatē

te Uteri in Tubas foramen stylum admittens adfuisse; unde putat vasa ista ita constructa esse, ut potius è cavitate Uteri aliquid excipiant, quàm quidquam in eandem effundant. Hoc an in gravidis equis sese ita habeat, necdum potuimus examinare: in gravidis vaccis, ovibus, & feminis non pregnantibus eas nunquam observavimus; ita ut si per folles flatus in uteri capacitatem immittatur, statim Tubæ (nisi pituita aut quid præter naturam earum orificia seu cavitationem claudat) intumescent, ac flatus per earum extremitatem erumpet. Hinc forsàn ratio peti posset, cur equa, vacca, & alia quædam animalia, longè minus in aquâ subsistere possint, & citiùs submergantur, quàm caballi, tauri, aliique; hos enim ab anteriori, illa verò à posteriori parte citius submergi nobis rustici aliquoties fidem fecerunt: quatenus scilicet aqua per Uterum ejusque Tubas in Abdominis capacitatem delabitur,

in

in eâque viscera refrigerando mortem accelerat. Idque in hominibus æquè ac in brutis illis animalibus locum habere posse, partium illarum conformatio demonstrat. An autem id ita eveniat, frequens submersarum dissectio palam faciet.

Reperiuntur tamen animalia, quæ in illarum Tubarum principio quasi valvulam obtinent, situ ac usu dictis *Whartoni* glandulis omnino contrariam; quoniam impedit, quo minus in Uterum injecta ejus Tubas subire possint: in cuniculis enim eodem propemodum modo sese habet, ut valvula Coli; non aliter ac si tuba laxo principio in Uteri cornu propenderet. Quantum ad cellulas de quibus tantum loquuntur Anatomici; nec eas unquam conspeximus; nisi pro cellulis habeant partes contortas, & hinc inde aliquantulum dilatatas: quod nobis hic annotasse sufficiat; ut evitemus errorem, qui ex hac appellatione provenire posset, quatenus

sibi aliqui imaginarentur in Tubis illis diversa receptacula maximè à se invicem distincta esse; cujus contrarium patet, si Tubæ illæ flatu distentæ, & exsiccatae secundum longitudinem per medium dissecantur; nam unicam solummodo cavitatem hinc inde aliquantulum dilatatam obtinere conspicias. Uti exhibet Tab. 19. fig. 2.

Testiculos Tubæ, uti diximus, dimidiâ ex parte ambiunt; undique tamen ab illis multum remotæ sunt; nec ullibi nisi tenuissimo quodam membranarum interventu, alis Vespertilionum simillimo, Testibus alligantur; præterquam quòd in extremitatibus fimbriis quibusdam in homine, & membranaceâ suâ expansione in ovibus, vaccis, & aliis animalibus, plus minus Testibus annectantur; eâdem ratione, ut membranosa Oviductus expansio, quam Infundibulum vocant, regioni lumbari, aut Ovario in avibus necti solet.

Substantia Tubarum membranosa est, & non nervea aut carnosâ, uti quidam scripserunt. Constat enim duabus tantum membranâ, internâ scilicet, & externâ.

Interna originem habet, aut saltem communis est, cum illâ, quæ internam Uteri substantiam cingit, figurâ tamen à se invicem multum differunt; in Utero namque lævis est, at in Tubis admodum corrugata; idque in utroque extremo magis, quam in mediâ sui parte, licet in extremo ejus corrugationes primâ fronte minus, quàm in medio conspiciantur. Harum membranarum major corrugatio in extremitate ab Utero remotâ subitò, & in principio Utero proximo sensim contingit, quo fit, ut ejus corrugationes sive plicæ, propter Tubam sensim sese coarctantem, sensim ad se invicem magis accedant, ac uniantur; ita, ut prope Uterum, ac in ipsâ Uteri substantiâ, adeò compactæ sint; ut tubulum quasi

quasi nervæum repræsentent; eâque ratione multis imposuerint nervosum esse ejus principium, quod tantum membranofum est. Extremitates verò Tubarum ab Utero remotæ post subitam sui coarctationem in multas partes finduntur, quarum aliquæ Testibus annectuntur. Hinc *Fallopious* & alii Anatomici, Tubas illas nullam omnino cum Testibus communionem habere, statuentes, à veritatis viâ nobis declinasse videntur.

Externa Tubarum membrana communis est cum eâ, quæ externam Uteri substantiam obvelat, eaque non corrugata ubique, sed plana & lævis existit; prope Uterum crassior est; in progressu ac præsertim in extremitatibus ita attenuatur, ut internæ membranę corrugationes per eam in brutis maximè transpareant; & post coarctationem sive findantur, ut in hominibus; sive integræ permaneant, ut in brutis, ægrè à se invicem separentur. Ca-

Capacitas hujus ductus plurimum variat : in principio enim tantummodo setam admittit , in progressu verò, ubi latissima est, auricularem digitum sæpissimè recipit , in fine autem ejus coarctationes sive foramina modò non dilatentur , quartam solummodo digiti illius crassitie partem admittunt. Hic tamen Naturæ lusui quidquam concedendum est.

Longitudo ejus non semper eadem est ; utpote conspicitur 4, 5, 6, 7, 8, & quandoque novem transversos digitos æquare.

His omnibus præmissis & ritè consideratis, judicamus primò verissimum Tubarum usum esse, quòd in coitione foecundâ subtiliori masculini feminis portioni ad Testes properanti transitum concedant ; ut Ova in illis contenta irrorentur, deinde, quòd Ova eâ ratione foecundata, & è Testibus propulsa, ab extremitate Tubarum excipiantur, ac per internam earum cavitatem ad

Ute-

Uterum deducantur. Quæ omnia ut clariora fiant : petemus primò, an virile semen ad Uterum pertingat : secundò, an inde ulterius ad Tubas ascendat ; tertiò, an ascensus ille ad generationem necessarius sit ? denique quomodo prodeuntia è Testibus Ova è Tubis excipiantur, & ad Uterum pertingant ; clarè distinctèque demonstrare conabimur.

Ad primum meritò dubitatur an masculinum semen in coitu emissum ad Uterum pertingat ; quandoquidem ejus Cervix in variis animalibus talem constructionem obtineat, ut ad crassiorem feminis portionem excludendam potius, quàm admittendam efformata videatur ; quemadmodum id prope marcellum habitantes in ovibus, vaccis, & aliis quibusdam animalibus indies conspiciere possunt. In cuniculis verò & leporibus uteri Cervix obstaculis illis ne quidem obfessa reperitur, sed vaginæ longitudo ac latitudo tanta est ; ut semen

femen nullâ necessitate ad utriusque cornu orificium ascendere teneatur. In mulieribus autem, ubi Vagina se undique Peni applicat, ejaculatum semen in Uteri capacitatem ascendere posse partium genitalium efformatio demonstrat. Ex hac rerum diversitate fatis constat, quòd de seminis ascensu in genere nihil certi determinandum sit.

Ad secundum judicamus Tubas ita efformatas esse, ut masculinum semen in mulieribus, vaccis, ovibus, ac aliis (dummodo ad Uteri cavitatem pertingat) admittere possint: illudq; revera admittere ipsa experientia confirmare videtur: luculenter enim ostendit Cl. *Harveus*, & alii, in Uteri cavitate post coitum licet prolificum, per aliquot dies nihil deprehendi. Cum verò mulieres in coitu feminalem materiam evidenter excipiant, neque eandem, quando foecundæ fiunt, denuo rejiciant (uti vulgaris opinio est) necesse est cam alicubi sedere:

cedere: sed in Uteri fundo nulli meatus sive receptacula sunt, quæ materiam adeò crassam, ut semen, recipere possunt; præterquam Tubarum foramina in Uteri fundo hiantia: judicabunt itaque virile semen has Tubas subire; illudque liberius, cum *Fallopius* testetur se aliis fide dignis spectatoribus præsentibus in meatibus illis sæpius exquisitissimum semen reperisse: simile quid cum ab aliis quoque observatum sit; petent, unde illud alias proveniret, quandoquidem à Testibus non procedat, nec in Tubis generetur.

Non in Testibus illud generari, patet ex *Fallopii* discursu; & sensuum testimonio constat, nullam similem materiam in mulierum Testibus contineri; nec aliâ formâ eo deferri posse per membranas quibus Testibus alligantur, superius demonstravimus: quia nulla in illis semini vehendo destinata Anatomicorum unquam detexit industria.

Neque etiam in Tubis ipsis semen generari, probatur inde; quod organum illud pro feminis generatione nimis simplex, & ad ipsum conservandum tali vigore, qualis ad conceptum requiritur, inidoneum videatur. Nimis simplex illud existere judicamus ex eo, quòd Natura pro feminis in viris generatione tam longas atque mirabiles tubas efformaverit; quod profectò supervacaneum foret, si in tam simplici organo tantam perfectionem nancisceretur. Ad semen quoque conservandum illud inidoneum existit; quandoquidem spiritalis feminis portio per aperta ejus ora, in extremitatibus præsertim existentia, evanesceret, ac vappidam quandam materiam solummodo in illis relinqueret.

Si hîc objiciat aliquis, quòd virile semen ad Tubas ascendens similiter vapidum evadet, & consequenter generationi ineptum existet? respondemus, id non posse con-

tingere ; cum membranosa fimbriarum expansio blandâ subeuntis seminis titillatione, undique sese Testibus applicet ; ita, ut seminalis aura aliorum quàm ad Testes properare nequeat : quo peracto reliqua feminis pars in Tubis permanens, vappida evadat necesse est.

Ex quibus constat virile semen in coitu quandoque ad Tubas ascendere ; quod in illis fortassis titillationem & ingentem illam voluptatem excitat, quam in coitione prolificâ mulieres sese perfentire fatentur.

Attamen videtur feminis illius in Tubas ascensus in cuniculis haud posse contingere ; quandoquidem in earum principio quasi valvula quædam appareat, quæ crassioribus feminis partibus transitum denegare videtur ; nisi eâdem ratione, quâ Tubarum extremitas, quæ concidentibus fimbriis clausa jacet, & in coitu expanditur & aperitur, etiam hanc valvulam conniveré statuamus. Sed ne nimium hanc

dis-

difficultatem exagitemus.

Ad tertium progredimur; & dicimus omnino necessarium non esse, quod semen ipsum ad Uterum aut Tubas ascendat; sed sufficere, quod seminalis aura illa loca pertranseundo ad Testiculorum Ova pertingat. Quod ut probabilius appareat, considerare oportet semen ipsum, siue in Uterum & Tubas ascendat, siue non, equidem per crassissimam Testiculorum tunicam ad Ova pertingere non posse; ita, ut necessario pro Ovorum fecundatione ad auram feminalem recurrere debeamus: quo concesso parum aut nihil omnino referre videbitur, siue aura illa ex Tubis, siue ab Utero aut vagina ipsa proveniat. Quæ neutiquam paradoxa videbuntur; si consideretur, quomodo Ova in gallinis ac reliquis avibus fecundentur. Incredible enim apparet, modicum seminis, quod Gallus in momentaneo illo compressionis tempore in vaginam effundit, per ute-

rum & anfractuofum Oviductus tubum (in gallinâ foetante admodum latum, tribusque noſtratium ulnæ quadrantibus longiorem) ad Ova pervenire, ac foecundare poſſe; niſi ad auram feminalem recurramus.

Sed hoc conſeſſo, qualem ſimilitudinem (petet aliquis) aves cum hominibus habent? maximam proſeſſo; nam habent (uti ſuperius probatum eſt) mulieres in Teſtibus, ut aves in Ovario ſuo, evidentiffima Ova: & ſi aurâ à galli ſemine promanante gallinarum Ova foecundentur, quidni etiam Ova in mulierum Teſtibus recondita, ſimiliter aurâ ex ſemine maris exſpirante foecundarentur. Hanc noſtram opinionem confirmat partium in utroque animali conformatio: eodem etenim modo in mulieribus, ac quadrupedibus præſertim exiſtit extrema Tubarum expansio, ut infundibulum in avibus: ita ut alium generationis modum in hominibus & quadrupedibus, quàm

in avibus expostulare, supervacaneum videatur.

Diximus Ova jam fœcundata è Testibus propelli, quâ ratione autem id contingat, arduum est determinare; quandoquidem ocularis inspectio illam difficultatem vix enodare valeat: ne tamen modum illum altis tenebris immersum relinquamus; veritatis investigandæ gratiâ, nostras eâ de re cogitationes vobis lubens communicabimus.

Judicamus itaque Ova illa è Testibus prodire, partim virtute Testium, partim etiam Ovi ipsius peculiari dispositione.

Virtute Testium, quatenus inter eorum membranas Ovum obvelantes materia quasi glandulosa excrescit: brevi namque post coitum Ovorum tunicas (quæ antea diaphanæ erant) opacas devenire conspiciamus, multisque sanguineis vasis adornari; & postero die post opacitatem illam conspectam inter dictas ejus tunicas

glandulosam quandam materiam totum Ovum involventem, globulique figuram repræsentantem intueberis, quæ sensim accrescens Ovum undecumque comprimendo, illud tandem per foramen in ejus medio conspicuum expellit; quod in cuniculis tertio post coitum die, in ovibus, vaccis, aliisque majoribus animalibus, quæ diutius uterum gerunt, tardius evenit; unde nobis veritatis scopum minus attigisse videntur ii, qui humanos foetus trium, quatuor, aut octo dierum se invenisse gloriantur. Quod per transennam hîc indicasse sufficiat; cum in exercitationibus nostris errorem illum clariùs demonstrare decreverimus.

Foramen per quod Ovum¹ expelli diximus, ante glandulosam globulorum substantiam frustra quæsieris; quandoquidem immediatè ante & post Ovi expulsionem tantùm appareat, cum aliquali prominentiâ, quam præ similitudine non ineptè Papillam

nominaveris; cujus foramen pro animalis magnitudine variat; stylum in vaccis, in cuniculis verò tantummodo setam admittit.

Si quispiam hîc enunciet, Ova Testiculorum nimis magna esse, ut foramen tam exiguum pertransire valeant: dicemus quoque Uteri osculum nimis angustum esse, quam ut per illud foetus tantus, quantus est, transire queat. Si referat Colli uterini ductum in partu ita sese dilatare, ut foetus commodè per eum transeat: in promptu causa est; quoniam in papillâ majorem dilatationem non requirimus; nam si foramen illius in tantum dilatetur, in quantum Uteri collum & osculum extendi asserunt; Ova licet cecuplo majora, illud faciliè pertransibunt.

Hanc Ovi expulsionem ratione Testium contingere judicamus; quia dum illud propriis membranis obvolutum foras propellitur, communes ejus tunicæ unâ cum glandulosâ illarum

larum substantiâ in Testibus permanent.

Ratione Ovi hanc expulsionem faciliter arbitramur; quatenus illud peculiari sui dispositione propulsioni faciliè cedit.

Non est itaque, quòd quis dicat, mulierum Ova Testibus nimis firmiter adhærere, quàm ut ab eorum substantiâ avellantur, & per papillæ foramen transeant: cum quotidiana nos doceat experientia, Naturam sine difficultate inter se firmiter connexa dissolvere: exemplum habemus in placentis, quæ licet Utero firmiter annexæ, sponte tamen in partu dissolvuntur: similiter vix vellendi ab arbore fructus, dum ad maturitatem perveniunt, sponte decidunt: item ceraforum, prunorum, amygdalorum, dactylorum, aliorumque seminia durissimis licet ossibus inclusa, suo tempore progeminant: & quod magis ad negotium spectat; videmus indies avium ova ex ovario,

tametsi

tametsi racemo validè annexa, sponte suâ delabi. Nihil obstat itaque, quominus Ova ratione jam dictâ è Testibus excludantur: verumtamen alia difficultas oboritur; scilicet, quomodo illa ad Uterum pervenire possint; cum Testes in Abdomine ita propendeant, ut Ova ex illis propulsa in ejus cavitatem decidere debere videantur. Hoc proculdubio taliter accideret, nisi Naturæ providentia Tubarum extremitatem sic efformasset, ut Ova è Testibus prolabantia excipiant. Hoc ita fieri judicamus, quia ut plurimum in brutis Tubarum extremitatem Testiculos tam accuratè amplectentem invenimus, ut quidquid ab his prolaberetur, necessariò in Tubarum capacitatem incidere deberet: quod tanto liberius asserimus; cum in variis quadrupedibus extremam Tubarum expansionem ejuscemodi, ut oviductus Infundibulum, quod in avibus vitellos excipit, efformatam offenderimus.

Rationes propter quas sustinemus Tubas illas transmittendis Ovis à Naturâ destinatas esse, & non Vasa semen Deferentia aliis Anatomicis dicta; præter superius allegatas, sequentes potissimæ sunt: Prima, quia Vasa Deferentia Veterum non in omnibus animalibus reperiuntur; nam in vaccis, ovibus, cuniculis Testiculi tantum membranis inter Uterum & ejus Tubas existentibus inhaerent; & nullam peculiarem cum Utero communionem habent. uti videre est Tab. 20. E contra verò in omnibus animalibus cum Infundibulo Testes peculiarem communionem possident. Secunda, quia non solum extremas Tubarum expansiones Testiculos undique amplecti, verum ipsamet Ova in cuniculis tertio post coitum die Tubas pertransire videmus. Tertia, quia non Ova tantum, sed & ipsum foetum in Tubâ fuisse repertum Variorum observationes testantur: quemadmodum *Riolanus*

anthropog. libro 2. capite 35. Decem sunt, inquit, anni jam elapsi, ab eo tempore quo hæc scribo, quod Chirurgus Parisiis, præsentibus Medicis, in mortuâ muliere dissectâ, pusillum fœtum optimè conformatum in Cornu dextro uteri invenit: similem fœtum à sexaginta annis in iisdem vasis, Parisiis visum fuisse, à Chirurgis fide dignis mihi narratum est. Sed recens habemus exemplum de lotrice linteorum cubiculi Reginae, ab aliquot annis, in ejus corpore inventus fœtus pollicis longitudine & crassitie bene conformatus, intra uteri cornua locatus, qui dolores adeo crudeles per quatuor menses excitavit, ut tandem vitam cum morte commutarit, mense graviditatis septimo: quam observationem eodem in loco pluribus prosequitur, & alias ejusdem rei historias adjungit: sed recentiore aucupemur.

Tabula vigesima prima huic capiti subnexa.

* *Duas matrices 6. Januar. 1669. à Bened. Vassalio Chirurgo, corpus mulieris 32. annorum ætatis, sanguinei temperamenti, & masculini aspectus aperienti, repertas ostendit.*

Hæ duæ matrices tam egregiè diligenti naturæ curâ dispositæ erant, ut, quæ vera erat, undecies conceperit, nempe 7 masculos & 4 fœminas, omnes justo tempore natos & ad amussim efformatos. Illos vero demum secutus est frater, tantum fœtus, qui in adjuncto utero conceptus est, in loco extensionis adeo impatienti, ut cum ampliorem locum quæreret, postquam matri per duos menses & semis gravissima symptomata effecerit, demum circa 3 vel 4 mensium ætatem repagula soluit, & suum in matris

tu-

* *Fieri potest (inquit Clariss. Oldenburgius, ex cujus actis Philosophicis Regiis hanc observationem decerpimus) ut id, quod à Dn. Vassalio hujus relationis publicatore secundus uterus existimatur, nihil aliud sit, quàm vera matrix extensa, vel id quod Anatomicis tuba Fallopii vocatur, vide Th. Bartholini anatomiam reform. lib. 1. cap. 27. & alios.*

tumulo reperit, vastâ sanguinis effusione in totâ abdominis capacitate effectâ, quæ matrem in tam violentos motus convulsivos totum triduum con-jicit ut eis diem supremum obierit. Quo dictus Vassalius posteaquam (partibus balsamo servatis) particularem ejus dissectionem per integrum mensem, in suâ domo, coram doctissimis Medicis, Chirurgis, Pharmacopolis, obstetricibus, aliisque naturæ scrutatoribus qui Parisiis sunt, confecerat, consultum duxit ejus historiam conservare, eandem & partium figuras de quibus sermo fit; typis committendo, unâ cum tabulâ, quam consentaneum duximus hîc latinè subnectere.

Quæ omnia probant Ova, ex quibus foetus generari debent, à Testibus per Tubas ad Uterum transire, & non aliunde in Tubis foetum generari; quàm quia Ovum jam foecundum redditum in transitu suo in Tubis (qualicumque id causâ contingat)

gat) detinetur, atque augmento suo matri necem parat.

Ex hâc nostrâ sententiâ explicatu quoque difficile non est, quomodo foetus aliquando in cavitate Abdominis inter intestina excrescant: quatenus scilicet Ova jam foecunda è Testibus extra Tubarum cavitatem decidant, & à partibus adjacentibus foveantur, & incrementum sumant; donec tandem placentæ beneficio cum illis copulentur, ac ultimam perfectionem nanciscantur: quæ omnia aliàs commodè explicari nequeunt.

Præterea nisi Tubæ huic ufui destinatæ forent, non videmus qualem humano corpori utilitatem præstare possent: nam planè ridiculum est, quod quidam volunt illas Uteri spiraculorum aut caminorum vicem gerere, per quos Uteri fuligines in cavitatem Abdominis exhalent, aut foetus in Utero respiret: nam placentæ illis partibus primariò adhærens, earum foramina claudit; atque foetus

in

in membranis suis à primo generationis termino ad partum usque contentus, nequaquam respirare debet.

Quibus omnibus ritè perpenſis, judicamus Tubas Fallopianas dictas in mulieribus ac omni fœmellarum genere vera vasa Deferentia, aut si mavis Oviductus, esse; quatenus per eos ad Uterum; Testiculorum Ova traducuntur.

TABULA DECIMA-NONA

Tubas Fallopianas sive Mulierum Oviductus diversimodè efformatos exhibet.

Figura I. Oviductum præternaturaliter dispositum exhibet.

A A. Oviductus.

B. Uteri pars.

C. Testiculus.

DD. Vasa Preparantia.

E. Oviductus principium.

F F. Oviductus extremum Testibus præter Naturam agglutinatum.

GG. Fora-

GG. Foramen perexiguum in Oviductus extremo, pusillo foliaceo ornamento circumvelatum.

H. Ligamentum Testiculorum.

Figura II. Exhibet Oviductum secundum longitudinem apertum.

A. Oviductus principium.

B. Oviductus extremum naturaliter coarctatum.

CC. Rugosa Oviductus interna tunica.

DD. Externa Oviductus tunica.


E E. Foliaceum Oviductus ornamentum.

Fig. III. Exhibet Oviductum inflatum, cujus extremitatem præternaturaliter clausam offendimus.

A. Oviductus.

B. Oviductus principium vinculo constrictum.


C. Oviductus extremitas præter Naturam clausa.



TABULA VIGESIMA

Exhibet Uterum Ovillum cum annexis, ut quorundam circa vasa Deferentia lapsus demonstretur.

- A. Uterus.
 BB. Uteri Cornua.
 CC. Tubarum principia.
 DD. Tubarum extrema.
 EE. Tubarum foramina.
 FF. Membranosa Tubarum expansiones.
 GG. Membranosa expansionum partes ad Testes tendentes.
 HH. Testes absque vasis Deferentibus Veterum, in membranoso Ligamento alis vespertilionum assimilato haerentes.
 II. Ligamentum membranosum alis vespertilionum assimilatum cum vasis per ipsum ad Cornua & Tubas excurrentibus.
 KK. Vasa Spermatica ad Testes tendentia.
 L. Uteri Cervix.
 M. Uteri Osculum.
 N. Uteri Vagina aperta, in qua rugosa ejus substantia.



TABULA VIGESIMA-PRIMA.

- A. *Pars Vaginae.*
 B. *Orificium internum Matricis aperta.*
 C. *Collum Matricis.*
 D. *Cavitas Matricis.*
 E. *Linea separans cavitatem Matricis.*
 F. *Uteri fundus.*
 G. *Duo sinus inventi in fundo Uteri.*
 HH. *Crafsities Uteri.*
 II. *Ligamentum latum, sive productio Peritonæi lateris sinistri, continens in plicaturâ suâ Vasa deferentia & ejaculantia.*
 K. *Arteria SpermatICA.*
 L. *Vena SpermatICA.*
 M. *Testiculus.*
 N. *Verum vas Ejaculatorium insertum fundo Uteri per sinum ibi inventum.*
 O. *Alterum vas Ejaculatorium, quod ingreditur Collum Uteri, quò ejaculantur mulieres à conceptu.*
 P. *Tuba Uteri.*
 R. *Ligamentum rotundum.*
 S. *Ligamentum latum ab eâ parte, ubi Spiritus hic Uterus formatus est.*
 T. *Arteria SpermatICA.*
 V. *Vena SpermatICA.*
 Y. *Testiculus.*
 Z. *Pars Tubæ.*




Fig. 1. A fetus in the uterus, showing the position of the fetus and the surrounding structures. The letters A through Z are used to label various parts of the anatomy.

Fig. 2. A fetus in the uterus, showing the position of the fetus and the surrounding structures. The letters A through Z are used to label various parts of the anatomy.

Fig. 3. A fetus in the uterus, showing the position of the fetus and the surrounding structures. The letters A through Z are used to label various parts of the anatomy.

Fig. 4. A fetus in the uterus, showing the position of the fetus and the surrounding structures. The letters A through Z are used to label various parts of the anatomy.

Fig. 5. A fetus in the uterus, showing the position of the fetus and the surrounding structures. The letters A through Z are used to label various parts of the anatomy.

- 2 *Verum vas jaculatorium, quod fundum Uteri ingreditur per sinum supra dictum.*
- 3 *Alterum Jaculatorium, abiens in Uteri col- lum.*
- 4 *Pars lacerata à fœtu aucto.*
- 5 *Fœtus eo situ, quo inventus fuit, Amnio suo obvolutus.*
- 6 *Vasa Umbilicalia.*
- 7 *Placenta substantiæ cuidam carnosæ adhaerens.*
- 8 *Substantia carnosæ.*
- 9 *Ligamentum rotundum.*

Nota hujus figuræ explicationem in hunc mo- dum à *Vassalio* traditam esse, cujus si nobis interpretandi venia concederetur, sequentes litteras hâc ratione explicaremus :

- GG. *Vas aliquod sanguineum secundum longitudi- nem apertum.*
- nn. *Testiculorum ligamenta pro vasis ejaculato- riis habita.*
- o. *Vas sanguineum Uteri latera perreptans.*
- ss. *Tuba Fallopiana seu Oviductus dilatatus, in cujus capacitate fœtus repertus est.*
- 2 *Inferior Tubæ pars.*
- 3 *Alterius lateris vas sanguineum ad Uterum excurrans.*
- 5 *Fœtus in Tubâ Uteri inventus.*

C A P. XV.

De his quæ Ovo in Utero accidunt.

Post accuratam partium genitalium descriptionem, ordinis ratio exoptulare videtur, ut generationis modum seu mirandas Ovi in Utero mutationes pari diligentia discutiamus. Pro cuius majori intelligentia, operæ-premium erit pulli ex Ovo formationem, à pluribus authoribus præsertim *Harveo* diligenti curâ exhibitam, contemplari; ut ex patenter ejus cognitione jam pertractanda melius percipi valeant.

In Ovo ab Utero recepto, omnium primò considerandæ sunt, figura, magnitudo, & ejus materia.

Figura in ipsius primordiis semper orbicularis est; ut tanto facilius viarum angustias & anfractuosos earum ductus pertransire queat.

Magnitudo ejus pro animantium diversitate varia conspicitur; obser-

vavimus namque eam instar feminis papaveris, grani sinapi, canabis, pisi minoris, & interdum instar ciceris majoris.

Materia quoque in omnibus eadem propemodum videtur, subtilis nempe ac spirituosâ, tantâ limpiditine prædita, ut crystallum etiam purissimum omnino superet.

Ejuscemodi Ovum nascentis fœtus primordium in Utero sese primum intuentibus exhibet, cujus nulli parti tam firmiter adjungitur, quin solo flatu quaquaversum propelli faciliè possit: at cum Ovum inibi nequaquam otium sectari oporteat; Natura novo illi hospiti opiparè prospiciens, ad Uterum statim laudabilis humoris copiam amandat, ut in eo, tanquam fertilissimo arvo, incrementumumat.

Notatu dignum est in perangusto limpidissimi illius Ovi medio aliud quasi Ovum etiamnum innatare; ex quo constat Ova è Testibus in Ute-

rum prolabantia duabus membranis investiri, quarum exteriorem Chorion, interiorem verò Amnion appellandam esse non ambigimus. Utraque hæc tunica non semper ad eundem modum incrementum capit; in ovibus namque, vaccis, aliisque quamplurimis exterior brevi temporis spatio, tantam liquoris copiam in suam capacitatem allicit, atque ita expanditur; ut internam centuplo mole suâ exsuperet. In aliis verò animalibus eodem fere modo augescunt; & sibi mutuo tam firmiter annectuntur, ut non nisi summâ difficultate à se invicem separari possint; idque præsertim circa postrema gestationis tempora.

Nec aliter Ovum augmentum suum capeffit, quàm quòd dictæ tunicæ delatum in Uteri fundum humorem imbibant; eâdem ratione, quâ vitellorum tunicæ in avibus albumen induunt; quod eo facilius admittendum, cum quotidianâ experien-

rientiâ constet, semina terræ commissâ tantam liquoris quantitatem exugere, quantam ad germinandum desiderant.

Augescentium tunicarum figura non eadem semper observatur; interna siquidem sphæricam suam figuram plerumque retinet; externa verò, quæ in hominibus, vaccis, ovibus, aliisque totum Uterum replet, pro ejus diversitate variam figuram adipiscitur; adeò, ut in quibusdam ovalis, in aliis oblònga, in aliis denique instar manticæ mediâ sui parte coarctatæ appareat.

Dum Ovum ad hunc modum grandescit, in interiori ejus tunicâ Amnios dictâ nubecula quædam comparet, quæ sensim crassior evadens, mucosâ materiam acquirit, in cujus medio primò punctum saliens, deinde rude embryonis corpusculum, ut informis galba, conspicitur; quod indies augescendo majorem perfectionem nanciscitur: quo

autem ordine singulæ ejus partes perficiantur, cum ab *Harveo* ac aliis abundè traditum sit, lectorem eo ablegabimus; interea nos Ovi partes foetum circumfistentes penitus explicare conabimur. Hujusmodi quatuor genera sunt corporum: membranæ scil. humores, vasa, & carnea substantia.

Quæ primò conspectui sese offerunt, membranæ sunt; quæ à variis variè describuntur, cujus causam non aliam esse putamus; quàm, quòd in diversis animalibus tum numero, tum figurâ, ac etiam situ diversæ sint, sic ut nunc duæ tantum, nunc tres, interdum quatuor enumerentur.

Membrana itaque exterior, totum foetum unà cum membranis ac humoribus ad eum spectantibus ambiens & amplectens, à venarum arteriarumque in ipsâ, tanquam in choro, congerie, *Fabricio* Chorion dicitur. Nos tamen malumus cum celeberrimò *Vop. Fortunato Plempio* ejus
 ety-

etymologiam à græco *χρῖον* derivare, quod parvum locum significat; quo foetus nempe concluditur.

Figura ejus in mulieribus orbicularis est; in cuniculis verò renis figuram quodammodo repræsentat; in equabus autem, *Harveo* teste, formâ uteri internâ sacculum oblongum refert; in ovibus, vaccis, cæterisque bifulcis, quorum uterus bipartitus est, instar manticæ ad utriusque cornu extrema protenditur, adeoque totum uterum replet: in cuniculis autem, canibus, felibus, muribus, aliisque animalibus utrimque dentatis, quorum uterus bipartitus est, aliquam tantum uteri partem adimplet; quoniam in his determinatam magnitudinem consequitur; & si contingat in uno cornu plurima Ova contineri, eorum exteriores tunicæ in principio à se invicem multum distabunt; postremis tamen gestationis diebus ita simul conjunguntur, ac si cuncta unâ & communi tunicâ involuta forent: quæ

quæ res nobis anſam dedit cogitandi, in ovibus, vaccis, aliisque biſulcis, dum plures foetus geſtant, cujuſlibet Chorion pari ratione junctim copulari. Cujus rei ut certiores fieremus, in ovibus præſertim, utpote quarum nobis copia ſuppetebat, quotieſcumque duo foetus ſimul aſſent; immiſimus tubulum in Chorii cavitatem cornu extremo correfpondentem, quam cum flatu leniter diſtenderemus, vidimus illum circa medium ſiſti, nec ad alteram, in quâ ſecundus foetus erat, pertingere; niſi adaucto conamine ſeptum, quod ex utriuſque extremitatibus ſimul junctis conſtat, diſrumperetur; quodeo facilius contingit, cum ibi tenuitatem ſuam ſervent, dum alibi, propter uſum quem Ovis præſtant, indies magis incræſcantur, adeoque flatui magis reſiſtunt. Videmus etiam in Ovis jam primum in Uterum propulſis geminam membranam Amnium videlicet & Chorion exiſtere, quod

quod nos movet, ut contra communem opinionem sentiamus, in bifidulis quoties plures foetus sunt, toties singulos tam bene quam in cuniculis suum Chorion obtinere; secus quam in feminibus, fructibus, aliisque rebus contingere videmus; cujus differentia nobis apparet, quod hæc eodem in loco simul generentur; illa verò, quotiescumque plura simul concurrunt, sive ab eodem sive à diversis Testibus proveniant, distinctis in locis enascantur, & propriis tunicis Amnio scilicet & Chorio instructa ad Uterum pertingant; quod cum perpetuò in Ovis (quæ in hunc finem conservamus) cuique demonstrare possimus; non absque ratione ulterius statuimus has Ovi membranas non in Utero, sed in Testibus generari.

Chorion in cane, fele, ac aliis forsitan animalibus cingulo quodam ita distinguitur, ut geminum appareat; reverà tamen unicum existit; quod
vel

velinde constat, cum ante cinguli formationem tale illud extitisse experientiâ constet. Membranacea illius substantia prioribus mensibus simplicissima & tenuissima conspicitur; tractu tamen temporis crassescit: intus lævis ac lubrica est; foris verò inæqualis ac viscosa cernitur.

Vasa quibus Chorion insignitur, sunt venæ & arteriæ, quarum insignes ramificationes in glanduliferis omnes ejus partes perreptant; quæ plurimis in locis concurrentes, primò rubicundas maculas, deinde glandulas siue moleculas efformant, quarum beneficio illud Utero annectitur. In placentiferis autem vasa sanguinea præsertim versus illam Chorii partem tendunt, quæ Uteri substantiæ annectenda est; versus reliquas enim partes non nisi capillamenta quædam emittunt. In cuniculis insigni quodam ramo potitur, qui prout extra foetus Abdomen pervenit, relictis vasis sanguineis versus placentam

tam excurrentibus, inter Amnii & urinariæ membranæ duplicaturas lateraliter ad Chorion pergit, & omnes ejus partes perambulat.

Membrana hæc primo gestationis tempore in cunctis animalibus hactenus à nobis examinatis libera est, nec prius Utero annectitur, quam dum omnia foetus membra efformantur. In suis tamen illam toto gestationis spatio solutam ac liberam permanere Clariss. *Harveus*, *Needham* & alii scribunt.

Connexionis modus pro animalis diversitate plurimum variat: in hominibus, cuniculis, gliribus uno solum in loco membrana Chorion Utero adnascitur: in ovibus & vaccis plus quam nonaginta locis illud Utero annexum vidimus; reliquos connexionis modos ex jam describendâ placentarum materie sufficienter quisque colligere poterit.

Membrana Chorion in quibusdam animalibus tantum Allantoidi
sive

sive membranæ urinariæ applicatur; in aliis verò partim membranæ urinariæ, partim Amnio annectitur.

Ufus Chorii est liquorem alendo foetui idoneum imbibere, vasa umbilicalia fulcire, atque carunculas in glanduliferis, & placentam in placentiferis sustinere.

Sequitur hîc altera membrana, quæ non minus quàm prior totum foetum ambit & proximè investit, Amnios, dicta, id est amiculum, quòd amicè foetum obvolvât. Liquorem in se continet limpidissimum: de cujus naturâ & incremento, cum de reliquis Ovi humoribus agemus, nostrum quoque judicium proponere non detrectabimus.

Hujus membranæ substantia Chorion longè albicantior atque tenuior est: vasa accipit ab umbilicalibus; quidquid enim ex illis in placentam aut Chorion non transit, in se recipit.

Figuram præterpropter ovalem exhibet.

Allantoiden inveniendi modus nobis commodissimus videtur, si apprehensâ ex cotyledonibus unâ vel placentæ portione Chorion exiguo vulnuscule perforetur, ut tubulo per illud immisso inflari possit; videbis etenim hâc ratione, jucundo prorsus spectaculo, intercedente flatu membranas à se invicem secedere, ac aliam tenuissimam membranam subalbicantem, nullisque sanguineis vasis refertam in conspectum prodire: hanc Allantoidem appellamus; de cujus existentia & usu Authores multum disputant; in eo tamen convenire videntur, quòd omnes eam in bisulcis quadrupedibus admittant; quatenus sub Chorii membranâ ab Uracho, cujus prolongatio est, ad utrumque uteri cornu protenditur, quorum extremitatibus appendiculis suis quodammodo annectitur.

Figuram oblongam refert instar

S

far-

farciminis, unde farciminalis sive Allantois appellari solet. Hæc in cuniculis inter foetum & placentam ad latera vasorum umbilicalium tantum collocata, figuram neutiquam farciminaliæ obtinet; sed ex variis cavitatibus circa vasa umbilicalia concurrentibus conflare videtur; quemadmodum eleganter patet, si tubulum per placentam in ejus cavitatem immiseris, inflata enim hæc tunica concamerationem talem efformat, qualem exhibet Tabula 27. in cujus cellulis urinosus quidam liquor inesse conspicitur; quâ autem ratione hic è vesicâ urinariâ ad eam transeat, necdum assequi potuimus, qualemcumque in perscrutando diligentiam adhibuerimus; nam licet in vesicam flatum aut liquorem immitteremus, ne minimum quidem in urinariam hanc tunicam propellere potuimus. *In equabus* (teste Clariss. Needham de formato foetu cap. 3.) paulò aliter se res habet, in
qui-

quibus membrana hæc chorio ubique subnectitur, & universum fœtum cum amnio in se continet. Urachum interim habet evidentem qui non tam ex ipsâ nasci videtur quàm ex amnio, & hujus quasi duplicatura esse in vesicam usque reflexa, ut vel flatus vel stylus immissus eo facile pergat. & paulo inferius. In muliere integrum fœtum complectitur, eodem fere modo quo de equâ dictum est, Chorio ubique adnata. Quod cum à nobis etiam animadvertum sit, membranam hanc talem, qualem illam observavimus Tab. 22. huic capiti annexâ delineavimus.

Inter membranam hanc & vesicam urinariam nullam hætenus viam invenire potuimus: quare merito quæri posset, an membrana hæc in cunctis eundem, num verò diversum usum obtineat? quantum ad nos spectat, in prius inclinamus, illam nempe tunicam in omnibus animalibus eodem officio fungi, quod est urinam

excipere ; ad quod credendum nos movet expertissimi *Spigellii* argumentum afferentis homini Urachum & Allantoidem dari ; quia homini eadem quæ cæteris animalibus urinam alicubi deponendi incumbit necessitas : quod de quolibet animali vesicâ donato verum esse Clariss. *Needham* enunciat. Nihilominus tamen fate- mur nos hæctenus liquorem aut fla- tum in vesicam propulsum , per Ura- chum in hanc membranam adigere neutiquam potuisse : illud quidem non convincit naturaliter nihil ex ve- sicâ in hanc membranam evacuari : nam idem in cuniculis nobis contigit ; in quarum tamen urinariâ membranâ urinosum liquorem comperimus. Si verum sit , quod Clariss. *Harveus de Uteri Membranis & Humoribus* in- sinuare videtur : Naturam nimirum aliquando coactam inter membrana- rum duplicaturas urinam aut quid aliud deponere posse : quis non con- cedet eandem in membranam (cui

ne-

nemo hætenus probabiliorem usum designare potuit) secedere? eoque facilius cum videamus illam in equabus (in quibus hæc membrana ut in homine totum foetum ambit) cum vesicâ urinariâ patente ductu communicare, ac copiosum lotium continere.

Hætenus de Ovi membranis egimus, convenit modo nonnihil humores in illis contentos discutere. Anatomici de eorum numero dissentiant, ac diversum illis usum assignant; aliqui enim in homine duos tantum, in brutis tres; alii autem largiores illi tres, his quatuor attribuunt. Quoad nos propter rationes superius allatas judicamus in omni animali urinariâ vesicâ prædita, nunc duos nunc tres humores reperiri, licet non semper simul existant.

Qui in illorum humorum naturam ac usum inquisiverunt, parum inter se conveniunt, aliqui enim tantum excrementitios, alii alibiles, alii deni-

que partim excrementitios partim nutritios esse statuunt: qui excrementitios illos humores existere autumant, in Amnio sudorem & in Chorio urinam contineri judicant, quam aliqui cum sudore in Amnio permiscendam volunt.

Sed his omissis dicemus humores Amnio & Chorio conclusos nequam excrementitios esse, quod sequentibus rationibus facile comprobabitur: primò namque certum est, humores illos in membranis diu ante conceptum existere, ac præterea tum temporis cum foetus formatur & accrescit copiosissimos esse, atque instante partu imminui, nec non interdum penitus absumi; quemadmodum hisce diebus vidimus in cuniculis, cum jamjam parituram dissecaremus; inter dissecandum enim aliquot catuli membranis adhuc illæsis prodibant, qui nihil liquoris in Amnii aut Chorii tunicis obtinebant; idem similiter in aliis ex utero desumptis ob-

observare licuit; ne tamen illud ob suspectam membranarum læsionem, fallacemque liquoris effluxum postmodum in dubium revocaremus; Amnii tunicam penitus examinare cœpimus, & immisso flamine illam integram & inviolatam extitisse comperimus. Ex quibus satis constat humores illos haud excrementitios esse, quoniam augeſcente foetu augeantur; hi verò consumuntur: deinde contra naturam videtur, quod tennellus embryo in excrementis nateret.

Quod *Harvæus* loco citato dicit: si vesica comprimatur, urinam potius per pudenda, quàm per Utrichum in Allantoidem effluere, id præter Naturam, & non nisi in demortuis locum habere videtur, dum scilicet musculus Sphincter vesicæ collum non amplius constringit. Eâdem ratione, dum ovillos foetus dissecaremus; aliquando in Amnio alvinas fæces offendimus; quod ita con-

tingere secundum institutum Naturæ ordinem nemo facile admittet.

Quæ cum ita sint, sentimus hos humores non solum nutritios; sed & ipsius generationis principium esse; quod facile probatur, cum in Amnio præter dictum liquorem nihil existat, unde foetus formari vel nutriri possit. Quòd autem foetus per os & non per juxtapositionem nutriatur, in foetus dissectione conspicuum evadit; nam liquorem colore, odore, & sapore similem in embryonis ventriculo ac Amnio reperimus: illudque ob delinquentem agonizantis foetus animum haud evenire confidimus; quia cuniculi de quibus supra, tametsi nihil liquoris Amnio concluderent, ventriculi tamen eorum humore distendebantur. Quomodo autem agonizantes humorem illum ita absorbere possint, ut nihil prorsus supermaneat, assequi non possumus; meliori itaque ratione credendum erit, catulos nutrimum illum humorem

con-

consumpsisse, & alimenti forsan penuriâ in lucem prodire.

Cum modò rationibus atque experimentis demonstratum sit, humores omnes (urinoso Allantoidis liquore solùm excepto) nutritios esse; inquirendus restat eorum in tunicas pertingendi modus; quantum nos refert, arbitramur illum pro gestationis tempore variari; in principio enim dum Ovum (utriusque sexus virtutem in se complectens) è Testibus ad Uterum delabatur, illius contentum augeri judicamus, quatenus humores in Uteri fundo in hunc finem existentes primò in Chorion dein in Amnium transfudant: haud enim ad vasa umbilicalia, lymphæductus, aut invisibiles puncti salientis processus recurrendum esse existimamus; quandoquidem humores illi, priusquam vel minimum horum comparet, sint & augeantur.

In progressu verò, quando scilicet foetus efformatur, & umbilicalia vasa

ad Amnium ac Chorion protenduntur, fieri potest, ut nutritius humor per oscula venarum exceptus ad fœtum deferatur, & inde per arterias pars aliqua dimittatur in Amnium, tanquam in fœtus thesaurum; ita, ut dicto tempore Amnii membranæ liquor duplici hâc ratione augeri valeat.

Approximante denique partus tempore, arbitramur in fœtibus, iis præsertim quos Allantois ejusque lotium totaliter ambit (uti in equâbus, & forsân etiam muliere contingit) aut suo consumpto liquore Chorion Amnio incumbit, priorem modum, quem per transsudationem fieri diximus, aboleri; & alterum tantùm locum habere posse; nisi (ut *Whartonus* c. 35. de Gland. scribit) nutritius humor à placentâ per funiculum descendat, & per minutillas papillas inde in Amnii cavitatem transeat.

Sequuntur modò vasa extra fœtum protensa, quæ communi nomine

ne Umbilicalia vocantur; horum numerus in diversis animalibus varius est; in quibusdam enim quatuor enumerantur; duæ videlicet arteriæ, una vena & Urachus: aliis autem præter recensita adhuc alia à Mesenterio orta adjunguntur. De quibus omnibus sigillatim agemus, ab arteriis umbilicalibus auspicando, quæ non à Cruralibus, sed ab Aortæ extremitatibus derivantur, & ad vesicæ urinariæ latera ascendentes Urachum concomitantur, cum eoque extra foetus Abdomen excurrunt; ubi à se invicem dispertitæ, vel simul unitæ (uti *Fallopius* in suis observationibus anat. se sæpenumero observasse asserit) circa foetus principium per liquores primò, dein per ejus membranas, ac postremò in placentiferis ad placentam, in glanduliferis ad glandulas sive moleculas Chorio undique adnatas vergunt: quibus verò placenta deest innumeris ramificationibus per Chorion disperguntur.

Ar-

Arteriis his unica tantummodo vena respondet, aſt tanta ut arterias has ſimul ſumptas facilè ſuperet: originem habet ab Hepate, & tortuoſo ductu unà cum arteriis tota ad placentaſ excurrit; præterquam quòd ramulos quosdam in tranſitu Amnio & Chorio impertiat.

Præter hæc vaſa, in quibuſdam animalibus reperiuntur alia à Meſenterio orta, quæ poſtquam umbilicum pertranſierunt, non ad placentaſ, ſed ad Chorion, ac peculiarem membranam exſpatiantur; de qua Clariff. *Needham* cap. 3. de Formato foetu.

Inter umbilici vaſa Urachus meritò computatur; utpote qui in omnibus viviparis reperitur: à veſicâ urinariâ originem ſumens, anguſto ductu per umbilicum ad Allantoidem ſeu urinariam membranam protenditur: quemadmodum in glandiferis minimo negotio ad oculum demonſtrari poteſt: in placentiferis

autem ob ductus angustiam inter vesicam & membranam urinariam, via hæc difficiliter invenitur: nihilominus tamen urinam illum pertransire, & in urinariâ membranâ evacuari, rationibus consentaneum esse superius ostendimus.

Ad reliquorum vasorum umbilicalium verum usum determinandum, arbitramur arterias inservire ut sanguinem ab embryo ad ejus membranas atque placentam in placentiferis, vel glandulas in glanduliferis advehant, unde partes illæ augentur & crescunt; Venas verò præter acceptum ab arteriis sanguinem, alium humorem pro nutrimento foetus assumere & ad eum deportare; ita ut arterioso suo sanguine foetus placentam nutriat, & vicissim foetus sanguine venoso à placentâ refluxo nutriatur: quatenus scilicet in placentâ nutrimentum humorem assumit, ac secum ducit, eâdem prorsus ratione, quâ Mesentericas venas chylum assumere statuunt

tuunt: foetum similiter placentam nutrire rationibus quoque non ad-
versatur, quandoquidem ad foetum
placenta pertineat, quod in partu
clarè conspicitur, dum ea non in U-
tero permanet, sed tota cum foetu
deturbatur.

Enodavimus huc usque tacitè
summam difficultatem, in scholis to-
ties agitatam; videlicet, an foetus per
os, an verò per umbilicum in utero
materno nutriatur: statuendo id par-
tim per os, partim etiam per umbili-
cum fieri; quod ut etiamnum clarius e-
vadat, quibusdam observationibus il-
lud indubitatum reddere conabimur.

Quod foetus per os nutriatur, ejus
ventriculi ac intestinorum contenta
facilè probant; observavimus enim
semper in embryonis æsophago &
ventriculo liquorem similem illi, in
quo natabat; præterquam quòd ille
viscidior esset; & ut de hoc nutriendi
modo certiores evaderemus, fistu-
lam intestinale aperuimus, & inve-
ni-

nimus in intestino duodeno talem ferre liquorem qualem in ventriculo; præterquam quòd ob affusam bilem aliquammodo ad viridem vergeret; & quo magis descenderet, eo magis in-crassaretur, albumque suum colorem exueret; ita ut in crassis tandem intestinis alvinarum fæcum consistentiam acquirat: quæ lenta liquoris immutatio, foetum per os nutriri, satis indicat.

Ne tamen intelligas, velim, ac si omnia excrementa ab alimento per os assumpto originem trahant: quia præter primæ concoctionis excrementa, adhuc aliud in omni animalium genere existere, certi sumus; illudque per pancreaticum ac biliarium ductum prodire credimus; quatenus scilicet humores illi in magnâ copiâ continuò in intestina exonerantur; quorum partes subtiliores suo munere functæ, per venas lacteas ad Cor tendunt, crassioribus in intestinis remanentibus, quæ primæ con-

co-

coctionis excrementum adaugent; cujus rei veritatem confirmant scybala in intestinis canis (de quo mox) qui nunquam alimentum ore ceperat, reperta; & in adultis excrementorum quantitas, quæ jejuno stomacho sponte vel post assumptum pharmacum evacuatur. de quo videndus Tractatus noster de Succo Pancreatico. cap. 10.

Si petat hic aliquis, unde contingat fæces infantum non solum, sed & reliquorum animalium, priusquam edita sunt, illum colorem induere, qui propior videtur iis alimentis, quæ postea per os assumunt? respondebimus id proculdubio ratione bilis & succi pancreatici accidere, qui pro constitutionis suæ varietate fæces hoc vel illo colore tingunt.

Sed ne longius fordibus immoremur, demonstrabimus foetum non tantum per os, sed etiam per umbilicum nutriri: diximus superius nutritium humorem per arterias Hypoga-

gastricas ad placentam aut glandulas deportari, indeque eum per venam Umbilicalem ad foetum traduci, atque per arterias in Amnii cavitate deponi: quod si verum sit, rationi non adversatur, humorem illum nutritium, præter nutritionis munus obeundum, cunctas foetus partes pertransire. Sed ut propius accedamus, præterito anno in hac urbe contigit, quod canis quinque catulos pareret, quorum maximus sine capite & ore, vel quoquam illi analogo prodibat, qui propediem disrupto umbilicali vinculo interiit. Monstri illius naturam investigaturi, aperto Abdomine ventriculum prorsus exinanitum offendimus, in intestinis verò modicam excrementorum quantitatem, quæ quo magis versus intestina crassa cederet, eo nigricantior & crassior evadebat. Atque hæc sufficienter probant foetum non solum per os, sed etiam per umbilicum nutrirî; quod ulterius *Clariss. Needham*

cap. 2. argumento desumpto ab humore in tunicâ quartâ contento confirmat.

Supereſt modo deſcribenda ſubſtantia quædam ſui generis, mediante quâ Ovum, quod primis geſtationis diebus ſolutum erat, Utero firmiter anneſtitur. In hâc primò conſideranda ſunt, appellatio, numerus, ſitus, magnitudo, figura, ſubſtantia, vaſa, & uſus.

Subſtantiæ illius appellationes pro animantium diverſitate variæ ſunt: in mulieribus enim Placenta uterina vocatur, quia figurâ id edulii genus refert, quod vulgus placentam nominat: dicitur quoque Hepar uterinum, carnea moles, &c.

In biſulcis & alterâ tantum parte dentatis (in quibus illa multiplex eſt) Cotyledonum ſeu Acetabulorum nomine innoteſcit.

Placenta in mulieribus unica tantum eſt, quotieſcumque unicus in Utero foetus exiſtit; ſi verò contin-
gat

gat plures simul ejusdem vel diversi sexus adesse, Placentæ quoque plures occurrent: si illa à Chorion nascatur, quotiescumque duplex Chorion adest, Placenta etiam duplex aderit; sed Placenta à Chorion nascitur; ergo, &c. minorem probant observationes de foetibus extra Uterum repertis, in quibus minime hæc Placentà desiderabatur, quod non contingeret, nisi Chorion vi efformandi Placentam præditum statuamus; quæ omnia clariora fient, postquam modum, quo illa cum Utero unitur, explicuerimus.

Sæpenumero tamen contingit has duas Placentas ita simul uniri, ut nulla inter illas lineæ vel membranula appareat; quapropter eas unicam diceremus, nisi ex earum origine geminoque umbilico geminam quoque Placentam esse constaret.

Placentæ situs à variis variè describitur; alii eam anticam Uteri sedem, alii posticam, alii dextram, alii finis-

stram occupare scribunt: *observavi placentam (ait Fallopius) semper hæ-
rere alteri uteri ipsius parti, in quam
desinit foramen à meatu seminario ve-
niens, atque illud quoque notavi, fo-
ramen hoc esse quasi centrum totius
spatii, quod à placenta occupatur.*
Quid verò de illo sentiamus, paucis
expediamus, dicendo certum ac de-
terminatum Placentis locum haud
assignari posse, quoniam Ovum in U-
teri cavitate existens primis diebus li-
berum est, nec ulli ejus parti firmiter
annectitur; sed in hanc vel illam ejus
regionem vertitur, cui, si diutius ad-
hæreat, Placentæ beneficio adjungi-
tur; si tamen adhæSIONIS locus nobis
determinandus foret, modo relatis
Fallopii verbis subscriberemus; quan-
doquidem Ovum, quod motu Tuba-
rum quasi peristaltico deorsum pro-
pellitur, alterutri Uteri angulo po-
tius ob loci angustiam & humoris vi-
sciditatem, ex Tubâ promanantem,
quàm alibi agglutinabitur; quod si in
utro-

utroque angulo contingat, superfœtationem (cujus exempla passim apud Præcticos extant) pro impossibili habemus; quam tamen admittimus si alteri tantum Uteri angulo, aut lateri adhæreat: quia si alterutrum Tubarum orificium non impediatur, Uterique cervix non arctè claudatur; fieri potest, quòd seminalis aura per Uterum ejusque Tubam ad Testem transeat, in eoque unum vel plura Ova fœcundet, quæ suo tempore ad Uterum delata, sufficientique calore fota superfœtationem efficient.

Placentæ moles pro Embryonis ætate ac robore plurimum variat; nam dum Ovum primò in Utero recipitur, ne quidem ejus umbra conspicitur; sed efformato propemodum fœtu, ejus rudimenta tantum apparere incipiunt, quæ augescente fœtu pariter augescunt; ita ut Placenta jam conformata pedem circiter lata, & duos fere digitos crassa existat.

Figura ejus orbicularis cernitur; superficies ejus concava, æqualis est, & Chorío firmissimè adnascitur; altera convexa, inæqualis, variis monticulis seu protuberantiis cum Utero conjungitur.

Quid autem sit materia illa, quæ Ovum abortivum duorum vel trium mensium sæpius obvolutum invenimus, & quam aliqui Molis annumerandam volunt; nihil aliud nobis videtur, quàm Placenta præter Naturam undique illi agglutinata.

Substantia ejus sui generis est, à glandularum & muscutorum parenchymate multùm diversa: inter dissolvendum hepatis aut lienis assimilari potest; quia dum dissolvitur pariter infinitas ramificationes exhibet à Chorío oriundas; uti videre est Tabulâ 22.

In mulieribus ejusdem ubique substantiæ est. In cuniculis verò, leporibus, & quibusdam aliis animalibus parte quâ Chorío annectitur rubet; al-

alterâ verò quâ cum Utero copulatur albicat; & utraque cum foetu simul excluditur, sic ut illa non magis quàm altera ad Uterum pertinere videatur. In suis verò per totam gestationem Placenta nulla deprehenditur; at tantum Chorii crassities quædam apparet: idem quoque in equabus primis gestationis mensibus observari dicitur; donec post mediam gestationem in Chorio exigua tubercula carnea excrescant, quorum beneficio illud Utero cohæreat.

Ad vasa quod attinet, venam unam & duas arterias ab Umbilicalibus obtinet, quæ totam ejus substantiam perreptant, quarum propagines Utero non aliter, ac arborum radices terræ, inseruntur: quemadmodum in glanduliferis ad oculum apparebit, si revulsis ab Utero moleculis, liquorem siphonis beneficio versus eas per umbilicalia vasa propuleris; nam vasorum umbilicalium ramusculi ex Uteri poris retracti eriguntur,

ac bellè admodum conspiciuntur; contra verò protuberans Uteri portio exiguis foraminibus perforatur, quæ vasorum umbilicalium propaginibus ex adverso correspondent; nec ullum Uteri vasorum in moleculas sese insinuantium revelatur indicium; quapropter non immeritò ambigitur, num Placentulæ illæ ulla ab Utero vasa recipiant; eoque magis cum in suis & equabus Chorii vasa ad nutrimentum humorem, qui inter illud & Uterum deponitur, assumendum satis apta videantur; hinc etiam patet, haud opus esse ut umbilicalia & Uteri vasa per anastomoses uniantur; quarum disruptione puerperæ magnum vitæ discrimen incurrerent.

De Placentarum usu & actione Anatomici haudquaquam inter se conveniunt; aliqui enim, qui embryonis vasa cum Uterinis per anastomoses uniri existimant, statuunt Placentam solummodo à Naturâ idè efformatam esse, ut illa vasa cu-
sto-

stodiat ac fulciat: alii autem volunt illam nutriendo foetui alimentum præparare, ac depurare, sic ut consimili hepatis officio defungatur: sed cum ea à Clariss. *Whartono* cap. 35. de Glandulis, satis superque refutentur, ea lubens præteribimus, ac duntaxat dicemus verum Placentæ usum esse, umbilicalia vasa fulcire, & idoneum foetui alimentum præparare, quale autem illud sit, & quomodo in Utero secernatur & ad foetum pertingat, paucis complectemur: existimamus itaque non sanguinem, ast lacteum quendam humorem esse, qui ab Utero ad foetum defertur, quia glandulæ in glanduliferis, & Placentæ in placentiferis ab Utero ita sejungi possunt, ut ne guttula quidem sanguinis effluat; sed ejus loco, si preman-
tur, lacteus quidam humor prodeat, quem à materno sanguine ita segregari credimus, ut lac in mammis, quod prout infantis ore, sic ille venarum umbilicalium osculis excipi-

tur, & ad foetum traducitur; cui etiam operi non parum conferre videntur umbilicales arteriæ; quatenus (Clariss. *Harveo* teste) lacteum illud succum attenuando, venarum umbilicalium osculis accommodent.

367 Communis partium foetum ambientium usus ex prædictis haud difficulter elicitur: quo defuncto una cum foetu *Secundinarum* nomine foras propelluntur: patque sic tandem post novem mensium incarcerationem, mirabili ac stupendâ Naturæ industriâ prodit ex orbiculo suo in orbem foetus, in cujus descriptione hîc subsistemus; quandoquidem in eo totus homo describendus foret, cujus tanta excellentia est, eaque perfectio, ut qui vellet eum ad amissim describere, opus haberet maximum implere volumen.

368 Descripsimus itaque partes genitales mulierum; quæ inexplicabili Naturæ vitio tam pravam quandoque conformationem nanciscuntur; ut
etiam

etiam peritiores sexum internoscere non potuerint; quemadmodum anno præterito ejus rei exemplum haud vulgare vidimus, quod coronidis loco hic subnectendum duximus.

Anno 1670. 27. Junii. natus est Delphis infans, quem ob pravam partium genitalium conformationem nec masculino nec foeminino nomine insigniri voluerunt, priusquam de hac re peritiores consuluisent; qui ex virili membro, ut apparebat, perfectissimo & tumoribus sub eo Testium adinstar propendentibus masculum esse judicarunt. Vocatus itaque fuit Cornelius, qui vehementiori morbo confectus 19. Julii ex hac vita commigravit. Judicabat Doctissimus illius Medicus d'Acquet cadaver illud mirificè nimis à Naturâ fabrefactum, quàm ut ad vermium escam sine ulteriori examine terræ mandaretur; cujus namque dissectio plurimorum Naturæ indagatorum curiositati abundè satisfacta-


facere poterat : quapropter rogavit parentes quatenus cadaveris apertionem annuerent, qui tandem aliquando indulserunt, ut privatim cultello anatomico subjiceretur. Invitati igitur à D. *d'Acquet* ad instituendam dissectionem unà cum aliis hujus civitatis Medicis ac Chirurgis monstruosam Naturæ efformationem examinaturi accedimus : præmissâque accuratissimâ externarum partium delineatione, Abdomen decussatâ incisione aperuimus, quò facilius ad interiora corporis penetralia nobis aditus concederetur ; & vesicâ urinarîâ cum umbilicalibus arteriis sursum protractâ, Uterus ilico cum Testibus, Tubis, Spermaticisque vasibus sese videndum præbuit ; porro cum nullum scrotum adesset, avidè investigare coepimus num in tuberculis aut inguinibus, virilis sexus testimonia delitescerent ; sed frustra : quapropter accuratius examinavimus partem illam, quæ penem repræsentabat ;

tabat; & primò per rimam in anteriore glandis parte conspicuam (eo in loco ubi secundùm Naturæ ordinem ab Uracho sive meatu urinario perforari solet) in vesicam urinariam tenuissimum stylum immittere conati sumus; at protinus ille in rimæ illius limite restitit, nec ad straminis latitudinem protrudi potuit; quapropter stylum in meatum sub Pene vulvam referentem adegimus, & ilico advertimus illum in urinariam vesicam penetrare; & ut certiores essemus, num scilicet sub nervosis corporibus spongiosa Urethræ pars cum meatu urinario delitesceret; secundò, vesicam urinariam flatu distendimus, clausoque vaginæ orificio vesicam urinariam ita distentam compressimus, ut videremus num flatus per Penem erumperet, aut quousque Urethram distenderet; sed nihil horum nobis videre licuit. Hisce duobus experimentis necdum contenti, ut ab omni dubitatione

vin-

vindicaretur animus, tertiam adjecimus ac membrum illud virili non ab simile transversim dissecuimus; sed præter duo nervosa corpora in Clitoride semper, ut in Pene, conspicua, ne quidem Uretheris umbram adinvenimus; quapropter sine scrupulo partem illam (tametsi glans præputio ex parte tecta omnibus modis perfectissimum Penem repræsentaret) non virile membrum esse, at muliebri *Clitoridis* nomine notum asseruimus, tantoque liberius cum videremus corpora illa nervosa, postquam ad pollicis transversæ latitudinem simul juncta supra vaginam excurrissent, in duas partes dividi; easque, priusquam ad urinariam vesicam pertingerent, Clitoridis more ad Vaginæ latera descendentes utrimque ossibus Pubis implantari.

Ex jam dictis satis superque liquet infantem hunc Puellam tantum fuisse ingenti Clitoride præditam.





TABULA VIGESIMA-SECUNDA

Abortum trium mensium cum Sc-
cundinis exhibet.

- A. Abortus.
- B. Umbilicus.
- C. Umbilici inæqualitates sive nodi.
- DD. Membrana Amnii duæ partes expansæ.
- EE. Membrana Chorii partes expansæ.
- FF. Amnii & Chorii partes complicatæ.
- G. Allantoidis portio Amnio nudata.
- HH. Allantoidis sive membrana urinaria pars inflata quatenus sub Amnio collocatur.
- I. Umbilici in Placentam insertio.
- KK. Compacta Placentæ pars necdum explicata.
- LL. Placentæ pars à se invicem diducta, ut ramificationes ejus conspiciantur.
- MM. Posterior Chorii pars à quâ Placentæ ramificationes arborum adinstar proficiscuntur, antequam sese in Uteri poros insinuant.

TABULA VIGESIMA-TERTIA

Infantis Partes Genitales externas
malè conformatas exhibet.

A. Clitoris accuratam Penis virilis figuram re-
presentans.

B. Glans Clitoridis denudata.

CC. Pudendi labia.

DD. Protuberantiæ Testiculos quodammodo re-
presentantes.

TA-



TABULA VIGESIMA-QUARTA
Ejusdem Infantis partes Genitales
internas exhibet.

Figura I. Clitoridem exhibet.

A. *Clitoris.*

B. *Glans Clitoridis.*

CC. *Crura Clitoridis.*

DD. *Musculi Clitoridis partes abscissæ.*

Figura II. Urethram apertam exhibet.

A. *Meatus urinaris apertus.*

B. *Vaginæ orificium.*

C. *Collum Vesicæ.*

D. *Clitoridis pars ad latus retracta.*

Figura III. Vaginam apertam exhibet.

A. *Rugosa Vaginæ substantia.*

B. *Vaginæ orificium apertum.*

C. *Uteri osculum.*

DD. *Pudendi labia retracta.*

Figura IV. Uterum cum annexis exhibet.

A. *Uteri fundus.*

BB. *Collum Uteri dissectum.*

C. *Rugosa Colli uterini cavitas.*

D. *Vaginæ pars.*

EE. *Tubæ abscissæ.*

FF. *Testiculi.*

GG. *Ligamenta Uteri Rotunda.*

fig I




fig II



fig III



fig IV



C A P. XVI.

*Cuniculorum Generationem
complectens.*

QUandoquidem ea omnia, quæ præcedentibus capitibus tradidimus, in hominibus ad oculum demonstrari nequeant; ad brutorum dissectiones nos contulimus, ac elegimus ea, quorum nobis maxima copia suppeditari poterat; quorum coëundi tempora exactè notari, & quæ plures foetus simul eniti consueverunt; ut quod in uno deesset, in altero examinari posset: sicque in hunc finem præ cæteris selegimus cuniculorum genus. Et ut certo quodam ordine singula conscriberemus, primò cuniculi foemellæ à mare necdum compressæ genitales partes intueri nobis allubuit; illâ itaque dissectâ vaginam admodum latam & octo circiter digitos longam videre licuit; eâque secundum longitudinem apertâ,
in

in superiori ejus parte semilunari septo divisâ duo constricta oscula prominebant, utriusque nempe cornu principium; uterus enim in cuniculis statim ab ipsâ vaginâ in duas partes dirimitur, quarum una dextrorsum, altera sinistrorsum vergit ad triumpus minus digitorum latitudinem, ubi ilico coarctantur, & cum Oviductibus continuantur; qui in hisce animalibus peculiarem situm obtinent; quoniam leniter inflatis uteri cornibus non extuberant, nec flatus in eos penetrat propter laxas quasdam fimbrias instar valvulæ intestini Coli concidentes. Oviductus illi gracili principio à cornibus exorti ad quinque circiter digitorum longitudinem serpentino ductu sensim magis ac magis sese dilatando ultra Testiculos excurrunt, donec versus illos retorqueantur, & infundibuli adinstar terminentur, quorum una extremitas cum Testibus, altera per gracillimam membranam rursus cum uteri

uteri cornu copulatur; ita ut hoc membranoso vinculo sese contrahente, infundibulum versus Testes cogatur, eosque amplexetur; cui etiam contribuere videtur vinculum, mediante quo cornu extremo annectuntur Testiculi; qui licet exigui, plurima tamen Ova limpidissima in se continebant, quibus dissectis liquor viscidus instar albuminis exprimebatur. Hâc præmissâ

Dimidiâ horâ post coitum aliam aperuimus; cujus uteri cornua aliquantulum rubicundiora vidimus; Testiculorum verò Ova necdum immutata erant, nisi forsan pauxillum de limpitudine suâ remisissent: in vaginâ autem uterive cornibus nihil omnino seminis aut quid ei simile deprehendere potuimus.

Sex circiter horis post coitum aliam dissecuimus; in cujus Testiculis Ovorum folliculi ad rubedinem vergebant, ex quibus acû pertusis materia lenta ac limpida erumpebat, sub-

se-

sequente cruore è sanguineis vasculis per folliculos dispersis promanante: semen quoque in hac nequaquam investigare potuimus.

Viginti quatuor horis post coitum aliam cultro subjecimus; in cujus uno Testiculo tres, in altero quinque Ovorum folliculos admodum immutatos comperimus; nam qui prius limpidi nulloque colore præditi erant, nunc opaci & diluto-rubicundi evaserant, in quorum superficie medio perexigua veluti papilla sese manifestabat; in dissectorum folliculorum medio pauxillum liquoris limpidi, & in circumferentiâ materia quædam spissior ac subrubens conspiciebatur.

Viginti septem horis post coitum aliam inspeximus, cujus uteri cornua cum Oviductibus magis sanguinea deteximus, Oviductus quoque extremitas instar infundibuli Testes undique amplectebatur; in folliculorum mediâ superficie, quemadmodum in præcedentibus, exiguæ papillæ emi-

nebant, per quas pressâ Testiculorum substantiâ liquor limpidus profiliebat, quem alius rubicundior densiorque subsequiebatur: in dissectis uteri cornibus nulla reperimus Ova, sed rugosa cornuum interna tunica aliquantulum magis tumida conspiciebatur.

Quadraginta octo post coitum horis aliam examinavimus, in cuius uno Testiculo septem, in altero tres folliculos immutatos invenimus, in quorum medio papillæ aliquantulum eminentiores erant, per quas pressâ Testiculorum substantiâ modicum liquoris albuminis instar extillabat, reliqua verò subrubens Ovorum substantia, quia nunc aliquantulum spissior erat, non tam facile quàm in præcedentibus exprimebatur.

Quinquaginta duabus horis post coitum aliam perlustravimus, in cuius uno Testiculo unum, in altero quatuor immutatos folliculos reperimus; quibus dissectis materiam quasi glandulo-

dulosam offendimus, in cujus medio exigua cavitas erat, in quâ cum nulum notabilem liquorem comperiremus; suspicari cœpimus num limpida eorum substantia, quæ propriis membranis obvolvitur, disrupta vel expulsa foret; quapropter Oviductus ac uteri cornua perscrutati sumus, at nihil deprehendere potuimus; rugosa tamen cornuum interna tunica admodum inflata splendebat.

Septuaginta duabus horis sive tertio à coitu die aliam inspeximus, quæ nobis longè aliam & maximè mirandam mutationem exhibuit, infundibulum enim Testiculos undique artissimè amplectebatur, quo retracto, in lateris dextri Testiculo tres folliculos aliquantulum majores ac duriores offendimus, in quorum superficiei medio tuberculum ad modum papillæ exili foramine pertusum vidimus; in folliculorum verò dissectorum medio cavitas prorsus exinanita erat; quapropter vias, quas Ova transire

debent, iterum iterumque perquisivimus, ac invenimus in Oviductus dextri medio unum, & in ejusdem lateris cornu extremo duo minutissima Ova, qualia exhibet Tab. 26. fig. 1. quæ licet perexigua geminâ tamen tunicâ amiciuntur, ex quibus acu pertusis limpidissimus liquor prodibat; hæc quamvis incredibilia, levi tamen industriâ nobis demonstratu facillima sunt. In altero autem Testiculo quatuor folliculos invenimus, quorum tres aliquantulum magis lucidi, minorique foramine pertusi videbantur, in quorum etiam medio tantillum limpidissimi liquoris adinvenimus: at quartus folliculus obscurior erat, nec quicquam liquoris in se continebat; quamobrem Ovum ex hoc folliculo elapsum suspicabamur, quâ de causâ ejusdem lateris cornu & Oviductum perscrutati sumus, ac unicum tantum Ovum in ipso cornu principio deprehendimus, perpussilis alterius lateris Ovis simillimum: unde

unde liquet Ova jamjam è Testibus exclusa aliis adhuc in Testibus hærentibus decuplo minora esse, quod eatenus contingere nobis videtur, quatenus scilicet in Testibus existentia adhuc aliam materiam complectuntur, illam scilicet, ex quâ glandulosa folliculorum substantia provenit.

Quarto à coitu die aliam aperuimus, in cujus uno Testiculo quatuor, in altero tres globulos seu folliculos exinanitos invenimus; & in utriusque lateris cornibus totidem Ova præcedentibus, majora, magnitudinem cit. Tab. fig. 2. referentia, quæ non in Oviductus, aut cornuum principis hærebant, sed versus horum media nunc provoluta erant; in eorum capacitate aliud quasi Ovum innatare longè clarius quàm in præcedentibus conspeximus: vidimus præterea in Testibus præter hos folliculos, ac alios masculino necdum semine irroratos quatuor vesiculas nigræcantes,
ex

ex quibus apertis sanguinis grumus depromebatur; illud, cum in aliis cuniculis sæpius observaverimus, tanquam minus rarum silentio involutum relinquemus.

Quinto à coitu die aliam dissecuimus, in cujus Ovariis sive Testiculis sex exinanitos folliculos notabili papillâ præditos enumeravimus, per cuius foramen mediocrem setam in eorum cavitatem facilè inseruimus: totidem quoque Ova ad magnitudinem cit. Tab. fig. 3. in diversis uteri partibus invenimus, quibus tam laxè adjacebant, ut solo flatu quaquaversum facilè propellerentur: horum interna tunica magis adhuc conspicua evaserat.

Sexto post coitum die inspeximus aliam, in cujus uno Testiculo sex folliculos exinanitos, & in ejusdem lateris cornu quinque tantùm Ova propè vaginam in cūmulum quasi redacta invenimus: in alterius verò lateris Testiculo quatuor folliculos exina-

nanitos, & in ejus lateris cornu unum tantum Ovum comperimus; cujus diversitatis causam suspicamur, vel quod aliquot Ova undoso uteri motu, intestinorum motui peristaltico non absimili, deorsum versus vaginam delata, foras propulsa fuerint; vel quod in folliculis consumpta ad uterum non pervenerint; vel alio quopiam modo sinistrum eventum habuerint. Horum Ovorum magnitudinem exhibet cit. Tab. 26. fig. 4.

Septimo à coitu die aliam examinavimus; in hujus Ovariis exinanitos aliquot folliculos præcedentibus majores, rubicundiores, ac duriores perspicati sumus; & totidem transparentes tumores sive cellulas in diversis uteri partibus conspeximus; ex quibus apertis Ova multo majora utpote cit. Tabulæ fig. 5. magnitudinem referencia exeruimus; in his præter internam tunicam longè conspicuam, & limpidissimum humorem nihil conspeximus. Mirandum est Ova
tam

tam exiguo temporis spatio tantam liquoris copiam imbibere, ut quæ antea facilè, jam difficillimè ex utero defumantur.

Octavo à coitu die aliam aperuimus, in cujus dextro uteri cornu unam, in sinistro duas cellulas vidimus; harum una fere duplo major erat alterâ: ita enim Natura quandoque variat, ut non tantùm in diversis ejusdem speciei animalibus eodem post coitum tempore dissectis, sed etiam in uno eodemque diversæ magnitudinis Ova reperiantur; quæ tamen omnia determinato partus tempore simul excluduntur. In apertis uteri cornibus vidimus Ova aliquantulum adaucta, quæ omnia, priusquam in totum eximere poteramus, disruptis tunicis limpidissimum suum liquorem profundebant: quâ de causâ aliam octavo similiter à coitu die dissectam tentavimus; cujus dextrum uteri cornu in duos, & sinistrum in quatuor transparentes tumores sive cel-

cellulas elatum vidimus, è quibus ut eximeremus Ova summam diligentiam & attentionem adhibuimus; at simulac ad ea perveneramus, eorum tunicæ præ teneritudine pariter disrumpebantur; quo viso reliqua quæ supererant Ova unà cum utero elixavimus, & eorum contenta albuminis instar induruerunt. Interna cellularum substantia, in parte quâ Hypogastrica vasa excipit, tumidior ac rubicundior evaserat.

Nono à coitu die aliam vetulam dissecuimus, hujus Testiculi fere duplo majores erant, quàm in junioribus; in dextro duos, in sinistro quinque folliculos nuper exinanitos vidimus, & præter hos adhuc alios admodum pallescentes, quos præcedentis coitus esse totaliter nondum abolitos judicabamus, tametsi plerumque tantum subcineritia puncta relinquant, quibus Testiculorum debetur adauctio. Postremi coitus folliculi papillâ obsiti, alii verò plani
exi-

existerant. In cornu dextro duæ, in sinistro quinque supereminebant cellulæ, quarum substantia reliquis uteri partibus rarior ac pellucidior multis venarum arteriarumque propaginibus intertexebatur: apertis quibusdam cornuum cellulis, Ova quidem intueri, ast integra eximere non licuit; quapropter Ovorum contentum in ipsâ cellularum capacitate rimari coacti, illud adinstar cryalli limpidum invenimus; in cujus medio nubecula quædam rara & exilis innatare conspiciebatur; quæ in aliis cuniculis nono pariter à coitu die dissectis propter summam exilitatem visum subterfugiebat. Interna cellularum substantia, ea nempe quæ Hypogastrica vasa recipit, præ reliquis magis tumida jam placentarum primordia exhibebat.

Decimo à coitu die inspeximus aliam; in cujus Testiculo dextro unicum exinanitum folliculum invenimus, qui ob sanguinea vasa copiosè
per

per eum sparsa rubicundior erat, minorique papillâ præditus; in hujus cineritiæ substantiæ medio adhuc per exigua cavitas apparebat: in sinistro verò Testiculo sex ejuscemodi folliculos adinvenimus. In Uteri cornubus tot etiam cellulas, unam scilicet in dextro & sex in sinistro transversî digiti latitudine à se invicem distantes offendimus, in quarum medio rude mucilagineum embryonis delineamentum velut vermiculus delitescibat, uti exhibet citatæ Tab. fig. 8. Placenta quoque clarè conspiciebatur, cui Ovum mediante suo Chorîo annexum erat. Ovorum unà cum Utero concoctorum materies, albuminis instar induruit, eundemque saporem referebat, ac elixa consolidataque Testiculorum Ovorum substantia.

Duodecimo à coitu die aliam aperuimus, in cujus uno Testiculo septem, in altero quinque folliculos exinanitos reperimus; totidemque

cellulas uterinas præcedentibus jam multo majores ac rotundiores, in quarum medio embryo tam conspicuus erat, ut artus quodammodo dignoscerentur, in cujus pectoris regione duo puncta sanguinea, ac totidem albescentia sese in conspectum dabant; in abdomine mucilaginea quadam substantia hinc inde ad rubedinem vergens exoriebatur. Plura in hoc informi animalculo ob teneritudinem cernere non licuit.

Decimo-quarto à coitu die aliam dissectuimus; cujus Uteri cellulas adhuc majores evasisse, & plura ac turgidiora vasa sanguinea ad se allexisse conspeximus; advertimus quoque cellulas, quò magis augescunt, eò magis ad se invicem accedere, & earum interstitia diminui. Membranzæ vero Amnios & Chorion unà nectebantur, quæ quamvis crassiores ac robustiores appareant, difficilius tamen, quam in Ovis integrè ex Utero exemptis, à se invicem disjunguntur; qui-

quibus disruptis embryonem vidimus, qualem exhibet cit. Tab. fig. 10. capite scilicet prægrandi ac pellucido, cum cerebello in apicem porrecto: oculi prominuli, os hians, & quodammodo etiam auriculæ jam dignosci poterant: spina per dorsum albicante colore in longum protendebatur, quæ circa sternum inflexa carinam referebat; ad cujus latera tenerima vasa sanguinea excurrerant; quorum ramificationes ad dorsum & pedes extendebantur. In pectoris regione duo puncta sanguinea præcedentibus majora cordis ventriculorum rudimenta præ se ferebant; ad quorum latera totidem albescentia puncta loco pulmonum visebantur. In aperto abdomine primò subrubens sese manifestabat hepar; albicans deinde corpusculum, cui instar fili contorti materia mucilaginea annectebatur; ventriculi ac intestinorum primordia. Quæ omnia in sequentibus majorem tantum molem ac perfectionem

nem acquirunt: & ne eadem toties repetita narratio nauseam moveat, reliquas dissectiones in hoc cuniculorum genere institutas consultò præteribimus, unicâ duntaxat exceptâ, quam penultimo gestationis die instituimus; ut ea, quæ in prioribus confusè tantùm dignoscebantur, in hæc elucescant.

Vigesimo-nono demum à coitu die (qui est penultimus gestationis) inspeximus aliam, quæ sex hebdomadibus ante pepererat, & in coitu, quo foecunda reddita est, omnem crassiorē masculini feminis portionem remiserat, quæ limpidissimæ cujusdam gelatinæ consistentiam quodammodo referebat. In hujus Ovariis undecim exiguos folliculos albicantes offendimus; & adhuc alios longè minores, à Testium substantiâ parum aut nihil discrepantes. Videntur Ovorum folliculi in Testibus non in totum evanescere, sed aliquod in illis punctum relinquere; unde proculdubio

dubio contingit, quòd cuniculi quò
sæpius pluresve fœtus ediderint, eò
etiam Testiculos majores ac albican-
tiores habeant; sic ut ex solâ Testium
inspectiōe, an sæpius pepererint, &
plures fœtus habuerint, conjicere va-
leamus. Ovario perlustrato ad Ute-
rum progredimur, quem non am-
plius in cellulas distinctum, sed instar
infarcti farciminis undique disten-
tum comperimus; qui motu undoso,
peristaltico non absimili, ita agitaba-
tur, ut fœtus vaginæ proximiores
membranis adhuc obvoluti in lucem
prodirent; idque adeò præproperè,
ut nisi totum extirpassemus Uterum,
haud dubiè omnes expulsi fuissent.
Dissecti Uteri crassities vix major e-
rat quàm in vacuis; secus ac in mulie-
ribus accidere diximus: in illius cavi-
tate undecim fœtus calcitrantes con-
speximus, qui mediante membranâ
Chorio, quâ omnes scorsum invol-
vuntur, tam arctè simul copulabantur,
ac si uno eodemque Chorio inclusi

fuiſſent. Singuli foetus Chorion ab arteriâ Omphalo-meſentericâ ſanguinem ſuum accipiebat, & Amnio proximè incumbebat. Ad membranarum figuram penitus examinandum, primò per tubulum Amnium flatu diſtendimus, quòd figuram renis nobis exhibuit, in quo nihil omnino liquoris continebatur; quo viſo tubulum per foramina in albicante Placentæ parte conſpicua in membranam urinariam immiſimus, quâ methodo vidimus eam pluribus quaſi cellulis excavari, quarum capacitas alteri, in quâ foetus erat, non multum cedebat: in membranâ hâc urinariâ drachmam ſemis liquoris urinoſi offendimus, cujus ingreſſum ut inveſtigaremus, ſyphonis beneficio primò liquorem, deinde flatum per Pudenda in veſicam urinariam immiſimus, ſed neutrum eorum in membranam urinariam adigere potuimus. Placenta in hiſce animalibus illud peculiare obtinet, quod licet unica ſit, duplici tamen ſubſtantia

tiâ constet, rubicundâ unâ & albicante alterâ, quæ licet facilè à se invicem separentur, utraque tamen in partu unâ cum foetu excluditur. Albicans placentæ substantia, quæ inter rubram & Uterum medium occupat, sex vel septem ut plurimum foraminibus perforatur, quibus inflatis rubra placentę portio instar spongiæ intumescit. Placenta hæc duplici vasorum genere gaudet, duas arterias habet ab arteriæ Magnæ trunco, & unicam venam ab Hepaticâ ortam, quæ antequam Placentam subeunt in varios ramos finduntur, qui promiscuè ad omnes ejus partes excurrunt.

Ex iis, quæ circa cuniculorum aliorumque animalium dissectiones multiplici experienciâ edocti superius memoravimus, constat

Primò, falli eos, qui dicunt tam conjugatas quam virgines Ova toties memorata sæpissimè excernere; quoniam glandulosa substantia, cujus beneficio illa è Testibus exturbantur,

tantummodo post coitum foecundum inter Ovorum folliculos excrescat.

Secundò, quod Ova intra spatium duorum vel trium dierum ad magnitudinem cereasi nigri majōris non excrescant, quoniam illa masculino semine irrorata per tres dies in cuniculis, & in aliis animalibus, quæ diutius Uterum gerunt, per aliquot septimanas in Testibus immorentur, in iisque sensim magis & magis diminuantur, donec decuplo quam ante coitum minora per crassiusculam earum membranam expellantur, & ab Oviductibus excepta ad Uterum deducantur, ubi ratione superius enarratâ incrementum sumunt.

Tertiò, non dari foetus humanos triduanos aut quatrIduanos; quia in cuniculis, quæ tantum per 31. diem uterum gerunt, Ova tertio duntaxat die ad Uterum pertingunt, in quibus non à coitu die solummodo nubecula vix conspicienda comparet, quod adhuc longè tardius contingit in iis
anima-

animalibus, quæ diutius Uterum gerunt, & quorum Ova plusquam per mensem limpidissima permanent.


Quarto, erroris arguendam esse vulgarem illam opinionem, fœmellas in coitu fœcundo semen semper retinere; nam cunicula 29. post coitum die dissecta, statim à coitu exceptum masculi semen remiserat, & nihilominus undecim fœtus utero completebatur; quod in aliis etiam cuniculis nobis sæpius observare licuit.

Atque sic Tractatum nostrum de Mulierum Organis generationi inservientibus D. O. M. propitio exegimus, quem Cordatorum Virorum iudiciis lubens submittimus, non ut libidini vel minimus adjiciatur stimulus, sed ut veritas, & Reip. Medicæ commodum magis magisque promoveatur; & nunquam satis admiranda Omnipotentis providentia, quâ humani generis propagationem ac conservationem tam miraculosè tuetur, omnibus & singulis innotescat.

TABULA VIGESIMA-QUINTA

Cuniculi partes genitales exhibet.

- AA. *Vagina.*
 B. *Vesica urinaria.*
 CC. *Uteri Cornua antrorsum protracta.*
 DD. *Oviductus principium à Cornu exortum.*
 EE. *Oviductus extremitas instar infundibuli sensim dilatata.*
 FF. *Infundibuli cavitas Testes excipiens.*
 GG. *Membranosum vinculum infundibulum Uteri Cornu annectens.*
 HH. *Infundibuli portio Testibus annexa.*
 II. *Ovaria sive Testiculi sursum protracti.*
 KK. *Membranosum vinculum Ovarium Uteri Cornu annectens.*
 LL. *Membrana tenuissima inter duo vincula existens.*
 MM. *Vasa sanguinea ad Testes excurrentia.*
 NN. *Vena Cava & arteria Magna portiones.*
 OO. *Hypogastrica vasa ad uterum delata.*
 P. *Cuniculi Testiculus in quo secundo à coitu die folliculorum papillæ apparent.*
 Q. *Testiculus in quo tertio à coitu die folliculorum crassities & cavitates, in quibus Ova delituerunt, apparent.*



332 REGNERUS DE GRAAF
TABULA VIGESIMA-SEXTA
Varias Ovorum figuras complectens.

Fig. 1. Exhibet Ova prout tertio à coitu die in cuniculorum utero reperiuntur.

2 Cuniculorum Ova quarta à coitu diei.

3 Cuniculorum Ova quinta diei.

4 Cuniculorum Ova sexta diei.

5 Cuniculorum Ova septima diei.

6 Cuniculorum Ova octava diei in utero cellulas efformantia.

A. Cellula uterina Ovum complectens.

B. Cellula aperta, in cujus Ovo prater liquorem nihil conspicitur.

7 Cuniculorum Ova nona diei.

A. Cellula uterina.

B. Cellula aperta, in cujus Ovo exilis nubecula comaret.

8 Cuniculorum Ova decima diei.

A. Cellula vasculis sanguineis referta.

B. Cellula adaperata, in cujus Ovo Embryo ut informis galba conspicitur.

9 Cuniculorum Ova duodecima diei.


A. Cellula.

B. Cellula aperta, in cujus Ovo Embryonis delineamenta apparent.

10 Cuniculorum Ova decimæ-quarta diei.

A. Cellula.

B. Embryo cum placenta & vasis umbilicalibus.



TABULA VIGESIMA-SEPTIMA

Cuniculum viginti novem dierum cum
Secundinis exhibet.

Figura I.

- A. *Cuniculus in Membranâ Amnio conclusus.*
- BB. *Membrana Amnios flatu distenta.*
- CC. *Membrana urinaria inflata varias quasi cellulas efformans.*
- D. *Corpus glandulosum Everhardi, seu albicans Placentæ portio.*
- EE. *Rubicans Placentæ portio.*
- F. *Vasa Omphalo-mesenterica Needhami ad Chorion (quod ablatum est) excurrentia.*

Figura II. Placentæ partem posteriorem ab
Utero avulsam exhibet.

- HH. *Corpus glandulosum Everhardi sex vel septem foraminibus perforatum.*
- II. *Rubra Placentæ portio.*

Figura III. Placentæ partem anteriorem exhibet, quam vasa Umbilicalia subeunt.

- K. *Linea Placentam quasi in duas partes dividens.*
- LL. *Arteriæ Umbilicales variis ramificationibus per Placentam dispersæ.*
- M. *Vena Umbilicalis similiter per Placentam dispersa.*

fig I




fig II






fig III





INDEX

RERUM MEMORABILIVM.

| | | |
|----------|---|-------|
| A | <i>Llantois.</i> | 273 |
| | <i>ejus figura varia.</i> | ibid. |
| | <i>usus.</i> | 275 |
| | <i>Allantois qualis in hominibus.</i> | 275 |
| | <i>Amnios membrana.</i> | 272 |
| | <i>Anastomoses inter arterias Hypoga-</i> | |
| | <i>stricas.</i> | 109 |
| | <i>Anastomoses inter arterias Sperma-</i> | |
| | <i>ticas & Hypogastricas.</i> | ibid. |
| | <i>Anastomoses inter venas & arterias</i> | |
| | <i>Præparantes non dari.</i> | 160 |
| | <i>Arteriæ Hypogastricæ.</i> | 108 |
| | <i>Arteriæ Umbilicales.</i> | 287 |
| | <i>Canis acephalus.</i> | 289 |
| | <i>Carunculae myrtiformes.</i> | 40 |
| | <i>Chorion membrana.</i> | 266. |
| | <i>ibidi ejus figura.</i> | 267 |
| | <i>vasa.</i> | 270 |
| | <i>usus.</i> | 272 |
| | <i>quomodo, & quando utero anne-</i> | |
| | <i>bitur.</i> | 271 |
| | Y | |
| | | Cir. |

INDEX RERUM

| | |
|---|-------|
| <i>Circulatio sanguinis.</i> | 161 |
| <i>Clitoris.</i> | 16 |
| <i>ejus appellationes.</i> | ibid. |
| <i>magnitudo.</i> | 17 |
| <i>substantia.</i> | 23 |
| <i>vasa.</i> | 25 |
| <i>usus.</i> | 27 |
| <i>Clitoridis corpora nervosa.</i> | 22 |
| <i>Clitoridis muscoli.</i> | 24 |
| <i>Clitoridis Præputium.</i> | 22 |
| <i>Colli uterini cavitas.</i> | 99 |
| <i>Collum uteri an dilatetur in gravidis.</i> | 95 |
| <i>Cornua uterina non habent mulieres, sed bruta.</i> | 95 |
| <i>Cotyledones.</i> | 190 |
| <i>Coxas ampliores cur habeant mulieres.</i> | 93 |
| <i>Cuniculi fœmellæ partes genitales.</i> | 308 |
| <i>Cuniculi ante coitum dissecti inspectio.</i> | ibid. |
| <i>dimidiâ horâ post coitum dissecti inspectio.</i> | 310 |
| <i>sex horis post coitum dissecti inspectio.</i> | ibid. |
| | vi- |

MEMORABILIUM.

| | |
|---|-------|
| <i>viginti-quatuor horis post coitum dissecti inspectio.</i> | 311 |
| <i>viginti septem horis post coitum dissecti inspectio.</i> | ibid. |
| <i>quadraginta octo horis post coitum dissecti inspectio.</i> | 312 |
| <i>quingenta duabus horis post coitum dissecti inspectio.</i> | ibid. |
| <i>tertio à coitu die dissecti inspectio.</i> | 313 |
| <i>quarto à coitu die inspectio.</i> | 315 |
| <i>quinto à coitu die inspectio.</i> | 316 |
| <i>sexto à coitu die inspectio.</i> | ibid. |
| <i>septimo à coitu die inspectio.</i> | 317 |
| <i>octavo à coitu die inspectio.</i> | 318 |
| <i>nono à coitu die inspectio.</i> | 319 |
| <i>decimo à coitu die inspectio.</i> | 320 |
| <i>duodecimo à coitu die dissecti inspectio.</i> | 321 |
| <i>decimo-quarto à coitu die dissecti inspectio.</i> | 322 |
| <i>vigesimo-nono à coitu die dissecti inspectio.</i> | 323 |
| Dolores lumbares menstruorum tempore unde. | 112 |

INDEX RERUM.

| | |
|--|--------------|
| <i>Embryonis in Ovo primordium, & augmentum.</i> | 265 |
| <i>Excrementa embryonis unde.</i> | 287 |
| <i>Excrementorum color unde.</i> | 288 |
| <i>Fluor muliebris.</i> | 136 |
| <i>Fluoris incommoda.</i> | 137 |
| <i>Fluor quomodo à Gonorrhæa distinguendus.</i> | 139 |
| <i>Fœmellæ cur citius submergantur.</i> | 232 |
| <i>Fœtus in Tubâ reperti.</i> | 251. & seqq. |
| <i>Fœtus quomodo in Abdomine inter intestina excrescunt.</i> | 254 |
| <i>Fœtus per os nutriri.</i> | 286 |
| <i>per umbilicum.</i> | 288 |
| <i>Foliaceum Tubarum ornamentum.</i> | 229 |
| <i>Frænum labiorum.</i> | 39 |
| <i>Fricatrices.</i> | 20 |
| <i>Gallinæ partes genitales.</i> | 200 |
| <i>Gallarum Ova quomodo fœcundantur.</i> | 202 |
| <i>Gallos duplici Pene adornari.</i> | 203 |
| <i>Hernia inguinalis quomodo in mulieribus excitatur.</i> | 147 |
| <i>Humores fœtum ambientes.</i> | 277 |
| <i>an alibiles, an excrementitii?</i> | ib. |
| | eo- |

MEMORABILIMUM.

| | |
|--|-------|
| <i>eorum in tunicas pertingendi mō-</i> | |
| <i> dus.</i> | 281 |
| <i>Hydatidum & Ovorum in Testibus</i> | |
| <i> differentia.</i> | 184 |
| <i>Hymen.</i> | 35 |
| <i> nihil aliud quàm Vaginæ coar-</i> | |
| <i> ctatio.</i> | 46 |
| <i>Infundibulum in gallinis.</i> | 205 |
| <i>Lacunæ.</i> | 80 |
| <i> earum usus.</i> | ibid. |
| <i>Lacunarum humor.</i> | 212 |
| <i> unde oriatur.</i> | 213 |
| <i>Ligamenta alis vespertilionum assimi-</i> | |
| <i> lata.</i> | 234 |
| <i>Ligamenta uteri.</i> | 142 |
| <i> eorum usus.</i> | 153 |
| <i>Ligamenta uteri Lata.</i> | 142 |
| <i>Ligamenta uteri Rotunda.</i> | 147 |
| <i> eorum fabrica.</i> | 148 |
| <i> quomodo relaxantur.</i> | 143 |
| <i> nullam cum Clitoride commu-</i> | |
| <i> nionem habere.</i> | 148 |
| <i> usus incongruè illis à quibusdam</i> | |
| <i> designatus refellitur.</i> | 150 |
| <i>Lymphatica Testiculorum vasa.</i> | 177 |

INDEX RERUM

- Lymphatica uteri vasa.* 113
Meatus urinarius. vide Urethra.
Membrana præter naturam in Pudendis excreta. 42. & seqq.
Membranarum foetum ambientium incrementum varium. 265
Menstrua alba. vide Fluor muliebris.
Menstrua. 124
 per quas vias expurgentur. ibid.
 an quantitate, an qualitate peccent. 134
 quâ ratione à naturâ excitentur. 130
Menstrua dum fluunt an uterus augeatur. 105
Mons Veneris. 12
Mulieres sine Peni in vaginam admissione ingravidari posse. 51
Musculus Sphincter. 82
 ejus usus. ibid.
Nervi uterini. 113
Nymphæ. 29
 earum appellatio. ibid.
 figura. 33
 magnitudo. 30
 nu-

MEMORABILIMUM.

| | | | |
|-----|--|-----|-------|
| ag | numerus. | 219 | ibid. |
| 202 | situs. | 219 | 29 |
| 202 | substantia. | 219 | 33 |
| 202 | us. | 219 | 34 |
| 202 | Nymphotomia. | 219 | 31 |
| 202 | Osculum uteri. | 219 | 97 |
| 202 | an in gravidis exactè claudatur. | 219 | 98 |
| 202 | in coitū an Penem excipiat. | 219 | 97 |
| 202 | Ova gallinarum quomodo fecundantur. | 219 | 202 |
| 202 | Ova in omni animalium genere reperiri. | 219 | 181 |
| 202 | quâ ratione in Testibus generantur. | 219 | 185 |
| 202 | cur duriori cortice non involvantur. | 219 | 180 |
| 202 | quâ ratione è Testibus propelluntur. | 219 | 245 |
| 202 | per quas vias. | 219 | 246 |
| 202 | quando. | 219 | ibid. |
| 202 | quâ ratione ad uterum pertinent. | 219 | 249 |
| 202 | eorum in utero figura. | 219 | 262 |
| 202 | magnitudo. | 219 | ibid. |
| 202 | materia. | 219 | 263 |
| 202 | Ova | 219 | |

INDEX RERUM

| | |
|---|-------------|
| <i>Ova in utero ab ipsis primordiis ge-</i> | |
| <i>minâ tunicâ investiuntur.</i> | 263 |
| <i>primis diebus utero non annectun-</i> | |
| <i>tur.</i> | ibid. |
| <i>quomodo in utero angentur.</i> | 264 |
| <i>Ovorum in utero mutatio.</i> | 265 |
| <i>Ovarium gallinarum.</i> | 207 |
| <i>Ovarium mulierum.</i> | vide Testes |
| <i>Oviductus gallinarum.</i> | 205 |
| <i>qualis in effætis.</i> | 206 |
| <i>Oviductus mulierum.</i> | vide Tubas |
| <i>Fallopianas.</i> | 211 |
| <i>Partes genitales cuniculorum.</i> | 308 |
| <i>Partes genitales gallinæ.</i> | 200 |
| <i>Partes genitales mulierum.</i> | I |
| <i>earum divisiones variæ.</i> | 2. & seqq. |
| <i>Partium genitalium mulierum cum</i> | |
| <i>avium genitalibus similitudo.</i> | 244 |
| <i>Placenta uterina.</i> | 290 |
| <i>ejus appellationes.</i> | ibid. |
| <i>figura.</i> | 294 |
| <i>magnitudo.</i> | 293 |
| <i>numerus.</i> | 290 |
| <i>situs.</i> | 291 |
| <i>substantia.</i> | 294 |
| | vasa. |

MEMORABILIMUM.

| | |
|--|-------|
| <i>vasa.</i> | 295 |
| <i>usus.</i> | 296 |
| <i>Placenta quandonam efformatur in mulieribus.</i> | 293 |
| <i>Placenta præter naturam integrum.</i> | |
| <i>Ovum involvens.</i> | 294 |
| <i>Plexus retiformis.</i> | 84 |
| <i>ejus usus.</i> | ibid. |
| <i>Polypi.</i> | 113 |
| <i>Præparantes arteriæ mulierum quomodo à virorum differunt.</i> | 156 |
| <i>Præparantes venæ mulierum quomodo à virorum differunt.</i> | 162 |
| <i>Præparantia vasa mulierum.</i> | 156 |
| <i>eorum usus.</i> | 164 |
| <i>Præputium Clitoridis.</i> | 22 |
| <i>Prolapsus uteri.</i> | 143 |
| <i>Prolapsu uteri laborantis dissectæ inspectio.</i> | 146 |
| <i>Prostatæ mulierum.</i> | 67 |
| <i>Pudendum muliebre.</i> | 7 |
| <i>ejus appellationes.</i> | ibid. |
| <i>situs.</i> | 9 |
| <i>Pudendum quale in virginibus.</i> | 37 |
| <i>& seqq.</i> | |

INDEX RERUM

| | |
|--|-------|
| <i>Rima Pudendi.</i> | 9 |
| <i>ejus usus.</i> | 10 |
| <i>Sanguinis effluxus in primo coitu unde proveniat.</i> | 40 |
| <i>Sanguinem in primo coitu cur aliquan- do virgines non emittant.</i> | 54 |
| <i>Semen muliebre.</i> | 194 |
| <i>de eo opiniones variæ.</i> | ibid. |
| <i>Semen masculinum an ad uterum per- tingat.</i> | 238 |
| <i>an in Tubas ascendat.</i> | 239 |
| <i>Testes muliebres.</i> | 171 |
| <i>eorum figura.</i> | 172 |
| <i>integumenta.</i> | 174 |
| <i>magnitudo.</i> | 173 |
| <i>situs.</i> | 171 |
| <i>substantia.</i> | 175 |
| <i>usus.</i> | 186 |
| <i>Testiculorum contenta naturalia.</i> | 177 |
| <i>Testiculorum contenta præternatura- lia.</i> | 178 |
| <i>Testiculorum vesiculæ.</i> | 179 |
| <i>cur Ova appellantur.</i> | 180 |
| <i>Tubæ Fallopianæ.</i> | 211 |
| <i>earum capacitas.</i> | 237 |
| | de- |

MEMORABILIMUM.

| | |
|--|-------------|
| <i>descriptio.</i> | 228 |
| <i>longitudo.</i> | 237 |
| <i>numerus.</i> | 229 |
| <i>substantia.</i> | 235 |
| <i>usus.</i> | 237.249.255 |
| <i>Tubæ quales in ovibus, vaccis, cuniculis, &c.</i> | 230 |
| <i>Tubarum cum Oviductibus similitudo.</i> | 212 |
| <i>Tubarum cum Testibus conjunctio.</i> | 234 |
| <i>Vagina uteri.</i> | 74 |
| <i>ejus actio.</i> | 87 |
| <i>appellatio.</i> | 74 |
| <i>crassities.</i> | 78 |
| <i>figura.</i> | 76 |
| <i>latitudo.</i> | 78 |
| <i>magnitudo.</i> | 77 |
| <i>situs.</i> | 75 |
| <i>substantia.</i> | 78.82 |
| <i>vasa.</i> | 85 |
| <i>usus.</i> | 87 |
| <i>Vaginæ constrictio in coitu unde.</i> | 82 |
| <i>Vaginæ orificii coarctatio.</i> | 38 |
| <i>Valvulae Tubarum.</i> | 231.233 |
| <i>Vasa Clitoridis.</i> | 25 |
| | <i>Vasa</i> |

INDEX RERUM

| | |
|---|-------|
| <i>Vasa Deferentia Veterum.</i> | 220 |
| <i>tantum ligamenta esse.</i> | 224 |
| <i>cur rejiciuntur.</i> | 250 |
| <i>Vasa Deferentia quorundam Neoteri-</i> | |
| <i>corum rejiciuntur.</i> | 225 |
| <i>Vasa Placentæ.</i> | 295 |
| <i>Vasa Præparantia. vide Præparan-</i> | |
| <i>tia vasa.</i> | |
| <i>Vasa Vaginam perreplantia.</i> | 85 |
| <i>Vasa Umbilicalia.</i> | 282 |
| <i>eorum usus.</i> | 285 |
| <i>Vena Umbilicalis.</i> | 284 |
| <i>Venæ Hypogastricæ.</i> | III |
| <i>earum anastomoses.</i> | ibid. |
| <i>Vesiculæ Testiculorum.</i> | 179 |
| <i>cur Ova appellantur.</i> | 180 |
| <i>Virginitatis certum signum an detur.</i> | |
| <i>49. & seqq.</i> | |
| <i>Vitellus quâ ratione ad uterum per-</i> | |
| <i>tingat.</i> | 210 |
| <i>Urachus.</i> | 284 |
| <i>Urethra.</i> | 64 |
| <i>ejus latitudo.</i> | 65 |
| <i>longitudo.</i> | 66 |
| <i>situs.</i> | 64 |
| | Use- |

MEMORABILIMUM.

| | |
|--|-------------|
| <i>Uterus.</i> | 91 |
| <i>ejus appellatio.</i> | ibid. |
| <i>crassities.</i> | 102 |
| <i>figura.</i> | 94 |
| <i>magnitudo.</i> | 101 |
| <i>membranae.</i> | 106 |
| <i>numerus.</i> | 92 |
| <i>situs.</i> | ibid. |
| <i>substantia.</i> | 106 |
| <i>usus.</i> | 114 |
| <i>Uteri Cavitas unica.</i> | 96 |
| <i>ejus figura.</i> | 100 |
| <i>magnitudo.</i> | ibid. |
| <i>Uteri Cervix. vide Collum uteri.</i> | |
| <i>Uteri Ligamenta. vide Ligamenta.</i> | |
| <i>Uteri monstrosi exemplum.</i> | 114. & seq. |
| <i>Uteri Osculum.</i> | 97-99 |
| <i>an in gravidis exactè claudatur.</i> | 98 |
| <i>Uteri vasa.</i> | 108 |
| <i>eorum usus.</i> | 114 |
| <i>Uterus an invertatur.</i> | 146 |
| <i>Uterum in Hystericâ passione non ad fauces ascendere.</i> | 151 |
| <i>Uterus quare in Hypogastrio.</i> | 92 |
| <i>quibus partibus alligatur.</i> | 94 |
| <i>Ute-</i> | |

INDEX RER. MEMORAB.

*Uterus quo magis extenditur, eo magis
incrassatur.* 103

*Uterus quo tempore, & modo ad pristi-
num statum reducitur.* 104

Vulvæ labia. 10

F I N I S.

